

Naqqiut

Siunnersuut 16. august 2023-meersoq taarserpaa

(Kalaallisuuani nassuiaatit kukkunersiornerput, aammalu kalaallisuuani qallunaatuuanili nassuiaatini allannguutit kukkunersiorneqarput)

Siunnersuummut nassuiaatit

Nassuiaatit nalinginnaasut*Imarisaanut takussutissiaq*

1. Aallarniut _____	1
2. Siunnersuummi immikkoortut pingaarnert _____	4
2.1. Ingerlatseqatigiiffiutigisami iluanaarutit akileraarutaasussaangitsut aamma iluanaarutinut aalajangersimasunut ilanngaassisinnaanerup atorunnaarsinnera _____	4
2.2. Akileraarutitigut amigartoorutit iluaqutiginnissaannut piffissaliussap sivitsorneqarnera _____	12
2.3. Annikitsumik aningaasaliinermut killiliussamik oqilisaassineq _____	13
2.4. Erniat akileraarusersorneri (nunami allami akiligassaqarfimmut ernianut akilernerqartunut akileraarusiineq) _____	15
2.5. Ingerlatseqatigiiffinnut nalikilliliinermi malittarisassanik allanngiineq _____	16
2.6. Sulisitsisumit akilernerqartut angalanerit akileraarutaannginnissaat _____	18
2.7. Akissarsianik uninngatitsinermut killiliussamik naleqqussaaneq _____	19
3. Pisortanut aningaasaqarnikkut allaffissornikkullu kingunerisassai _____	20
4. Inuussutissarsiortunut aningaasaqarnikkut allaffissornikkullu kingunerisassai _____	25
5. Avatangiisinut, pinngortitamut inuillu peqqissusaannut kingunerisassai _____	25
6. Innuttaasunut kingunerisassai _____	25
7. Kingunerisinnaasai pingaarnert allat _____	26
8. Pisortanik aamma kattuffinnik il.il. tusarniaaneq _____	26

1. Aallarniut

Naalakkersuisut erngup nukingani aatsitassarsiornermilu kiisalu sermip erngullu aningaasarsiuutigineranni Kalaallit Nunaanni aningaasaliinerup pilerinarnerulernissaa siunnersuummi kissaatigaat.

Siunnersuut 2023-mut aningaasanut inatsit pillugu isumaqatigiissummut attuumassuteqarpoq. Naalakkersuisut siunnersuummi inuussutissarsiutit nutaat ineriartortinniarpaat, pingaartumik siuariartorneq annertunerulersillugulu suliffiit nutaat pilersinniarlugit. Tassunga atatillugu ingammik nukissamik tunisassiornermut erngup nukingani nukissiornissamat pisuussutigisanik

iluaquteqarnissamut pisinnaatitaaffimmi unammillertoqarnissaq pillugu kissaatigisamut siunnersuut isigineqassaaq.

Siunnersuut aamma kalaallit nunaata aningaasaqarnerata, inuussutissarsiutinik ikittuinnarnik suli annertuumik isumalluuteqartoq, pingaartumik aalisarnermik, assigiinngisitaarnissaa pillugu kissaateqarnermut atatillugu isigineqassaaq.

Siunnersuummi ingerlatseqatigiiffiit aatsitassat pillugit inatsit malillugu, erngup nukingata innaallagissiornermut atorneqartarnera pillugu Inatsisartut inatsisaat aamma sermip erngullu aningaasarsiutiginissaa pillugu Inatsisartut inatsisaat malillugu iluaquteqarnissamut akuersissuteqartut ilaapput. Ingerlatseqatigiiffiit aamma akuersissutinut siuliani eqqaaneqartunut atassuteqartunik ingerlataqartut ilaapput, assersuutigalugu nukissiornermi tunisassianik tunisassiornermut erngup nukinganit nukissiorfimmit innaallagissamik atuineq, imaluunniit nukissiummik annertuumik atuisut suliffissuit tunisassiornerannut.

Suliassaqarfinni taakkunani namminersorlutik oqartussanit imaluunniit ingerlatseqatigiiffinnit nunatsinneersunit, aningaaserivinnit il.il. taamaallaat inuussutissarsiutitigut ineriartortinneqarsinnaangilaq, nunanilli allanit aningaasaliisussat immikkullu ilisimasaqartut pinngitsoorneqarsinnaanatik. Akileraarutit akilereernerisigut qaffasinnerpaamik iluanaarutunik pissarsisinnaaffigisaminni aningaasaliisartut aningaasaatiminnik aningaasaliissuteqarusukkajuttarput. Taamaattumik Kalaallit Nunaanni akileraartarnikkut atukkat nunani allani aningaasaliisartup akileraartarnikkut atugaanut unammillersinnaanerata pingaarpoq.

Siunnersuutikkut kalaallit nunaani akileraartarnikkut atugassarititaasut unammillersinnaanerulissapput. Kalaallit Nunaanni aamma ingerlatseqatigiiffinnik iluanaarutinillu akileraarusersuinerup nunanit allameersup aningaasaliisartut nunanit allanit ilisimasaannut malittarisassanut assersuunneqarnerusinnaanerata kissaatigineqarluni. Sinneqartoorutit nalillu Kalaallit Nunaanni pilersinneqartut maani akileraartarnissaat aamma qulakkeerneqassaaq.

Tamanna ingerlatseqatigiiffinnut aalajangersimasunut iluanaarutininut aaqqiissutip nutaap atuutsilerneratigut pissaq. Aaqqiissummut makku atuupput:

- Iluanaarutit tunniunnerinut ilanngaateqartitsisoqanngisaannassasoq.
- Iluanaarutininut akileraarutit nutaat 24 pct. aamma 14,67 pct. atuutsinneqalissapput, taakkulu ingerlatseqatigiiffinnut iluanaarutinullu akileraarusersugaaneri tamarmik suli maannakkut ingerlatseqatigiiffinnik taakkuninnga tamakkiisumik akileraaruteqartitsinermit assingunissaannik qularnaarissapput.
- Piginneqatigiiffiit pingaarnerusut ingerlatseqatigiiffiutigisanit iluanaarutininut akileraarusersorneqanngitsunik tiguisinnaanerininut periarfissaq eqqunneqassaaq.

Taamaalilluni nunatsinni akileraartarnermut inatsisini ilassutinik illuinnarsiuusunik pisariillisaassutinik siunnersuut imaqaangilaq. Siunnersuulli malittarisassanik OECD-p isumaqatigiissutaanut naapertuuttunik, illugiinnermik tunngavilinnik, aamma nunarpassuarni siaruarsimasunik tunngavilinnik imaqarpoq.

Nunanit marloqiusamik akileraartarneq pillugu Kalaallit Nunaannik isumaqatigiissuteqartunit aningaasaliisoqartarnissaa siunnersuummi pilerinarnerulersinneqarpoq. Piginneqatigiiffiit pingaarnerusut nunani taakkunani najugaqartut marloqiusamik akileraartarneq pillugu isumaqatigiissutaareersuni amerlanerniittut pisariillisaanermut periarfissanik atuisinnaapput, imaluunniit isumaqatigiissutaasussani taamaaqataanik ilaatinneqarlutik. Marloqiusamik akileraartarneq pillugu isumaqatigiissutit illugiimmik tunngaveqarput. Pisariillisaanerit taamaalillutik aamma nunani taakkunani pigisaminnik piginneqatigiiffiit pingaarnerusut ingerlatseqatigiiffiutigisanit kalaallit nunaanneersunit atorveqarsinnaapput.

Tassani nunat akileraartarnermut tunngasutigut suleqatigineqartut pineqarput, taamaattumik tassani, marloqiusamik akileraartarneq pillugu isumaqatigiissutit imarisai apequtaatillugit, suliffeqarfimmit nakkutigineqartunik nuussinernik suliarinninneq pillugu isumaqatigiissusiortoqarsinnaavoq.

Nunami allamiut aningaasaliisarnerisa iluaqusernissaanik kissaateqarnerup nassatarisaanik siunnersuutaavoq akileraartarnikkut amigartoorutit ukiuni kingusinnerusuni aningaasarsianut akileraarutaasussani ilanngaatigisarnissaannut piffissaliussaq ukiunut qulinut qaffanneqassasoq. Tamanna akileraartartunut tamanut atuutissasoq siunnersuutigineqarpoq.

Siunnersuutaavoq aamma annikitsumik aningaasalersuisarnermut killiliussaq aamma qaffanneqassasoq, taamaalilluni annertunerusumik allamiut aningaasalersuinerinut atorveqarsinnaassamat. Naalakkersuisut naliliutigaat, piumasaqaat Europami nunanut allanisulli qaffasissuseqalernissaanut malittarisassat pisariillisarnissaat pisariaqartoq.

Tamatuma saniatigut siunnersuut assigiinngitsunik allanik siunnersuutinik imaqarpoq.

- Siunnersuutaavoq erniat akileraarusersorneqalissasut, illersuinermi malittarisassatut iluseqartut. Taarsigassarsiat Kalaallit Nunaanni akileraarusersuinerup annikinnerulersinnissaanut sakkutut atorveqarsinnaaneri siunnersuutikkut pitsaaliorneqarput.
- Siunnersuutaavoq ingerlatseqatigiiffinnut iluanaarutinik nalikilliliisarnerit atorunnaassasut. Taarsiissutaasinnaasoq tunngavilersugaalluanngitsoq malittarisassamiippoq, annerusumillu ingerlatseqatigiiffiit anginerusut isumagineqarlutik. Allanguutit taamaalillutik ingerlatseqatigiiffiit akileraarusersornerinut kalluunnaveersaarnissamat iluaqutaassapput.
- Sulisitsisumit akilerneqartut angalanermi aningaasartuutit akileraarusersortarnerisa atorunnaarnissaa siunnersuutaavoq. Malittarisassat pisariinnerulernissaat Naalakkersuisut kissaatigaat. Akiliunneqarluni angalanernit iluanaarutit (ukiumut 1 mio. kr.-t missaat) ima annertussuseqarput tamanna annikitsuararsuurtut nalilerneqartariaqarluni, taamaalillutillu

malittarisassiat sulisitsisunut imaluunniit akileraaruseriffimmut atugassaqartitsinerinut malittarisassiat paasiuminaatsuunerinut allaffissornikkullu artukkiinerinut naammaginartutut naleqqiussinatik maannakkut malittarisassiat inissisimapput. Suliffimmi aamma sumiiffimmi allami suliffeqartunik sulisussarsiorneranut sulisoriinnarnissaannullu akileraarutitigut aporfiusinnaasut peernerisigut suliffeqarnikkut nuuttarsinnaanerup annertusarnissaanut allannguut iluaqutaassaaq.

- Akileraarutitigut akilinngitsuukkanik akileeqqusinikkut akileraaruseriffiit akissarsiatigut qanoq annertutigisumik uninngatitsisinnaanerinut killiliussap Kalaallit Nunaanni eqqartuussisarnermi inatsimmi killiliussamut naapertuunnissaa siunnersuutigineqarpoq.

2. Siunnersuummi immikkoortut pingaarnerit

2.1. Ingerlatseqatigiiffiutigisami iluanaarutit akileraarutaasussaangitsut aamma iluanaarutinut aalajangersimasunut ilanngaassisinnaanerup atorunnaarsinnera

Inatsisit atuuttut

Ingerlatseqatigiiffiit sinneqartoorutinut akileraartarput pisariitsunngorlugu ima naatsorsorneqarsinnaallutik:

Ingerlatseqatigiiffiup aningaasarsiai (kaaviiartitai) - ilanngaat (ingerlatsinerimut aningaasartuutit, nalikilliliinerit aamma iluanaarutinik tunniussinerit) = sinneqartoorutit akileraaruserneqartussat.

Kalaallit Nunaanni ingerlatseqatigiiffinnit aningaasarsiat taamaalillutik aallaaviatigut immikkoortumi siullermi akileraaruserneqartarput: Ingerlatseqatigiiffiup sinneqartoorutaanit ingerlatseqatigiiffiup akileraaruteqarneratigut imaluunniit sinneqartoorutit tunniunneqarnerini iluanaarutit akileraaruserlugit.

Iluanaarutit tunniunnerini ilanngaatip kingunerisaanik sinneqartoorutit ilai tunniunneqartut peqatigisaanik ingerlatseqatigiiffimmut akileraarutigineqassangillat. Ingerlatseqatigiiffik 1 mio. kr.-nik sinneqartoorpat sinneqartoornerlu tamarmiusoq tunniunneqarluni ingerlatseqatigiiffimmi sinneqartoorutit sinneqassangillat taamaattumillu ingerlatseqatigiiffimmut akileraarutaanatik.

Iluanaarutinik tunniussinerimi akileraarutit tamarmiusut ingerlatseqatigiiffiup akileraartarnikkut angerlarsimaffiani kommunimi inunnut tamarmiusumik akileraarusiisarnermut naapertuuppoq. Akigititaasut tassaapput: 42 pct., 44 pct. imaluunniit 36 pct., ingerlatseqatigiiffik kommunimi akileraarfiusumi akileraaruseriffeqarpat.

Iluanaarutinit akileraarut inaarutaasumik akileraarutaavooq. Iluanaarutit akigititanik taakkuninnga akileraarusersorneqarput, apeqqutaatinnagit tigusisoq tasaanersoq inuinaq imaluunniit ingerlatseqatigiiffik alla aamma piginneqataasut piginneqataassutaasa annertussusaat piffissarlu piginnittuuffiusoq. Iluanaarutinilli tigusisoq akileraartussaataanngippat iluanaarutinit akileraarutit

utertinneqassapput, tak. inatsimmi § 3, taakkunungalu ilaallutik namminersorlutik oqartussat, kommunit, naalagaaffik nalinginnaasumik ajunngitsuliortut aningaasaateqarfiit.

Iluanaarutininik tiguisoq nunami allami najugaqarpat marloqiusamik akileraartarneq pillugu isumaqatigiissutikkut Kalaallit Nunaata nunatut pissarsiffiusutut aamma nunap tiguisup najugaqarfigisaata akornanni akileraarutininik pissarsisussaanerup agguarnissaa isumaqatigiissutigineqarsinnaavoq. Marloqiusamik akileraartarneq pillugu isumaqatigiissutit imarisai taamaattumik pisuni arlalinni tiguisumi inaarutaasumik iluanaarutit akileraarusersornissaannut aalajangiisuusinnaapput.

Danmarkimik, Savalimmiunik, Norgemik aamma Islandimik marloqiusamik akileraartarneq pillugu isumaqatigiissutinit takuneqarsinnaavoq, aningaasarsianik akileraaruserneqartussanik naatsorsuinermit ingerlatseqatigiiffik iluanaaruteqartitsisoq iluanaarutit pilugit ilanngaateqarpat iluanaarutinit Kalaallit Nunaata akileraaruteqartitsinissaa 35 pct.-nik annertussuseqassasoq. Tiguisoq nunat taakku arlaanni najugaqarpat iluanaarutinit akileraarutit ilanngaatingeqartut aamma tamakkiisumik iluanaarutininik 35 pct.-imik akileraarutip akornanni assigiinngissutaasoq qinnuteqartoqarneratigut utertitsisinnaavoq.

Siunnersuut

Aningaasaliisinnaasut aamma namminersorlutik oqartussanut siunnersortit uparuarsimavaat, nunami allami piginneqatigiiffik pingaarnersuq aqqutigalugu aningaasaliinerit pineqartillugit maannakkut ingerlatseqatigiiffiit/iluanaarutininik akileraarusersuineq nunanit tamalaanit isigalugu qaffasittoq.

Uparuarneqarpoq aamma pisut ilaanni akileraarusiinerup kingunerisinnaagaa nunanit allaneersut aningaasalersuisut siunertaanngitsumik marloqiusamik akileraarusersorneqartarnerat. Taamaattoqarsinnaavoq nunani allani pisariillisaanissamut malittarisassat Kalaallit Nunaanni ingerlatseqatigiiffiutigisamit iluanaarutininik tunniunneqartunik akileraarusiinerit sunniuteqarluartumik eqqarsaatigineqanngippata.

Maannakkut aamma ingerlatseqatigiiffinnik/iluanaarutininik akileraarusersuineq nunani allarpassuarni akileraarusiisarnermiit allaaneruvoq. Assersuutigalugu iluanaarutininik kalaallit nunaanni akileraarusersuineq marloqiusamik akileraarusersuinermit kinguneqarsinnaanersoq, siunissami nunarsuaq tamakkerlugu minnerpaamik akileraarusersuineq eqqunneqarpat nalornissutigineqarsimavoq. OECD/G20-mi malittarisassaani marlunni (GloBE Global anti-Base Erosion) aamma EU-mi peqqussutissatut siunnersuummi nunarsuaq tamakkerlugu minnerpaamik akileraarusiisarnissaaq sulissutigineqarpoq. OECD apeqquteqarfigineqarnermini akivoq iluanaarutinit Kalaallit Nunaanni akileraarutit ingerlatseqatigiiffimmi iluanaarutininik tunniussisumi akileraarutit akuerineqarsinnaassasut. Taamaattumik malittarisassiat marluk atugaaneranni Kalaallit Nunaanni ingerlatseqatigiiffinnik suliffissuurtut atassuteqartunik suliffissuarnut nunanit

allaneersunut marloqiusamik akileraartitsinissamut aarleqquteqassanngilaq. Assersuutilli takutippaa maannakkut malittarisassat Kalaallit Nunaannit iluanaarutit qanoq nunani tamalaani akileraartarnikkut ataqatigiisumik suliarisarnissaat pillugu nunani allani aningaasalersuisartuni nalornissuteqartoq.

Tulliuttumi siunnersuutip aaqqissugaanera pingaarnertullu imarisai allaaserineqarput:

Inatsimmi kapitali 3 b nutaaq ilanngunneqassasoq siunnersuutigineqarpoq. Aatsitassat pillugit ingerlatalu tamatumunnga pingaarutillit pillugit Inatsisartut inatsisaat, Erngup nukingata innaallagissiornermut atorneqartarnera pillugu Inatsisartut inatsisaat, imaluunniit Sermip erngullu niuernikkut iluaqutigineqarnissaat pillugu Inatsisartut inatsisaat najoqqutaralugit iluaquteqarnissamut akuersissutinut nalunaarutaasunut naleqqiullugit ingerlatseqatigiiffinnut, kaaviiartitaanni minnerpaamik 90 procentii suliarisanut inissinneqarsinnaasunut malittarisassiat atorneqarsinnaapput. Tamakku saniatigut Kalaallit Nunaanni erngup nukinganik nukissiorfinnik annertuumik atuisutut suliffissuaqarfinnit tunisassiornermut innaallagissamik iluaquteqarluni suliaqarnermut, serverparkinik ingerlatsinerut, imaluunniit qarasaasiakkut paasissutissanik toqqorsisarnernut ingerlatseqatigiiffinnut, kaaviiartitani minnerpaamik 90 procentii suliarisanut inissinneqarsinnaasunut, malittarisassiat atorneqarsinnaapput. Pineqartumi kingullermi piumasaqaat tassaavoq ingerlatseqatigiiffik ingerlatseqatigiiffimmut ingerlatseqatigiiffiutigisaassasoq imaluunniit tassaassasoq ingerlatseqatigiiffiutigisaq suliarisaanut tunngaviliisumik akuersissummi malittarisassianik nammineq ilaallunilu pisinnaatitsissummik pigisaqartuunissaa, imaluunniit ingerlatseqatigiiffimmik tassannga suliffissuaqarfinnut atasuusutut ingerlatseqatigiiffiussanera.

Malittarisassiat atuuttut tamakku, imaluunniit kapitali 3 b-mi malittarisassiat malillugit akileraarusigaanissartik pillugu ingerlatseqatigiiffiit namminneq aalajangiussaqaassapput.

Tulliuttumi ingerlatseqatigiiffiit kapitali 3 b-mi malittarisassat malillugit akileraartarnissamik toqqaasut kapitali 3 b-mi ingerlatseqatigiiffittut taaneqartassapput.

Kapitali 3 b-mi ingerlatseqatigiiffiit eqqarsaatigalugit kapitalimi aalajangersakkat malitsigisaanik allanguuteqartut malittarisassat atuuttut malillugit aningaasarsiat akileraarutaasussat naatsorsorneqassapput. Allanguut pingaarnerpaaq tassaavoq kapitali 3 b-mi ingerlatseqatigiiffiit iluanaarutit pillugit ilanngaateqarsinnaatitaannginnerat. Paarlattuanik piginneqatigiiffik pingaarnerusoq ingerlatseqatigiiffiutigisap, taanna kapitali 3 b-mi piginneqatigiiffik pingaarnerusuuppat iluanaarutai tiguisumut aningaasarsiat akileraarutaasussat ilanngullugit naatsorsorneqassanngillat.

Iluanaarutininik tunniussinermut ilanngaateqarsinnaatitaanerup atorunnaarsinnera ingerlatseqatigiiffik sunaluunniit ingerlatseqatigiiffiup akileraarutaatigut Kalaallit Nunaanni ingerlatamut nalimullu pilersinneqartumut akileraartinneqartarnerata qulakkeerneqarnissaa pillugu anguniakkamut ikorfartuivoq. Pisuni taama ittuni ingerlatseqatigiiffiit iluanaarutit tunniunneqarnerisigut sinneqartoorutit aamma ingerlatseqatigiiffiup akileraarusersornera appartissinnaajunnaarpaat.

Iluanaaruteqartumut ilanngaassisinnaanerup atorunnaarsinnerata pisariaqartilerpaa sinneqartoorutit ingerlatseqatigiiffiup akileraarutaatigut akileraaruteqartissimaneri sillimaffiginarlugu kapitali 3 b-mi ingerlatseqatigiiffiit pillugit iluanaarutit akileraarusersornerini akigititaq iluarsineqarluni. Taamaattumik siunnersuutigineqarpoq iluanaarutininut akileraarut nutaaq appasinnerusoq 24 pct. eqqunneqassasoq.

Procenti maannakkut iluanaarutit aamma inuit akileraarusersornerininut sunniuteqannginnissaa qulakkeerpaa. Taanna ataatsimoortumik akileraarusiinerup naapertuuppoq: $(0,25 + ((1 - 0,25) * 0,24)) = 43$ pct. Akileraarusineq tamarmiusoq taamaalilluni 42 aamma 44 pct.-t akornanniilerpoq, tassa maannakkut iluanaarutininut akileraarusiisarneq.

Aammattaaq tusarniaanermik tunngaveqartumik ingerlatseqatigiiffiup akileraaruseriffik kommunitut akileraaruteqartarfigisaani pisuni taakkunani atorneqartussamik iluanaarutininut akileraarutininut akiliutissamik 14,67 pct.-imik atuutsitsisoqalissasoq siunnersuutigineqarpoq. Tassunga ilaapput aatsitassarsiornermik ingerlatseqatigiiffiit, aamma sermimik imermillu sulialittut ingerlatseqatigiiffiit. Allanguutip siunertaa tassaavoq aatsitassarsiornermik ingerlatseqatigiiffimmut maannakkut iluanaarutininut akileraarutininut akigititap 36 pct.-iusup kallunnaveersaartitaanissaanik qulakkeerininnissaq.

Kapitali 3 b-mut ilaasutut piginneqatigiiffiit pingaarnerusut iluanaarutininut tunniunneqartunut iluanaarutininut procenti 0-iusussanngorlugu iluanaaruteqarnermut akileraarut inissinneqassasoq siunnersuutigineqarpoq. Kapitali 3 b-mi ilaasutut piginneqatigiiffiit pingaarnerusut iluanaarutininut tunniussinerni akileraarutigisassatut isertitaasa naatsorsugarinerini iluanaarutininut akiliuteqartartunut ingerlatseqatigiiffiit ilanngaateqartannginneranik tamanna takussutissiivoq. Siunnersuutip akileraarusersuinerimi attuisoqannginnissaa qulakkeerpaa, tassa sinneqartoorutit il.il. ingerlatseqatigiiffiutigisamit piginneqatigiiffik pingaarnerusumut akileraaruteqartinnagit nuunneqarsinnaassammata, tassanilu aningaasaleqqinnernut il.il. atorneqarlutik. Suliffeqarfissuup piginneqatigiiffik pingaarnerusumut aamma ingerlatseqatigiiffiutigisanut aqqissugaanera, taamaalilluni iluanaarutit akileraarusersornerininut sunniuteqarunnaassaaq. Ingerlatseqatigiiffiutigisat piginneqatigiiffik pingaarnerusut aamma qassit iluanaarutit aqusaassagaat apeqqutaajunnaarluni, ingerlatseqatigiiffiit tamarmik kapitali 3 b-mut ilaappata.

Ingerlatseqatigiiffiutigisami aktiat tassaapput aktiat aamma piginneqataassutit, piffissami iluanaarutit tunniunneqarnerini ukiumi ataatsimi aktianik imaluunniit piginneqataassutininik

minnerpaamik 25 procentinik pigineqartut. Ingerlatseqatigiiffiutigisap iluanaarutaasa akileraarusinnginnissaannut piumasaqaataavoq, piginneqatigiiffik pingaarnerusup Kalaallit Nunaanniinnissaa.

Iluanaarut aallaaviatigut aatsaat akileraaruserneqassaaq taanna inunnu imaluunniit inatsisitigut pisinnaatitaasunut, ingerlatseqatigiiffiutigisami iluanaarutinik akileraaruserneqanngitsunik tigusinissamut piumasaqaatinik naammassinninngitsunut tunniunneqarpat. Taamaalilluni siunertaavoq piginneqataasut inuttut atugassanngortillugit nuunneqarpata iluanaarutit tamatigut akileraaruserneqarnissaasa qulakkeerneqarnissaa.

Kapitali 3 b-mi ingerlatseqatigiiffinnut ilaasunut iluanaarutit taamaattumik naggataatigut marlunnu avillugit akileraaruserneqassapput: Siullermik ingerlatseqatigiiffimmi sinneqartoorut akileraaruserneqassaaq tullianilu piginnittumut tunniussat akileraaruserneqarlutik. Aaqqissuussinerup kingunerisaanik ingerlatseqatigiiffinnit iluanaarutinik aningaasaqarnikkut marloqiusamik akileraarusiisoqassaaq. Tamanna ingerlatseqatigiiffinnik akileraarusersuinermit suleriaasiuvoq nunarpassuarni atugaasoq.

Iluanaarut aamma Kalaallit Nunaanni avataaniluunniit najugaqartumut inatsisitigut pisinnaatitaasumut imaluunniit inummut tunniussisoqartillugu tamatigut akileraaruserneqartarpoq. Nunamili allami najugalik tiguisoq iluanaarutinit akileraarutaasut tamakkerlugu ilaannaanilluunniit utertoorsinnaavoq marloqiusamik akileraartarneq pillugu isumaqatigiissutaassusaaq apeqqutaalluni.

Danmarkimik, Savalimmiunik, Islandimik aamma Norgemik isumaqatigiissutaasut marloqiusamik akileraartarneq pillugu isumaqatigiissutit tamakku Kalaallit Nunaanni najugalittut ingerlatseqatigiiffik iluanaarutinik tunisisoq iluanaarutinut ilanngaateqartuunngitsosqaraangat iluanaarutit pillugit aalajangersakkanik makkuninnga imaqarput:

Marloqiusamik akileraartarneq pillugu isumaqatigiissutit atuuttut malillugit iluanaarutinut nunap akileraartitsisup akileraartitsisinnaanera pillugu takussutissiaq		
	Pisut allat	Piginneqatigiiffiit pingaarnerusut
Danmark	15 pct.	0 pct. Piginneqatigiiffik pingaarnerusoq minnerpaamik 25 pct.-imik piginneqataasoq
Savalimmiut	15 pct.	5 pct. Piginneqatigiiffik pingaarnerusoq minnerpaamik 10 pct.-imik piginneqataasoq
Norge	15 pct.	5 pct.

		Piginneqatigiiffik pingaarnersuq minnerpaamik 10 pct.-imik piginneqataasoq
Island	15 pct.	5 pct. Piginneqatigiiffik pingaarnersuq minnerpaamik 10 pct.-imik piginneqataasoq

Qulaani allaqqasuni marloqiusamik akileraartarneq pillugu isumaqatigiissutini tamani piumasaqaataavoq piginneqatigiiffik pingaarnersuq iluanaarutininik tunniussinerminni sivikinnerpaamik ukiumi ataatsimi ingerlatseqatigiiffiutigisami aktiaateqarnissaa piginneqataassuteqarnissaalu.

Ingerlatseqatigiiffiit kalaallit nunaanneersunit nunani pineqartuni piginneqatigiiffik pingaarnersuq iluanaaruteqartitsinerminni Kalaallit Nunaanni akileraarutit taamaallaat tassaalissapput ingerlatseqatigiiffiup akileraarutaa (25 pct), imaluunniit ingerlatseqatigiiffiup akileraarutaa (25 pct) aamma iluanaarutininik akileraarutit (0-5 pct.).

Marloqiusamik akileraartarneq pillugu isumaqatigiissutini piginneqatigiiffik pingaarnersuq iluanaarutininik inatsisitigut piginnittuunissaa (beneficial owner) aalajangersarneqarpoq. Taaguut OECD-mi isumaqatigiissutininut najoqqutassianik aallaaveqarpoq. Inatsisitigut piginnittuusunut assersuutigalugu Kalaallit Nunaannik marloqiusamik akileraartarneq pillugu isumaqatigiissuteqanngitsumi nunamiittumut piginnittuunissaa ingerlatseqatigiiffiutigisamit iluanaarutininik akileraaruserneqanngitsunik tigusinissaaq ingerlatitseqqinnissarlu siunertaralugu nunami pilersinneqartut ingerlatitseqqiffiusut ilaangillat. Iluanaarutisisoq iluanaarutininik utertoornissaaq pillugu noqqaanermi tiguisoq tamatumani aktianik inatsisitigut piginnittuulluni, piginneqatigiiffik pingaarnersuq piumasaqaatit, assersuutigalugu aktianik piginnittuunermut piffissap sivisussusissaa pillugu naammassinnilluni uppersaassaaq.

Tamatuma saniatigut aktianik il.il. niueruteqartoq, iliuuseqartoq imaluunniit nuussisoq, iluanaarutit imaluunniit piginneqataassutininik iluanaarutit akileraarusernerinik avaqqussinissamik siunertaqartut akileraaruseriffimmit qaangiinnagassaasarpot. Pissutsit apeqqutaatillugit nunani tamalaani atornerluinnginnissamut immikkut piumasaqaat (§ 69 a) naapertorlugu imaluunniit piviusuunissamik tunngaveqarneq naapertorlugu qaangiinnaasoqartarluni.

Aallarniummi allaaserineqartutut inatsimmi aktiaateqarluni imaluunniit piginneqataassuseqarluni ingerlatseqatigiiffittut nassuiarneqartut kapitali 3 b-mut ilaapput:

1. Aatsitassat pillugit inatsit, erngup nukingata innaallagissiornermut atornerqartarnera pillugu Inatsisartut inatsisaat imaluunniit sermip erngullu avammut nioqqutissatut

- atorneqarnissaat pillugu Inatsisartut inatsisaat malillugu iluaquteqarnissamut akuersissuteqartut. Piumasaqaataavoq aamma ingerlatseqatigiiffiup kaaviiartitaasa 90 pct.-t sinnerlugit akuersissummit ingerlaturanut tunngassasut.
2. Piginneqatigiiffiutigisaaq pineqartoq imaluunniit erngup nukingata innaallagissiornermut atorneqartarnera pillugu Inatsisartut inatsisaat malillugu iluaquteqarnissamik akuersissuteqartumut ingerlatseqatigiiffimmut suliffissuarmut atasoq ingerlatseqatigiiffik. Piumasaqaataavoq ingerlatseqatigiiffiutigisami imaluunniit suliffissuarmut atasuni ingerlatseqatigiiffimmi kaaviiartitat minnerpaamik 90 pct.-i nukimmik annertuumik pisariaqartitsisumik suliffissuarmi tunisassiorlumut imaluunniit nukissiornermi tunisassianik il.il. tunisassiorlumut erngup nukinganit nukissiorfimmiit nukimmik iluaquteqarnermeersumiissasut.
 3. Qanittumik ingerlataqassasoq. Aalajangersagaq aalajangersakkatut katersuiffiusutut iluseqarpoq, tassungalu ilaallutik qulaani taaneqartunut inuusutissarsiornikkut ingerlaturanut qanittut ingerlatat allat, assersuutigalugu umiarsualivimmik ingerlatsineq il.il. Piumasaqaataavoq nr. 1-imi ingerlatseqatigiiffik inatsisini taaneqartuni iluaquteqarnissamut akuersissuteqartumut ingerlatseqatigiiffiutigisaaq imaluunniit suliffissuarmut atasoq ingerlatseqatigiiffik.

Ingerlatseqatigiiffiit, nr. 1 aamma 2-mi piumasaqaatinik naammassinnittut, kapitali 3 b malillugu akileraartarnikkut suliarineqarnissamut inatsisitigut piumasaqaateqarput. Ingerlatseqatigiiffiit kapitali 3 b-mi malittarisassanut ilaaniarlutik, kiisalu tassunga uppernarsaatit pisariaqartut nassiuutissavaat, ingerlatseqatigiiffimmut ukiup aningaasarsiorfiup aallartinnissaa kingusinnerpaamik qaammat ataaseq sioqqullugu, akileraaruseriffimmut nalunaarutigissavaa, ukiumi aningaasarsiorfiusumi tassani kapitali 3 b-mi malittarisassat atorneqassappata.

Ingerlatseqatigiiffiit, suliffeqarfimmut attaveqarnissaaq pillugu siunnersuummi aalajangersakkamut ilaasut (nr. 3) tamanna sioqqullugu Naalakkersuisuniit akuersissuteqassapput. Akuersissuteqarnissamut aamma piumasaqaataavoq ingerlatseqatigiiffiup ingerlatai toqqaannartumik kalaallit nunaanni ingerlatseqatigiiffinnut unammillertuunnginnissai aamma kalaallinut atuisunut nioqqutissat il.il. tunisisoqassanngitsoq. Siunertaq tassaavoq ingerlatseqatigiiffik, atassuteqartumik ingerlataqartoq, ingerlatseqatigiiffinnut kapitali 3 b-mi malittarisassanut ilaatinneqarsinnaanngitsunut naleqqiullugu siunertarineqanngitsumik unammilleqatigiinnikkut iluaquserneqannginnissaata qulakkeerneqarnissaa.

Kapitali 3 b-mi malittarisassanut ilaanissaaq pillugu aalajangiineq piffissamut killiligaanngilaq. Taamaattorli aalajangiineq ukiuni aningaasarsiorfiusuni tulluuttuni 5-imi ingerlatseqatigiiffimmut pituttuivoq. Akileraaruseriffimmit suliarineqartussanik nikinneq akileraartitsinerlumut tunngasunik kingunerisassaqaarsinnaavoq, taamaattumillu nikinneq piffissami aalajangersimasumi naammaginatsumik pituttuiffiusariaqarpoq.

Kapitali 3 b-mut ilaanissamut piumasaqaatinik ingerlatseqatigiiffik naammassinnikkunnaarpat ingerlatseqatigiiffik kapitali 3 b-mi akileraartarnermiit anissanersoq pillugu akileraaruseriffik aalajangiissaaq. Akileraaruseriffilli pissutsinik immikkuullarissunik pissuteqartunik, imaluunniit sivikitsuinnarmik imaluunniit pingaaruteqanngitsumik iluseqartunik saneqqusinernut immikkut akuersissuteqarsinnaavoq.

Kapitali 3 b-mi malittarisassanut ilaalernermet aninermullu piumasaqaatit erseqqinnerusut akileraaruseriffimmit aalajangersarneqassapput. Kapitali 3 b malillugu akileraartarnermut isernermi aninermilu anguneqarsinnaasut siunertaanngitsumik akileraartarnikkut iluaqutit suujunnaarsinnissaannik siunertaqartunik piumasaqaatinik akileraaruseriffik aalajangersaasinnaavoq.

Kapitali 3 b-mi ingerlatseqatigiiffiit kapitali 3 b-mut ilaanngitsuni ingerlatseqatigiiffinni piginnittuuneq pineqartillugu pitsaaneruseqanngitsumik ajorneruseqanngitsumik inissinneqanngillat. Ingerlatseqatigiiffik kapitali 3 b-mut ilaasoq ingerlatseqatigiiffimmi allami nammineq kapitali 3 b-mut ilaanngitsumi piginneqataassuteqarpat ingerlatseqatigiiffiup aappaa tunniussinermi suli ilanngaateqarsinnaatitaassaaq. Ingerlatseqatigiiffik alla ullumikkutut iluanaarutinit akileraarutinit ilanngaanneqassaaq akiliillunilu. Taamaalilluni Kalaallit Nunaanni angerlarsimaffeqartuni ingerlatseqatigiiffinni allani piginneqataassutiniit ingerlatseqatigiiffiutigisami iluanaarutit akileraarusinnginnissaannut ammaassisoqanngilaq. Taamaalilluni ingerlatseqatigiiffiutigisami iluanaarutini akileraaruserneqanngitsunik tigusisinnaasut ingerlatseqatigiiffiit aamma ingerlatseqatigiiffiit iluanaarutinit taakkununga akileraarusersorneqartut akornanni naligiinngitsumik unammilleqatigiinnissaq akornuserneqarpoq.

Kapitali 3 b-mi ingerlatseqatigiiffiit ingerlatseqatigiiffiilu allat akornanni assersuussineq		
	Kapitali 3 b-mi ingerlatseqatigiiffiit	Ingerlatseqatigiiffiit allat il.il.
Piginneqatigiiffiup ilusaa(ilusai)	Aktiaateqarluni aamma piginneqataassuteqarluni ingerlatseqatigiiffiit inatsimmi § 1, nr. 3-mut ilaasut	Aktiaateqarluni piginneqataassuteqarlunilu ingerlatseqatigiiffiit, ingerlatseqatigiiffiit, atuisut peqatigiiffiit, peqatigiiffiit, aningaasaateqarfiit il.il. inatsimmi § 1, imm. 1, nr. 3, 4, 6 aamma 7-imut aamma nr. 10-mut ilaapput.
Iluanaarutit tunniunnerinut ilanngaatit	Iluanaarutinit ilanngaateqanngilaq	Aallaaviatigut iluanaarutinit ilanngaassisoqartarpoq

Ingerlatseqatigiiffinnik akileraarusiineq	25 pct.	25 pct.
Iluanaarutininik akileraarusiineq	24 pct. 14,67 pct., ingerlatseqatigiiffiup akileraaruseriffik kommunitut akileraartitsisartutut atussappagu. 0 pct., Kalaallit Nunaanni angerlarsimaffeqartumut kapitali 3 b-mi ingerlatseqatigiiffimmi ingerlatseqatigiiffiutigisamut iluanaarutit	42, 44 imaluunniit 36 pct. apeqqutaalluni ingerlatseqatigiiffiup akileraartarfia kommuni

2.2. *Akileraarutitigut amigartoorutit iluaqutiginissaannut piffissaliussap sivitsorneqarnera*
Malittarisassat atuuttut malillugit akileraaruserneqartussat aallaaviatigut amigartoorutit (akileraartarnikkut aningaasarsiat 0-imit minnerusut) ukiunut aningaasarsiorfiusunut tallimanut tulliuttunut nuussinnaavaat.

Aatsitassat pillugit inatsit imaluunniit sermimik imermillu aningaasarsiuqatigalugu iluaquteqarneq pillugu Inatsisartut inatsisaat malillugu akuersissummik nalunaarfigineqarsimasut ingerlatseqatigiiffiit pineqartillugit piffissatigut killiliisoqanngilaq.

Siunnersuutigineqarpoq amigartoorutininik akileraarutitigut iluaquteqarnissamut piffissaliussaq ukiunut qulinut sivitsorneqassasoq.

Ukiunut tallimanut piffissaliussaq ilungersunartuusinnaavoq pingaartumik ingerlatseqatigiiffinnut annertuumik aningaasaliiffiusunik aningaasaliisunut. Ingerlatseqatigiiffinnut taamatut ittunut ukiuni arlalinni piffissaq sanaartorfiusoq aallartisarfiusorlu pineqarsinnaavoq, isertitaqarfiulersumik ingerlataqalernissap tungaanut ingerlatseqatigiiffik amigartooruteqarluni ingerlalluni. Taamaattumik ingerlatseqatigiiffiup ukiunit siullermiit amigartoorut ukiumi aningaasarsiorfiusumi kingusinnerusumi ingerlatseqatigiiffiup aningaasarsiaanit akileraarutaasussanit ilanngaattit atorsinnaanagit.

Tunngaviusumik isiginninnermiit amigartoorutit pillugit akileraartartoq ilanngaateqartariaqaralarpoq, amigartoorutit piviusumik akileraartartup aningaasartuutaanit

ilanngaatigineqarsinnaasunut tunngasuuppata, soorlu ingerlatsinermit aningaasartuutit, akissarsianut aningaasartuutit, erniat sanaartormilut aningaasartuutit nalikilliliinermut pissutaasut.

Paarlattuanik akileraaruseriffiup ileqquusumik akileraaruseqqissinnaalerni ukiuni aningaasarsiorfiusunit siuliinit tallimanit siusinnerusumiit ukiumit amigartoorutit nuunneqarsinnaappata naapertuuttoqarunnaassalluni. Paasineqarpat amigartoorut pisinnaatitaaffiunngitsoq, immikkut ittumik inissiinissamut piumasaqaatit naammassineqarsinappata ukioq amigartoorfiusooq qaqeqqinneqarsinnaavoq.

Angissusiliinissamut akileraaruseriffiup periarfissaanut naapertuuttoqarnissaata qulakkeerneqarnissaa eqqarsaatigalugu siunnersuutigineqarpoq ileqquusumik qaqitseqqinnissamut piffissaliussaq amigartoorutit iluaqutiginerata kingorna ukiunut marlunnut kinguartinneqassasoq.

Tusarniaanerp kingornatigut sivitsukkatut qaqitseqqinnissamut killiussamut tunngatillugu siunnersuummi aalajangersakkat Akileraaruserinermik ingerlatsineq pillugu Inatsisartut inatsisaata allangortinnissaa pillugu Inatsisartut inatsisissaattut siunnersuummut, 2023-mi ukiakkut ataatsimiinnermi oqaluuserineqassasutut aamma naatsorsuutigineqartumut nuunneqarpoq. Tamatumunnga patsisaasoq tassaavoq aalajangersakkat sammisarisaannut tunngatillugit inatsimmut tassunga atasuunerat.

Aammattaaq siunnersuutigineqarpoq amigartoorutit pilerfianut ukiunut aningaasarsiorfiusunut naatsorsuutitigut atortut attuumassuteqartut toqqorneqarnissaannut ingerlatseqatigiiffik pisussaaffilerneqassasoq, ukiumoortumillu amigartoorut pillugu paasissutissanik akileraaruseriffimmut nalunaaruteqartartussanngortillugu.

Ullumikkut amigartoorut pillugu piffissaligaanngitsumik siumut nuussisinnaasunut ingerlatseqatigiiffinnut allannguisoqanngilaq.

2.3. Annikitsumik aningaasaliinermut killiliussamik oqilisaassineq

Ernianut aningaasalersuinermilu aningaasartuutit Kalaallit Nunaanni aningaasarsiat akileraarutaasussat annikillisinniarlugit imminut iluaquserniarluni akileraartarnermik pilersarusiornermut atasumik atorneqarsinnaapput. Tamanna pisinnaavoq aningaasaliisup Kalaallit Nunaanni ingerlatseqatigiiffimmi akiitsulimmi aningaasaliineratigut (akiitsut nakkutigineqartut), Kalaallit Nunaanni ilanngaatigineqarsinnaanngitsut, erniatigullu isertitat toqqaannartumik imaluunniit toqqaannanngitsumilu nunami appassisumik akileraarfiusumut nuunneqarlutik.

Taamatut atornerluinerit akiorniarlugit aningaasarsianut akileraarutit pillugit inatsisartut inatsisaata allangortinnera pillugu inatsisartut inatsisaatigut nr. 11 2007-imeersumi § 36 c 2007-imi ikkunneqarpoq. Aalajangersakkap siunertaa tassaavoq ingerlatseqatigiiffinnik annikitsumik aningaasaliinermut pinngitsoortitsinissaq. § 36 c malillugu 5 mio. kr.-t sinnerlugit

nakkutigineqartumik akiitsunut erniatigut aningaasartuutit iluanaarutillu ilanngaaffigineqarsinnaapput. Akiitsunut nakkutigineqartunut ilaapput illuatungeriit soqutigisaqatigiinnikkut atassuteqartut akornanni taarsigassarsiat. Tamanna assersuutigalugu tassaasinnaavoq ingerlatseqatigiiffiit marluk marluullutik assigiimmik piginnittumit nakkutigineqartut akornanni taarsigassarsiat.

Ingerlatseqatigiiffimmi nammineq aningaasaatit aamma allat aningaasalersuinerat 2:1-imik sippuippat ilanngaatinik ilanngaasoqartarpoq. Nammineq aningaasaatit assersuutigalugu 100 mio. kr.-uppata allat aningaasaliissutaat annertunerpaatut 200 mio. kr.-ussapput. Tamanna qaangerneqarpat erniat pillugit ilanngaateqarsinnaaneq pisinnaajunnaartarpoq, kiisalu nakkutigineqartumik akiitsut ilaannit sinneruttut nalikilliliinermi ilanngaatit. Akiitsut nakkutigineqartut ilai sinneruttut pissutsip 2:1-ip pilerseqqinneqarnissaanut nammineq aningaasaatinut allangortinneqarsinnaasut akiitsut nakkutigineqartut ilaatut naatsorsorneqassapput.

Aningaasalersuisinnaasunit uparuarneqarpoq § 36 c-mi annikitsumik aningaasalersuinermi malittarisassaq atuuttoq tulluurtumik aningaasaatit aaqqissuunnissaannut killiliisoq. Nammineq aningaasaatit allamiullu aningaasalersuinerisa akornanni pissutsit appasinnerusut eqaannerusumik aningaasalersuinissamut periarfissiipput taamaalillunilu eqaannerusumik aningaasaatit aaqqissuunnissaannut. Assersuutigalugu attaveqaatitigut ingerlatanut sivisuumik atasinnaasunut aamma patajaatsumik ingerlatsinikkut isertitaqarfiusunut nalinginnaasuvoq aningaasaatitigut pisariaqartitat tamarmiusut pingajorarterutaannit marlunnit annertunerusumik akiitsunik aningaasalersuisarneq.

Siunnersuutigineqarpoq nammineq aningaasaatit allamiullu aningaasalersuinerisa akornanni "2:1" "4:1"-imut oqilisaaffigineqassasoq. Aalajangersagaq oqimaaqatigiissitsiarnermut takussutissaavoq, tassa allamiut aningaasalersuinissaannut inatsisigut akuerisaasumik niuernikkut tunngavilersorneqartumik ingerlatseqatigiiffiit tamavimmik pisariaqartitsisarmata.

Piumasaqaat taamaalilluni Europami nunani allani piumasaqaatinut naapertuutilersinneqarpoq. Takuneqarsinnaavoq ataaniittumi takussutissiami nunat annikitsumik aningaasalersuinermit malittarisassaateqartut pissutsit amerlanertigut 4:1-imittartoq, ilaatigulli qaffasinnerusarluni appasinnerusarluniluunniit.

Europami aamma USA-mi annikitsumik aningaasaliinermut malittarisassat pillugit takussutissiaq (2021)	
Nuna	Pissutsit
Belgien	intragroup-imik taarsigassarsinermut 5:1 Piginneqataasunut, pisortanut il.il. taarsigassarsinernut 1:1
Danmark	4:1

Letland	4:1
Litauen	4:1
Luxembourg	85:15 (Imatut allanngortinneqarsinnaavoq: 5,67:1)
Slovenia	4:1
Schweiz	Aap, piginneqataassutip qanoq ittuunera apeqqutaatillugu
Tjekkiet	4:1 Aningaasaqarnikkut suliffeqarfinnut aalajangersimasunut 6:1
Tyskland	Taarsigassarsisitsisup uppersarsarsimavaa nammineq aningaasaatini pissutsit suliffeqarfissuaq immikkoortortalimmut naleqqiullugu 3 pct. pointinit appasinnerunngitsut.
Tyrkia	3:1 Aningaasaqarnikkut suliffeqarfinnut 6:1
Ungarn	Juni 2016 tikillugu taarsigassarsianut 3:1 EBITDA-mi malittarisassanit taarserneqartoq
USA	1,5:1
<i>Najoqqutaq: https://taxfoundation.org/thin-cap-rules-in-europe-2021/ Aningaasaqarnermut Naligiissitaanermullu Naalakkersuisoqarfik suliarinnittoralugu USA-mullu tunngasut paasisutissat ilanngunneqarlutik.</i>	

2.4. Erniat akileraarusersorneri (nunami allami akiligassaqaqfimmu ernianut akilerneqartunut akileraarutini akiliineq)

Taarsigassarsisitsisoq akiitsortimut Kalaallit Nunaanni ernianut aningaasartuutitut ilanngaategineqarsinnaavoq. Nunami appasissumik akileraarfiusumi najugaqartumit nunamit allamiunit aningaasaliisartumit taarsigassarsisitsisoqarpat taakku malitsigisaannik ernianik akilersuineq Kalaallit Nunaanni ingerlatseqatigiiffiup akileraarusersorneqarnerata appartinnissaannut atorneqarsinnaassapput aamma sinneqartoorutit akileraaruserneqarnatik nunanut allanut nuunneqarsinnaallutik.

Tamatununga pissutaavoq taarsigassarsiat taarsigassarsisumut Kalaallit Nunaanni ernianut aningaasartuutitut ilanngaateqartitsisinnaanerata. Nunami appasissumik akileraarfiusumi najugaqartumit akiligassaqaqfimmu, ernianit isertitanik akileraarusersuinngitsumit imaluunniit artornanngitsorujussuarnillu akileraaruteqartitsisumit taarsigassarsisitsisoqarpat nunami allami taarsigassarsineq tassungalu atasut ernianik akilersuinerit Kalaallit Nunaanni ingerlatseqatigiiffiup akileraarusersornerata annikillisarneranut atorneqarsinnaassapput sinneqartoorutillu nunanut allanut nuullugit.

Taamaattumik siunnersuutigineqarpoq nunami allami akiligassaqarfimmut ernianik akilersuineranut ernianut akileraarutitik ilanngaassinissamut akiliinissamullu pisussaaffilerneqassasoq.

Erniat akileraarusersorneri annikitsumik aningaasalersuineq pillugu § 36 c-mi oqilisaassinissatut siunnersuummut atatillugu isigineqassaaq.

Inatsisini atuuttuni aalajangersagaqanngilaq Kalaallit Nunaanni ernianit isertitat pillugit akiligassaqarfik akileraartussaataalluni. Akiligassaqarfik nunani allani najugaqarpat akiligassaqarfik Kalaallit Nunaanni akileraartarnermi inatsisaasuni ernianit isertitanit akileraarutitik akileeqquneqarsinnaanngilaq. Nuussinerit nakkutigineqartut pillugit § 36 a-mi aamma annikitsumik aningaasalersuineq pillugu § 36 c-mi maannakkut malittarisassat taamaallaat nunami maani ilanngaateqarsinnaatitaanermik killeqartitsinissamut periarfissiipput, imaluunniit nuussinerit nakkutigineqartut pineqarpata akiligassaqarfiup aningaasarsiaanik akileraarutaasussanik iluarsiinissamut.

Aamma nakkutigineqartumik akiitsutigut pissutsit avataanni tulluarsinnaavoq erniani akileraarusersisarneq eqqunneqarpat taamaalillunilu nunani annikitsumik akileraarfiusuni taarsigassarsinnaaneq annikillisillugu. Taamaalilluni Kalaallit Nunaanni akileraartarneq avaqunniarlugu nunani akileraarutikinneruffiusuni taarsigassarsinissamut periarfissat annikillisinneqassapput.

Siunnersuut taamaallaat inatsisitigut pisinnaatitaasunut pisussaataitaasunullu atuuppoq taamaalillunilu inunnuunngitsoq, tassunga ilanngullugit inuussutissarsiuteqartut namminersortut. Siunnersuut taamaallaat nunanit allaniit taarsigassarsianut atuuppoq. Tassani ernianit akileraarutit ilanngaatiginissaat pillugu aallaaviusumit arlalinnik ilaatinneqanngitsut atuupput.

Siunnersuummut ilaatigut ilanngillat erniat, marloqiusamik akileraartarneq pillugu Kalaallit Nunaannik isumaqatigiissuteqarfiusuni nunani najugaqartut, tamanna malillugu ernianit akileraarusersuisinnaaneq atorunnaarluni imaluunniit oqilisaaffigineqarluni. Aammattaaq ernianut akileraarusersuinissamut siunnersuut atuunnani, akiligassaqarfik nunamini angerlarsimaffigisamini minnerpaamik 15 procentinik akileraarummik ernianit isertitat akileraarusersornerinik akiligassaqarfik uppersaasannaappat. Akigititap taassuma aalajangersarneqarnerani nunani tamalaani suliffeqarfissuarnut immikkoortortalinnut minnerpaamik akileraarusersuinissatut naatsorsuutigisaq tunngavigineqarpoq OECD-p saqqummiussaani malittarisassat 2-t ataani.

Tusarniaanermut akissutit takkuttut taakku tunngavigalugit ikaarsaariarfittut aaqqiissut ilanngunneqarpoq, tassaniilluni ulloq 1. januar 2024 sioqqullugu taarsigassarsiat. Taamaattorli taarsigassarsiat nakkutigineqartut ikaarsaariarnermut aaqqissuummiinngillat.

2.5. Ingerlatseqatigiiffinnut nalikilliliinermi malittarisassanik allanngiineq

Ingerlatseqatigiiffinnut nalikilliliinermut malittarisassiani allannguuteqassasoq siunnersuutigineqarpoq. Allannguutit ingerlatseqatigiiffiit akileraarusersornerini annertunermik atassuteqannginnissamik ilalersuissapput.

Illunik, umiarsuarnik timmisartunillu tunisinermi iluanaarutaasunik ingerlatseqatigiiffiup pineqartutut iluseqartumik pigisaani nalilinni nalikilliliiffigineqarsinnaasuni § 22, imm. 5 malillugu ingerlatseqatigiiffiit nalikilliliisnaatitaapput. Taamaalilluni aningaasarsianut akileraarutaasussanut iluanaarutit ilanngunneqarnissaat ingerlatseqatigiiffimmit kinguartinneqarsinnaapput, ingerlatseqatigiiffik pineqartutut iluseqartunik allanik pigisaqarpat nalilinnik aamma ukiumi tunisiffiusumi sulit tamakkiisumik nalikillineqanngitsunik.

Iluanaarutit nalikilliliineq pillugu malittarisassap atorunnaarsinnissaa siunnersuutaavoq. Malittarisassap kingunerisaanik pigisat nalillit sinneruttut akileraarutitigut nalingisa appartinnissaanut iluanaarutit atorneqarsinnaallutik, tassunga ilanngullugu pigisat nalillit naatsorsuutitigut nalingi inorlugit. Piviusumik tassani pineqarpoq akileraarutitigut tapiissutit, pingaartumik ingerlatseqatigiiffinnut angisuunut illunik, umiarsuarnik timmisartunilluunniit nalikilliliiffigineqarsinnaasunik arlalinnik piginnittunut iluaqutaasinnaasut.

Taarsiullugu siunnersuutigineqarpoq pissarseqqinneq pillugu malittarisassat inatsisinik tungavissaqartinneqalissasoq. Malittarisassat atuuttut malillugit akileraartarnermi nalikilliliinerit il.il. pillugit Namminersornerullutik Oqartussaata nalunaarutaanni nr. 30, 1. december 2006-imeersumi § 12-mi periarfissamik malinnippoq. Malittarisassaq taanna malillugu ingerlatseqatigiiffik ukiumi aningaasarsiorfiusumi tassani imaluunniit tulluuttuni taamaaqataanik pigisamik pisisimappat (pissarseqqinneq) pigisamik tunisinermi iluanaarutaasut ilanngullugit ingerlatseqatigiiffinnit mininneqarsinnaapput.

Taamaalilluni pigisamik tunisinermi iluanaarutaasumut ingerlatseqatigiiffik akileraaruserneqassanngilaq, siunertaq tassaappat iluanaarut pigisap taamaaqataanik pisinissamut atorneqassasoq. Piumasaqaataavoq pigisamut pissarsiareqqinneqartumut pisiap naliga akileraartarnermi iluanaarutit tamarmiusut ilanngaaticigineqarsinnaanerit.

Nalunaarummi § 12 malillugu tamanna taamaallaat pisinnaavoq akileraaruseriffimmiit akuersisoqarneratigut. Siunnersuutigineqarpoq malittarisassaq kinaassusersiorfiussanngitsoq, taamaalilluni ingerlatseqatigiiffik akuersissut pillugu qinnuteqarnissaa piumasaqaataajunnaarluni. Ingerlatseqatigiiffiup siunnersuut malillugu ukiumi tunisiffiusumi nammineq nalunaarummi atoqqiisoqarsimasoq taamaallaat allattussaavaa. Siunnersuut taamaalilluni akileraaruseriffimmut ingerlatseqatigiiffinnullu allaffissornikkut artukkiisut annikillisinnissaannut iluaqutaavoq.

Aammattaaq siunnersuutigineqarpoq malittarisassanut atuuttunut naleqqiullugu pissarseqqinnermut piffissatigut piumasaqaammik oqilisaassisoqassasoq. Siunnersuutigineqarpoq pigisap nutaap

tunniunneqarnera pillugu isumaqatigiissut atsiorneqarsimasoq naammattoq, pigisarlu ukiup tunisiffiusup kingorna ukiut aningaasarsiffiusut kingusinnerpaamik pingajuanni tunniunneqarsimassasoq.

Siunnersuutikkut erseqqissarneqarpoq pissarseqqinnermi pineqartoq assinganik siunertaqartumik ingerlatseqatigiiffimmullu suliap assinganik isumaginnittumik pigisami ingerlatseqatigiiffik pissarsisimasoq.

2.6. Sulisitsisumit akilerneqartut angalanerit akileraarutaannginnissaat

Inatsimmi § 13 malillugu aningaasarsianut akileraarutaasussanik aningaasarsiat tamarmik ilaapput. Taamaalilluni aamma inuussutissat namminerlu iluaqutissat akileraartartup tigusimasai.

§ 19 b, Inatsisartut inatsisaatigut nr. 11, 1. november 2021-imeersukkut ikkunneqartoq malillugu sulisitsisup atorfeqartumut akiligaanut angalanernut atorfeqartut akileraartinneqarput, aamma atorfeqartup nammineq soqutigisaani ingerlanneqartuni, assersuutigalugu feeriani, qaangiuttoornermut taarsiullugu sulinngiffeqarneq, sulinngiffeqarallarneq, angerlarsimaffiup suliffiullu akornanni assartuineq. Atorfinitsitsinermi pissutsini inuit saniatigut aalajangersakkamut ilaapput siulersuisuni ilaasortanut, kommunalbestyrelsimi ilaasortanut kiisalu ataatsimiititaliani aalajangiisartunilu il.il. ilaasortanut akiliussilluni angalanerit.

Atorfeqartut il.il. angalanermut sulisitsisup aningaasartuutigisaanut akileraaruteqartinneqarput, imaluunniit 19 b, imm. 2-mi akigititat aalajangersarneqartut malillugit. Akigititat taamaalillutik nalinginnaasumik akigititatut iluseqarput peqatigisaanillu Kalaallit Nunaata iluani ornittakkanut angalanernut, Københavnimut angalanernut kiisalu Kalaallit Nunaanniit/Nunaannullu toqqaannartumik timmisartukkut atassuteqarfiusunut ornittakkanut allanut minnerpaamik akiullutik.

§ 19 b, imm. 3 malillugu akiliunneqarluni angalanerit ilaannakuusumik akileraaruserneqarput, tassa imaappoq angalaneri annertuutigut inuinnarnut tunngasuusut. Akileraartarnermut Aqutsisoqarfik 2023-mut Aningaasanut inatsimmi oqaasertaliussami akileraarusiinermi aalajangersakkap taassuma ilaatinnginnissaanut piginnaatinneqarpoq, taamaattumik aalajangersagaq atorunnaarsinneqarsimalluni.

§ 19 b, imm. 4 tassaavoq imm. 1-2 aallaavigalugit ilaatitsinngitsoq. Aalajangersagaq taanna malillugu atorfeqartup nalinginnaasumik najugaqarfianiit utaqqiisaasumik suliffigisamut imaluunniit aalajangersimasumik suliffigisamut, atorfeqartup piffissami suliffiunngitsumi uninngavigisinnaanngisaanut angalanernut, angalanermut ataatsimut 2.000 kr.-nik atorfeqartoq akileraaruteqartinneqarpoq.

Tassunga assersuutigalugu ilaapput aatsitassarsiorfinni atorfeqartut aamma illuliornerni sanaartornernilu anginerusuni atorfeqartut.

Siullermik siunnersuutigineqarpoq § 19 b atorunnaarsinneqassasoq. Aappaatut siunnersuutigineqarpoq § 34, nr. 15-imut litra a nutaaq ilanngunneqassasoq, sulisitsisumit akilerneqartut angalanerit akileraarusersorneqassanngitsut. Tassani siunertaq tassaavoq akileraartarnermik aaqqissuussinerup eqaannerulersinnissaa aamma suliffeqarfimmi nuttarsinnaanerulernermit iluaqutaanissaa.

Siunnersuummut ilaapput angalanerit sulisitsisunit akilerneqartut, angalanermi siunertaq tassaalluni angerlarsimaffiup suliffiullu akornanni atorfeqartup sulinngiffeqarnera, angalanera imaluunniit inuinnartut siunertat allat. Aalajangersakkamut ilaapput atorfeqartumut il.il. namminerlu angalanermi aningaasartuutit, kisianni atorfeqartup ilaqutaanut il.il. sulisitsisup akilersimasinnaasai angalanerit pinnagit. Taamatut angalanermi aningaasartuuteqarneq suli atorfeqartumut akileraarutaassaaq, atorfilinnut malittarisassat atuuttut malillugit sulinngiffeqarluni akiliunneqarluni angalanerit akileraarutaasussaannngitsut pineqanngippata. Atorfeqartut ukiumut ataasiarlutik sulinngiffeqarnermi akiliunneqarluni angalanernut akileraarutaasussaannngitsunut atorfeqartut pisinnaatitaaffiannit allannguisoqanngilaq.

Atorfinitinneqarnermi pissutsiniittut inuit saniatigut aalajangersakkamut ilaapput siulersuisunit ilaasortat aamma siulersuisunut ikiortit, kommunalbestyrelsini, Inatsisartuni, Naalakkersuisunit ilaasortat, kiisalu siunnersuisoqatigiinni aalajangiisartunilu il.il. ilaasortat.

Siunnersuutip kingunerinngilaa § 24 malillugu sulisitsisup ilanngaateqarsinnaanerata annertusinera. Aalajangersagaq malillugu ingerlatsinermi aningaasartuutinut ilanngaateqartoqarsinnaavoq, tassunga ilanngullugit nalinginnaasumik sulisunut aningaasartuutit, kisiannili assersuutigalugu atorfeqartumut imaluunniit piginnittumut namminermut inuttut aningaasartuutit iluseqartunut aningaasartuutinut ilanngaateqartitsisoqarnani. Sulisitsisoq assersuutigalugu atorfeqartumut aningaasartuuteqarnermut ilanngaateqassanngilaq, imaluunniit ingerlatseqatigiiffimmit sulisunut pingaarnertut piginneqataasunut, nunarsuaq kaajallallugu angalaneq tunissutigineqarpat imaluunniit angalaneq taamaaqataa, pineqartumut pisumut nalinginnaasut sinnerlugit allanut naleqqiullugu annertuumik tunissutit iluseqarpat.

2.7. Akissarsianik uninngatitsinermut qummut killiliussamik naleqqussaaneq

Innuttaasoq akileraarnermi aningaasanik akilinngitsuugaqarsimappat § 101 malillugu akileraaruseriffiup sulisitsisoq peqqusinnaavaa atorfeqartup akissarsiaata ilaanik uninngatitsissasoq, akilinngisat akilersornerinut akileraaruseriffimmut akilerneqartussat. Taamatut akissarsianik uninngatitsineq Kalaallit Nunaanni eqqartuussisarnermi inatsimmi malittarisassat naapertorlugit pissaaq. Assersuutigalugu akiitsoqartoq naammaginartumik inuuniuteqarnissaanut naammattumik aningaasassaqaarnissaanit annertunerusunik uninngatitsisoqassanngilaq.

Tamatuma saniatigut § 101, imm. 6, oqaaseqatigiit aappaanni atuuttumi akissarsiatigut uninngatitsinissamut qummut 30 pct.-imik killeqartitsisoqarpoq. Taamaaqataani killeqartitsineq

tassaavoq Kalaallit Nunaannut eqqartuussisarnermut inatsimmi § 625, imm. 2-mi "pingajorarterut" (1/3).

Assigiinngissutaasoq ullumikkut akileraaruseriffiup akiliisitsiniarnermik suliaqarnerata aaqqissuunneranik ilungersortitsivoq. Taamaalilluni akissarsiatigut uninngatitsinerup annertussusia pillugu nalornisoqartarpoq, akiitsut tamarmiusut tassaappata akileraarutitigut piumasaaqaatit piumasaaqaatillu allat, akileraaruseriffik, qitiusumik akiliisitsiniarnermi oqartussaasoq, Kalaallit Nunaanni eqqartuussisarnermik inatsimmi malittarisassat malillugit akissarsiatigut uninngatitsisoqaraangat.

Taamaattumik siunnersuutigineqarpoq inatsimmi kisitsit eqqartuussisarnermi inatsimmissulli inissinneqassasoq. Siunnersuut akileraaruseriffiup akiliisitsiniarnikkut suliaasaqarfiani assigiiaartumik suleriaatsip aalajangersarnissaanut iluaqutaavoq, taamaalilluni akissarsianik uninngatitsinerup apeqqutaanani pissarsiassat qanoq ittut pineqarnerut.

3. Pisortanut aningaasaqarnikkut allaffissornikkullu kingunerisassat

Siunnersuummi aningaasaqarnikkut kingunerisassanut ataatsimut isiginniffik:

	Iluanaarutinut tunngasutut kingunerisinnaasat
Ingerlatseqatigiiffiutigisat iluanaarutaat, aamma ingerlatseqatigiiffiutigisat aalajangersimasut iluanaarutaannik ilanngaateqarnissamik pisinnaatitaaffimmik atorunnaarsitsinerit.	Aningaasaqarnikkut kingunerisinnaasat missiliuutigineqarsinnaanngillat, annikitsuussaneralli naliliissutaavoq.
Akileraaruteqarnermut tunngasutut amigartoorutaanerata iluaqutiginissaanut killiliussamik sivitsuineq.	Missiliorneqarsinnaanngilaq.
Annikitsumik aningaasalersuisarnermut killigitap oqilisaaviginera.	Missiliorneqarsinnaanngilaq.
Ernianik akileraarusersuineq.	Missiliorneqarsinnaanngilaq, annikitsuussasulli nalilersuutaapput.
Ingerlatseqatigiiffinnut nalikilliliinermut malittarisassianik allanngortitsinerit.	Missiliorneqarsinnaanngilaq.
Sulisitsisup akiligaatut angalanernut akileraaruteqartitsinnginneq	-1 mio. kr.

Aningaasarsianik ilanngaassisinnaanermut annertunerpaatitatut killigititanik assigiissaarinerit.	Malunnarnerusumik kinguneqassanngilaq.
Katillugit:	-1 mio. kr.

Siunnersuutikkut akileraaruseriffiup suliassa qarfiit ilaanni nakkutilliinikkut suliassai aamma suliassat nutaat ilanngunneqarput, ingerlatseqatigiiffiit akileraartarnerinik aqutsineq pisariunerulersillugu. Suliassa qarfiit ilaanni allaffissornikkut suliassanik, soorlu, akeqanngitsumik angalanerni aamma pissarseqqinnerni pisariillisaanertaqarpoq. Naatsorsuutaavoq siunnersuummut allaffissornikkut aningaasartuutit ukiumut ataatsimut sulianut katillugit annertussuseqartut, tamatumani ingerlatseqatigiiffiutigisanit iluanaarutit il.il. pillugit siunnersuut ukioq affarmut suliatut annertussuseqarluni, kiisalu ingerlatseqatigiiffiit akileraartarnikkut nakkutigineqarnerunerat ukioq ataaseq aamma affartut annertutigaluni. Tamatuma saniatigut ataani allaqqasut innersuutigineqarput. Annertunerusumik aningaasartuutit 1 mio. kr.-nut naleqqiullugit ikinnerussasut missiliuutigineqarput. Taamaattorli naatsorsuutigisatut annertunermik aningaasartuut erseqqinnerusumik missiliuutigineqarsinnaanngilaq apeqqutaammat kapitali 3 b-mi malittarisassianik atuiniartutut ingerlatseqatigiiffiit qanoq amerlatigissanerat.

Akileraaruseriffiup ingerlatseqatigiiffiit akileraartarnerat pillugu qarasaasiatigut atortorissaarutai, tamatumani piffissaq ungasinnerusoq isigalugu, ingerlatseqatigiiffiit akileraartarnerani suliniut, tamatumunnga ilanngullugu manna siunnersuut ilapittorneqassappata, taarserneqartariaqassapput. Maanna aaqqissuussaq pisariippoq ullumilu paasissutissanik nalunaarsuinnermut piunasaqaatinik, kiisalu piginnittunik nalunaarsuinnermut qaffasinnerusumik piunasaqaammik qularnaarnissamut, pissarsianik, isumakkeerinernik, amigartoorutinik nalunaarsuinnermik aamma naatsorsukkanik il.il. atornissamut naapertuunnani. Ukiuni qanittuni aqutsisoqarfiup qarasaasiakkut aaqqissuussaananerata taarserneranut aningaasaliisoqartariaqartoq naatsorsuutigisariaqarpoq.

Ingerlatseqatigiiffiutigisani iluanaarutit ingerlatseqatigiiffiutigisanilu iluanaarutitut aalajangersimasunut ilanngaateqarsinnaanerup atorunnaarsinnera

Siunnersuutip kingunerisaanut annertuutigit tunngavigineqarput Kalaallit Nunaanni aningaasaliisinnaasut qanoq pilerilersinneqassanersut, aamma kapitali 3 b-mi malittarisassanik atuinnissamik ingerlatseqatigiiffiit toqqaassanersut. Taamaattoqarnersoq siumut oqaatigineqarsinnaanngilaq.

Siunnersuut iluanaarutinin akileraaruteqartitsinermit iluanaarutitigut annertuumik appartoqarneranik kinguneqassasoq naatsorsuutigineqanngilaq, tassa siunnersuut aatsitassarsiornermi erngullu nukinganik nukissiornermi ingerlatanut, kiisalu sermimik imermillu aningaasarsiutigalugu iluaquteqarneq pillugu Inatsisartut inatsisaata ataani ingerlatanut killeqartinneqarmat. Ullumikkut aatsitassarsiornermi iluaquteqarnissamut akuersissutit ingerlasut ikittuinnaapput ingerlataniillu taakkunanit iluanaarutinit akileraarutitigut iluanaarutit annertusimanatik.

Kapitali 3 b-mut ilaasoq kalaallit nunaanni piginneqatigiiffik pingaarnersooq aqputigalugu aningaasaliinerit pineqarpata ingerlatseqatigiiffiutigisamit iluanaarutit iluanaarutit akileraaruserneqassanngillat. Tamanna ingerlatseqatigiiffiit qaffasinnerusumik akileraarusersornerinit illuatungilerneqassaaq. Piginneqatigiiffiit pingaarnersunut piginnittuunngitsunut inummut aamma inatsisitigut pisinnaatitaasunut pisussaataitaasunullu iluanaarutinin tunniussinermit piffissami iluanaarutinin akileraarut 24 imaluunniit 14,67 pct. ilanngaatigineqassaaq. Pisuni taakkunani siunnersuutip kingunerisaanik kommunini katillugit 44-mik akileraarutinin procentilimmi angerlarsimaffeqartunut ingerlatseqatigiiffiup iluanaaruteqartitsisup akileraarutaanik annikitsumik oqilisaasoqassaaq, kommuninilu akileraartitsisuni allani angerlarsimaffeqartunut ingerlatseqatigiiffinnut akileraaruseriffeqartunut annikitsumik qaffaasoqassalluni.

Siunnersuutip kinguneraa Kalaallit Nunaata marloqiusamik akileraartarneq pillugu isumaqatigiissuteqarfigisaani nunani aalajangersimasuni piginneqatigiiffiit pingaarnersunut tunniunneqartunut iluanaarutit akileraarutai annikillissapput. Kalaallit Nunaanni akileraarusiineq isumaqatigiissutit ilaasa kingunerisaanik 35 pct.-imit ingerlatseqatigiiffiup akileraarutaanut annikillissaaq imaluunniit $((0,25 + ((1-0,25)*0,05))*100=)$ 28,75 pct.-iussalluni, nunatut akileraartarfittut Kalaallit Nunaanni akileraarusiineq 5 pct.-iuppat.

Nunatut akileraarfiusutut Kalaallit Nunaanni akileraarusiinissaaq 15 pct.-iuppat siunnersuutip kingunerisaanik akileraarut annikitsumik qaffalaassaaq, tassa 35 pct.-init $((0,25 + ((1-0,25)*0,15))*100=)$ 36,25 pct.-imut qaffassammat.

Siunnersuummut atasumik allaffissornikkut aningaasartuutit naatsorsuutigineqarput killeqassasut, siunnersuummi ingerlatseqatigiiffiit ikittuinnaat pineqassammata. Naliliisoqarpoq aaqqissuussineq ukioq naallugu sulisoq affaq inorlugu pisariaqartitsissanngitsoq, tassa naatsorsuutigineqartariaqarmat ingerlatseqatigiiffiit pineqartut ikittuararsuusut.

Siullermik aaqqissuussineq siunnersuutigineqartoq aaqqissuussinerni pioreersuni aqunneqarsinnaassasoq, qarasaasiat il.il. ineriartortillugillu ingerlannerinut qaavatigut annertunngitsumik aningaasartuuteqarnani. Kingornatigut allaffissorneq nalilerneqarpoq assaat

atorlugit ingerlanneqassasoq, taamaattumik naliliisoqarluni tamatuma kingunerisaanik ukiup affaanut sulisumut sulii allamut aningaasartuuteqartoqassasoq.

Ukiuni tulluittuni Akileraartarnermut Aqutsisoqarfimmi isumalluutininik atuinissap killeqartinneqarnissaa eqqarsaatigalugu siumut sammisumik ingerlatseqatigiiffinnut aaqqissuussinermut ilaasunut ingerlatseqatigiiffinnut atortussamik nutaamik ineriartortitsinissamut aningaasaliisoqartariaqassaaq. Tassaniilluni ilaatigut iluanaarutininik utertitsisarnermik aaqqissuussinermik qaffasinnerusumik annertussuseqartumik atorneqarnissaata eqqarsaatiginerani nakkutilliinissap qaffannissaa. Tamanna, allatigut aaqqissugaanerit nutaat ilanngukkaanni, naatsorsuutitigut piginnittullu pillugit paasissutissanik nalunaarutigineqartuninik nakkutilliinissamut Akileraartarnermut Aqutsisoqarfiup periarfissaanut piumasqaatinik qaffassaaq.

Akileraarutitigut amigartoorutit iluaqutigineqarnissannut piffissaliussap sivitsorneqarnera
Piffissaliussap sivitsorneranut atasumik aningaasartuutissat qanoq ikkumaarnersut missilioruminaapput. Maannakkut ukiuninik tallimaninik piffissaliussap qanoq annertutigisumik akileraartartup amigartoorutinik annaasaqartarnera pillugu paasissutissaninik ullumikkut aaqqissugaasumik nalunaarsuisoqarneq ajorpoq.

Missiliorneqarpoq amigartoorutinik nalunaarsuiffimmik ataatsimik ineriartortitsinermut aningaasartuuteqarumaartoq, taamaalilluni ukiumiit ukiumut amigartoorutinik siumut nuunneqartuninik nakkutilliisoqarsinnaalerluni. Amigartoorutinik nalunaarsuiffimmik ineriartortitsinermut aningaasartuutit taamaattoq maannakkut ilisimaneqanngillat.

Annikiitsumik aningaasalersuisarnerup killigisaanik oqilisaaneq
Siunnersuummi annertuuninik iluanaarutinut tunngasunut malunnarnerusumik kinguneqarnissaa naatsorsuutigineqanngilaq. Taamaattorli ingerlatseqatigiiffiit aningaasaliinikkut iluserisaat pillugit paasissutissaqanngilaq, taamaattumillu ullumikkumut naleqqiullugu avataanit aningaasaatininik annertunerusumik aningaasaliinermik allannguutip nassataqarnissaa naatsorsorneqarsinnaanani. Taamaattumik allannguutip iluanaarutinut tunngasunut kingunerisaannik taakkuninnga naatsorsugaqarnissamut pigisatut tunngavigisaq atorlugu pisoqarsinnaanngilaq.

Erniat akileraarusersorneri

Ernianinik aningaasalersuinerup eqqunneqarnerani iluanaarutit missiliorneqarnissaat ajornarpoq. Nunani akileraarutikinneruffiusuni akiligassaqaqfinnut ingerlatseqatigiiffiit akiitsui pillugit akileraaruseriffik paasissutissaninik peqanngilaq. Annertuumik iluanaarutinik siunnersuutip pissarsiffiunissaa naatsorsuutigineqanngilaq, tassa naatsorsuutigineqarmat ingerlatseqatigiiffiit akiligassaqaqfiillu imatut aaqqissuutissasut ernianut aningaasartuutinut akileraaruserneqarnissaaq pinngitsoorsinnaallugu. Tamanna siunnersuutip siunniussaanut naapertuuppoq, tassa sinneqartoorutit nunamiit anninnissaannut ernianut aningaasartuutit atornissaannut periarfissat annikillineqassammata.

Tamatuma saniatigut inuussutissarsiornermi akileraarummut allannguutit allat ilanngukkaanni nakkutilliinissamut piumasaqaat ukioq ataaseq aamma affarmik suliatut annertutigilissaaq.

Ingerlatseqatigiiffinnut nalikilliliinermi malittarisassanik allannguiq

Iluanaarutiniq nalikilliliinerup atorunnaarsinnerani aningaasaqarnikkut suut kinguniusinnaanersut missiliorneqarsinnaangillat. Illumik, umiarsuarmik timmisartumillu tunisinermi ingerlatseqatigiiffiit iluanaarutaat ukiumiit ukiumut annertuumik allanngoraput. Siunnersuummi annerusumik ullumikkut kinguartinneqarsinnaasut akileraarutit nuunneqarsinnaassapput. Sinneqartoorutiniq nalikilliliinissamut periarfissap peerneqarnera naatsorsuutigineqarpoq aamma pissarseqqinneq pillugu malittarisassanik annertunerusumik atuilernermik kinguneqarumaartoq. Ataatsimut isigalugu allannguiq taamaattumik naatsorsuutigineqarpoq nunatta karsianut annertuumik aningaasatigut kinguneqassanngitsaq.

Pissarseqqinneq pillugu siunnersuummi aalajangersakkat kinguneraat manna tikillugu nalunaarutikkut nassaassaasunik malittarisassanik malunnaatilimmik pisariillissasut. Taamaattorli siunnersuutip kingunerissallugu ingerlatseqatigiiffinnut akileraaruseriffimmullu allaffissornikkut artukkiinerit annikinnerulernerinut iluaqutaassasoaq. Malittarisassanilli allannguiq naatsorsuutigineqarluni piffissami ikaarsaarfiusumi annertunerusumik ilitsersuinerimik pisariaqartitsiffiussasoaq.

Sulisitsisumit akilerneqartut angalanerit akileraarutaannginnissaat

Akiliunneqarluni angalaneriniit iluanaarutit ukiuni aningaasarsiorfiusuni 2019-2021-mi 1 mio. kr.-t missaaniissimapput. Iluanaarutit naatsorsuutigineqarput siunnersuut peqatigalugu atorunnaassasut. Siunnersuutip kingunerisaanik sulisitsisup akiligaanik angalanerit annertunerulissasut naatsorsuutigineqarpoq. Taamatut angalanerit akissarsiatigut isertitat akileraaruserneqartut annikillinnerisigut akilerneqarpata imaluunniit taakku qaffannissaannut periarfissatut tunniunneqarpata siunnersuut isertitanut tunngavinnut sunniuteqarsinnaavoq, taamaalillunilu aamma akileraarutinit iluanaarutit siunissami annikillillutik. Iluanaarutinit annaasat tamanna pissutigalugu akiliunneqarluni angalanerit akileraarusersorneriniit annaasanit iluanaarutit annertunerulersinnaapput. Tamanna ilumut qanorlu annertutigisumik piumaarnersoq siumoortumik erseqqinnerusumik aalajangeruminaappoq, tassa suliffeqarnermi pissutsit apeqquataassammata. Isertitatigut tunngaviit annertuumik nikittut paasineqarpat pisariaqassappat ineriartornermut tassunga inatsisitigut akuliuttoqartariaqassaaq. Siunnersuut maannakkut malittarisassanik allaffissornermut atasunik allaffissornikkut suliassat killeqartumik annikillinerinik kinguneqassasoaq naatsorsuutigineqarpoq.

Akissarsianik uninngatitsisarnermi qaffasinnerpaamut killiliussamik naleqqussaaneq

Siunnersuut naatsorsuutigineqarpoq akissarsiani uninngatitsisarnermik akileraaruseriffiup allaffissorneranut pisariillisaanermut iluaqutaassasoq. Siunnersuutip aningaasatigut allaffissornikkullu annertuumik sunniuteqarnissaa naatsorsuutigineqanngilaq.

4. Inuussutissarsiorunut aningaasaqarnikkut allaffissornikkullu kingunerisassai

Ingerlatseqatigiiffiutigisani iluanaarutit ingerlatseqatigiiffiutigisanilu iluanaarutininut aalajangersimasunut ilanngaateqarsinnaanerup atorunnaarsinnera

Siunnersuut taamaallaat kapitali 3 b-mut ilaasinnaasunut ingerlatseqatigiiffinnut killeqartunut toqqaannartumik sunniuteqassaaq. Aningaasalersuinerup qaffanneri aningaasaqarnikkut ingerlatat qaffannerinik kinguneqarsinnaavoq, tamannalu inuussutissarsiorunut nalinginnaasumik iluaqutaassalluni, sulisut atuinerullu qaffannerisigut aningaasaqarnikkut sunniuteqarluni. Allatigut pisortanut aningaasaqarnikkut allaffissornikkullu kingunerisassat innersuussutigineqarpoq.

Akileraarutitigut amigartoorutit iluaqutiginissaannut piffissaliussap sivitsorneqarnera

Akileraarutitigut amigartoorutinik iluaquteqarnissamut piffissaliussap sivitsorneqarnera inuussutissarsiorunut iluaqutaasinnaavoq, tassa ingerlatseqatigiiffiit il. il. ukiut siuliini amigartoorutinut ilanngaateqarnissamik atuinnginneq annikillissammagu.

Ingerlatseqatigiiffiit periarfissamik taassuminnga atuisut taamaattoq amigartoorutinik nalunaarsuiffimmut nalunaaruteqarnermut naatsorsuutinilu atortut attuumassuteqartut toqqorsimanerinit allaffissornikkut artukkiinerit qaffassallugit.

Ingerlatseqatigiiffinnut nalikilliliinermi malittarisassanik allanngineq

Pisortanut siunnersuutip kingunissaanik allaaserisanut innersuussisoqarpoq. Pissarseqqinneq pillugu malittarisassanik piviusunngortitsineq naatsorsuutigineqarpoq allaffissornikkut ingerlatseqatigiiffinnut artukkiinerit annikillissasut.

5. Avatangiisinut, pinngortitamut inuillu peqqissusaannut kingunerisassai

Siunnersuut avatangiisinut pinngortitamulluunniit sunniuteqanngilaq. Aamma siunnersuut inuit peqqissusiat eqqarsaatigalugu sunniuteqanngilaq.

6. Innuttaasunut kingunerisassai

Sulisitsisumit akilernerqartut angalanerit akileraarutaannginnissaat

Siunnersuutip kingunerisaanik innuttaasut annertunerusumik sulisitsisumit akilernerqartumik angalasalissapput. Pisuni taakkunani innuttaasut aallaaviatigut angalanerit nalinginut akileraaruserneqassanngillat.

Akissarsianik uninngatitsisarnerup killianik naleqqussaaneq

Siunnersuut pisuni akileraarutitut tunngasunik akilinngisanik akileeqquisoqartillugu akissarsianik uninngatitsisarnerit annikitsumik qaffannerinik kinguneqassaaq. Siunnersuut innuttaasunut annertuunik sunniuteqassasoq naatsorsuutigineqanngilaq.

Siunnersuut tamatuma saniatigut innuttaasunut annertuunik sunniuteqassasoq naatsorsuutigineqanngilaq.

7. Kingunerisinnaasai pingaarnertit allat

Siunnersuut allanik sunniuteqassangatinneqanngilaq.

8. Pisortanik aamma kattuffinnik il.il. tusarniaaneq

Siunnersuut piffissami 8. junimit 7. juli 2023-mi ukunani tusarniutigineqarsimavoq:

Avannaata Kommunia, Kommuneqarfik Sermersooq, Kommune Qeqertalik, Qeqqata Kommunia, Kommune Kujalleq, Kalaallit Nunaanni Eqqartuussissuserisut, SIK. GE, Kalaallit Nunaanni Sulisitsisut, BDO, PWC, Grønlands Revision, Deloitte EY, GrønlandsBanken, BankNordik, ASG, IMAK, Peqqinnissaq pillugu Kattuffiit (PPK), AK, Greenland Holding A/S, NunaGreen A/S, Naalakkersuisut Siulittaasuata Naalakkersuisoqarfia, Nunanut Allanut, Inuussutissarsiornermut Niuernermullu Naalakkersuisoqarfik, Aalisarnermut Piniarnermullu Naalakkersuisoqarfik, Isumaginninnermut, Sulisoqarnermut Nunamullu Namminermut Naalakkersuisoqarfik, Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik, Peqqissutsimut Naalakkersuisoqarfik, Nunalerinnermut, Imminut Pilersornermut, Nukissiornermut Avatangiisinullu Naalakkersuisoqarfik, Ineqarnermut Attaveqaateqarnermullu Naalakkersuisoqarfik, Aatsitassanut Inatsisinillu Atuutsitsinermit Naalakkersuisoqarfik, Aningaasaqarnermut Sulisoqarnermullu Aqutsisoqarfik aamma Meeqqanut, Inuusuttunut Ilaqutariinnullu Naalakkersuisoqarfik.

Siunnersuut aamma piffissami tassani tusarniaanermut nittartakkami pissarsiarineqarsinnaasimavoq.

Tusarniaanermi akissutini tiguneqartuni immikkoortut pingaarnertit ilanngussaq 2-mi eqqaaneqarlutillu oqaaseqarfigineqarput.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Tassani pineqarpoq § 14, imm. 1, nr. 3-mi oqaaseqatigiinni siullerni iluarsineq. Allanguut tassaavoq § 38 j, imm. 1-imut innersuussinerup ilanngunneqarnera, Iluanaarutit siunnersuummi kapitali 3 b-mi ilaasunit ingerlatseqatigiiffinnit piginneqataasunit tiguneqartut inaarutaasumik akileraaruserneqarsimapput.

Nr. 2-mut

Siunnersuutaavoq akiliunneqarluni angalanerit pillugit § 19 b atorunnaarsinneqassasoq.

§ 19 b-p atorunnaarsinnerani § 19 c-mi aaqqiisoqarpoq, tassani § 19 b-mut innersuussineq peerneqarluni.

Nr. 3-mut

§ 22, imm. 5-7-imi siunnersuutigineqartut aalajangersakkat nutaajupput. Siullertut siunnersuutigineqarpoq iluanaarutiniq nalikilliliinerit pillugit § 22, imm. 5 atuuttoq atorunnaarsinneqassasoq.

Tulliullugu siunnersuutigineqarpoq imm. 5-ip nutaamik oqaasertalerneqarnera aamma imm. 5 aamma 7 ilassutigineqassasut, illumik, angallammik timmisartumilluunniit tunisinermi iluanaarut ukiumi isertitaqarfiusumi pineqartumi ukiunilu tulliuttuni isertitaqarfiusuni pigisap taamaaqataanut pisiarineqartup nalinga ilanngaatineqarsinnaalluni.

Ingerlatseqatigiiffiup taamaalilluni pisinermi iluanaarutip akileraarusernissaa pinngitsoortissavaa, akileraartartoq piffissaliussap iluani pigisap taamaaqataanik pissarsisimappat. Piumasaqaataavoq iluanaarut tamarmiusumik pigisap pissarsiarinerata nalinganut nalikilliliiffigisinnaasutut ilanngaatineqarsinnaassasoq.

Pigisap taamaaqataani paasineqarpoq pigisap annertuutigut pigisap tunineqartup assinganik atuuffeqassasoq akileraartartumillu atorneqarsinnaasoq. Assersuutigalugu kilisaammik tunisisoqarpat umiarsuaq nutaaq aalisarnermut atorneqassaaq, assersuutigalugulu inunnik imaluunniit ilaasunik assigisaanillu assartuutitut atorneqaqqusaanani. Assersuutigalugu raajanut kilisaat tunineqarsimappat umiarsuaq nutaaq taamaattoq aalisarnernut allanut atorneqarsinnaavoq,

assersuutigalugu saarullinniarnermi qaleralinniarnermilu. Tamanna pigisap assinganik pissarseqqinnertut isigineqarpoq.

Illu allaffeqarfiusoq tunineqarpat illu pissarsiarineqartoq aamma allaffittut atorneqassaaq assersuutigalugulu attartortitsinermut atorneqaqqusaanani. Illumik attartortinneqartartumik tunisinermi pissarseqqinnermilu pigisap pissarsiareqqinneqartoq attartortitsilluni ingerlanneqarnerup assinganut atorneqassaaq. Assersuutigalugu sannavimmut inuussutissarsiutigalugu attartortinneqartartumik tunisinermi iluanaarut inissiamik attartortittakkamut imaluunniit hoteliliornermut pisinerup nalinganut nalikillineqassanngilaq.

Pigisap atorneqarnera assigiinnngissitaarsimappat pigisap pissarsiareqqinneqartoq aamma assigiinnngissitaartumik atorneqassaaq. Assersuutigalugu init allerpaat niuerniartarfiusimallutik inillu qulaaniittut inissiatut attartortittakkatut atorneqarsimallutik illu tunineqarpat illu pisaarsiareqqinneqartoq taamaaqataanut atorneqassaaq.

Aalajangersakkat atorneqarnissaanut piunasaqaataalluinnarpoq akileraartartoq ukiumi tunisiffiusumi nammineq nalunaarummini pissarseqqinneranik nalunaarsuisimanissaa. Aamma akileraaruteqarnissamut pisussaaffilik piffissami atorunnaakkamut ukiumut nammineq nalunaarsugarisanik tunniunneqarfiani tassani akileraaruseriffimmut akiligassanik akileraarutininik imaluunniit akitsuutininik 100.000 kr.-t sinnerlugit peqassannginnera aalajangersakkamik atuinermut piunasaqaataavoq. Taamaalilluni akileraarutit akitsuutillu akiligassat piffissami tassani 100.000 kr.-t assigissappagit, imaluunniit ikinnerussappata akileraaruteqarnissamut pisussaaffilik malittarisassiamik suli atugaqarsinnaassaaq.

Imm. 6-imi aalajangersakkami pigisap taamaaqataa pissarsiarineqartut isigineqassasoq aalajangersarneqarpoq, ukiup pissarsiffiusup kingorna kingusinnerpaamik ukiumi aningaasarsiorfiusumi pigisap taamaaqataanik tunniussinissaq pillugu allakkatigut, pituttuisumik isumaqatigiissusiorqarsimappat. Aammattaaq piunasaqaataavoq pigisap ukiup pissarsiffiusup kingorna ukiunit aningaasarsiorfiusunit pingasunit kingusinnerusumik tunniunneqarsimassanngitsoq. Aalajangersakkami naggammi kingullerni erseqqissarneqarpoq tunniussinermi eqqarsaatigineqartoq ukiumi aningaasarsiorfiusumi pigisamik ingerlatseqatigiiffiup nalikilliliinissaanut piunasaqaatit naammassineqarsimasut. Akileraartarnermi nalikilliliinerit il.il. pillugit namminersorlutik oqartussani nalunaarummi § 2 malillugu piunasarineqarpoq pigisap suliffeqarfimmut ingerlanneqareersumut tunniunneqarpat, suliffeqarfiup ingerlanneqarnerani atorneqartussatut siunniunneqarsimappat, aamma ingerlatsinermi atorneqariaannanngorlugu naammassineqarsimappat.

Aalajangersakkami imm. 7-imi siunnersuutigineqarpoq imm. 5-6-imi atuuttunik piffissaliussat iluanni imm. 5-imut ilaasumik pissarsisoqarsimannngippat iluanaarut tamatuma paasineqarfiani ukiumi aningaasarsiorfiusumi aningaasarsiat akileraarutaasussat naatsorsornerinut ilaatinneqassaaq.

Pissarseqqinnermi malittarisassani aningaasannanniarneq annikillisinniarlugu taamaattoq iluanaarut ukiup tunisiffiusup naaneraniit tamatuma paasineqarnerani ukiup aningaasarsiorfiusup naanissaata tungaanut qaammammut ataatsimut 1 procentimik tapilerlugu iluarsineqassaaq.

Assersuut: Ingerlatseqatigiiffik A kilisaammik 1 mio. kr.-nik iluanaaruteqarfigalugu ulloq 1, maj 2024-mi tunisivoq. Ingerlatseqatigiiffik nammineq nalunaarummini allappoq pissarseqqittoqassasoq aamma iluanaarut ukioq aningaasarsiorfiusumi 2024-mi ilanngunnagu. Ingerlatseqatigiiffik juni 2024-mi kilisaammik taamaaqataanik tunniussisoqarnissaa pillugu isumaqatigiissuteqarpoq. Ulloq 1. marts 2026-mi isumaqatigiissutaasimasoq ingerlatseqatigiiffimmit atorunnaarsinneqarpoq pissarseqqittoqannginnissaalu pillugu akileraaruseriffimmut ilisimatitsilluni. Qaammatini 24-ni qaammammut ataatsimut 1 pct.-imik tapilik iluanaarut $(1,01^{24}) * 1,0 \text{ mio.kr.} = 1,27 \text{ mio. kr.}$ ukiumi aningaasarsiorfiusumi 2026-mi aningaasarsianut akileraarutaasussanut ilanngunneqassaaq.

Nr. 4-mut

Siunnersuutigineqarpoq aningaasarsiani akileraarutaasussani amigartoorutip iluaqutiginissaanut piffissaliussaq ukiunut 10-nut sivitsorneqassasoq. Amigartoorulli piffissap iluani taamaallaat nuunneqarsinnaalluni taanna ukiut siuliini aningaasarsiani akileraarutaasussani inissaqartinneqanngippat, tak. aalajangersakkamik oqaaseqatigiit atuuttut aappaat.

Ukiunili 10-ini nuussisinnaanermut periarfissaq taamaallaat atuutissaaq akileraartartoq amigartoorutip saqqummiunneqartussap paasissutissaataanik akileraaruseriffimmut tunniussisimappat aamma ukiunut pineqartunut taakkununga naatsorsuutigut atortunik attuumassuteqartunik toqqortaqaarnissaq pillugu nalunaarummik tunniussisimalluni. Amigartoorutip nuunneqarnissaanut paasissutissat ukiukkaartumik akileraaruseriffimmut nalunaarutigineqartassapput. Nalunaaruteqartoqanngippat ukiut aningaasarsiorfiusut tallimat sinnerlugit amigartoorummik nuussisinnaaneq atorunnaassaaq. Nuussisinnaanermik pisinnaatitaaffigisatut amigartooruteqarneq pillugu paasissutissanut tunngasuni pineqarpoq ukiumi sorlermi amigartoorutip pinngorsimanera, ukiuni siuliini amigartoorutaasunit qanoq annertutigisut atugaasimaneri, aamma, ukiut arlerlugit amigartooruteqarnerit pineqassappata ukiuni ataasiakkaani taakkunani amigartoorutip annertussusaa pillugit paasissutissat tunniunneqarnissaat. Aalajangersakkap nassatarisaanik paasissutissat sorliit tunniunneqarnissaat pillugit malittarisassianik erseqqinnerusunik aalajangersaanissaminnut Naalakkersuisut piginnaatitaapput.

Aalajangersagaq malillugu nalunaarutinik il.il. nalunaaruteqarneq ukiut isertitaqarfigisat tallimaannut nammineq nalunaarutinik tunniussinissamut killissarisami kingusinnerpaatut aallartinneqassaaq.

Akileraaruteqarnissamut pisussaaffeqartoq, malittarisassiamik atugaqarniaruni ullumikkut inatsisaasunit malitseqartitaasut ukiut 5-it taakku saniatigut ukiumut amigartooruteqarfigisamut naatsorsuuserinnermut atortussanik attuumassuteqartunik tamanik toqqortaqaassaaq. Atortut pillugit

akileraaruseriffiup qinnuiginninnerata kingornatigut kingusinnerpaamik ullut 60-ianni naatsorsuutitut atortut akileraaruseriffimmut tunniunneqassapput.

Paasissutissat suut nalunaarutigineqassanersut pillugit malittarisassanik erseqqinnerusunik aalajangersaanissamut, kiisalu immikkut pisoqartillugu piffissaliussamik qaangiinerit akileraaruseriffimmiit soqutigineqannginnissaat pillugu malittarisassanik aalajangersaanissamut Naalakkersuisut piginnaatinneqarput.

Aalajangersagaq malillugu amigartoorut nuunneqarpat akileraaruserinermik ingerlatsineq pillugu Inatsisartut inatsisaanni § 47 a-p malitsigisaanik qaqitseqqinnermut killiliussat tamakku atuutissapput, tamanna akileraaruserinermik ingerlatsineq pillugu Inatsisartut inatsisaata allangortinnissaa pillugu Inatsisartut inatsisissaattut siunnersuummi, aamma 2023-mi ukiakkut ataatsimiinnermi oqaluuserineqartussami ilaalluni.

Taamaalilluni siunnersuut malillugu sinneqartoorummik saqqummiussisinnaanermik atugaqarnermiipportaaq akileraaruseriffiup ukiut amigartooruteqarfigisanik qaqitseqqissinnaanera, tassalu akileraaruserinermik ingerlatsineq pillugu Inatsisartut inatsisaanni § 47-p nalinginnaasumik malitsigisaasa saniatigut. Tamannali amigartoorutip annertussusianut pingaaruteqartunut angissusiinertut taamaallaat atuutissaaq.

Nr. 5-imut

Siunnersuutigineqarpoq inatsimmi kapitali 3 b-mut ilaasunut ingerlatseqatigiiffinnut aalajangersakkap atorneqannginnissaa erseqqissarneqassasoq. Aammattaaq piginneqatigiiffik pingaarnerusoq pillugu nassuiaat § 38 h, imm. 7-imut aalajangersakkamiit nuunneqarluni, taarsiullugu tassunga innersuussisoqarluni.

Nr. 6-imut

§ 34, nr. 15 litranut 2-nut avinneqassasoq siunnersuutigineqarpoq.

Litra a-mi nutaajusumi siunnersuutigineqarpoq sulinermi pissutsini atorfeqartoq pillugu sulisisumiit akilernerqartut angalanerit akileraarutaassanngitsut. Tamanna atuuppoq angalaneq inuttut ingerlanneqarnerisoq imaluunniit sulinermut atatillugu pinersoq apeqqutaatinnagu. Tamanna aamma inunnut siulersuisuni, ataatsimiititaliani, kommissionini, siunnersuisooqatigiinni, immikkut qinikkani allatulluunniit ataatsimoorfiusuni, tamatumani ilanngullugit Naalakkersuisunut, Inatsisartunut kommunalbestyrelsinullu ilaasortanut atuuppoq.

Siunnersuummi angalaneq pillugu taaguummi allannguisoqanngilaq, suleriaaseq naapertorlugu imatut paasineqartut: Assartuineq, ungasissuseq imaluunniit assartuinnermi piffissap kingunerisaanik

nalinginnaasumik najugaqarfimmi unnuineq angalanerup nalaani piviusorsiortuunani imaluunniit pisinnaanani. Aalajangersakkamut taamaalilluni ilaanngilaq suliffiup angerlarsimaffiullu akornanni allatigut assartuineq. Angalanermi aningaasartuutitut, aalajangersagaq malillugu akileraarutaasussaangitsunut taamaallaat ilaapput assartuinnermut (timmisartumik umiarsuarmullu billetsit) aamma assartuineq pissutigalugu unnuinnermut aningaasartuutit. Aalajangersakkamut taamaalillutik ilaanngillat angalanerup nalaani najugaqarnerit pilersuinerillu allat, assersuutigalugu biilnik attartorneq aamma takoriarnerit.

Litra b-p aalajangersagaq atuuttoq assigaa. Aalajangersakkap malitsigisaanik angerlarsimaffimmut akiliunneqarluni angalanertut taaneqartut tjestemandinut atuuttut malittarisassat malillugit akileraarutaasussaangillat. Litra a-mut naleqqiullugu assigiinnngissutaasoq tassaavoq akiliunneqarluni angalanermut akileraaruserneqanngitsumut ataasiinnarmut ukiumut ataatsimut pisinnaatitaaffeqarnek, angalanerilli taakku atorfeqartup saniatigut atorfeqartup ilaqtutai ilaatinneqarsinnaallutik.

Nr. 7-imut

Siunnersuutigineqarpoq § 36 c, imm. 1, nr. 3-mi nammineq aningaasaatit allaniillu aningaasaliinerit akornanni pissutsit 2:1-imit 4:1-imut allanngortinneqassasut.

Nr. 8-mut

§ 36 e-p nutaap ilanngunneqarnerani siunnersuutigineqarpoq nunani allani akiligassaqarfinnut aalajangersimasunut akilerneqartunut ernianut 25 pct.-imi ernianut akileraarut eqqunneqassasoq.

Akileraarutip ilanngaatiginissaanut akilerneqarnissaanullu pisussaavoq Kalaallit Nunaanni aningaasanik akiitsorti. Ernianut akileraarut akiitsortip akiligaani ernianit tamarmiusunit ilanngaatigineqassaaq. Akiligassaqarfik imm. 2-mi aalajangersakkanut ilaatinneqanngitsoq akiligassaqarfiup uppersannngippagu inatsimmi § 81 malillugu piffissaliussat iluanni akiitsorti akileraarutiniq ilanngaateqassaaq akiliillunilu.

Tamatuma tulliatut ingerlatsiviit aalajangersimasut il.il. pisut ilaanni nunani allani akiligassaqarfinnut ernianik akiliutaasunik ilanngaateqartitaassannginnerat siunnersuutigineqarpoq. Tamanna pisuni erniat ernianut akileraaruteqartitaanissaaffiini atuutissaaq, tassalu aalajangersakkami imm. 1-imi tamakkiisumik akileraaruteqarnissamut pisussaaffeqartutut inatsisitigut inuttut naatsorsuutigisamit akilerneqarsimassappata. Imm. 1-imut innersuussutittaaq nassataraa imm. 2-p malitsigisaanik pinngitsuuisitsinerit annertuumik killeqartitaasutut akileraaruteqarnissamut pisussaaffeqartunut assingatut atugaatinnissaa. Assersuutigalugu aalajangersimasutut ingerlatsiviusoq erniamik tigusaqartoq nunami angerlarsimaffigisamini minnerpaamik 15 pct.-imik akileraaruserneranik uppersaassummik saqqummiussaqsarinnappat ingerlatsiviusup akileraarutigisassatut isertitaanik naatsorsuinnermi ernianut aningaasartuutaasumik

ilanngaateqartoqarsinnaavoq, tunngavigineqassalluni aningaasartuutaasoq Kalaallit Nunaanni isertitanik naatsorsuinnermut tunngasuunera.

Uppernarsaaneq imm. 2-mi pinngitsuuisitsinermut aalajangersakkani sorliup atugaalernissaanik aalajangerneqassaaq, aammalu uppersarsaaneq ilutsit assigiinngitsut atorlugit pisinnaavoq. Uppernarsaassut taarsigassarsinissamik isumaqatigiissummi atsiugaasumiissinnaavoq, kiisalu aningaasat tigusaqartussamut nuunneqarneranik uppersarsaassummi. Nunami, Kalaallit Nunaallu marloqiusamik akileraarusersuinissamik isumaqatigiisuteqartumi akileraaruteqarnermut pissaaffilimmut uppersarsaaneq tassaasinnaavoq pissarsiaqartoq nunami pineqartumi angerlarsimaffeqarneranut uppersarsaaneq. Pissarsisup angerlarsimaffittut nunagisaani minnerpaamik akileraarusiinissaq pillugu pinngitsuuinissaq pineqassappat pissarsisup nunami angerlarsimaffigisami ernianit pineqartunit taakkunanit qanoq akileraaruteqartitaanissaanut uppersarsaat ilaassaaq.

Assersuut: Akiitsortoq tassaavoq § 1, imm. 1, nr. 3 malillugu piginneqataassuteqarluni ingerlatseqatigiiffik. Taarsigassarsianik akiligassaqaarfik marloqiusamik akileraartarneq pillugu isumaqatigiisummik Kalaallit Nunaannik isumaqatigiisuteqarsimannngitsumi nunami angerlarsimaffilik. Akiligassaqaarfiup ernianit isertitat akiligassaqaarfiup nunami angerlarsimaffigisani minnerpaamik 15 procentinik akileraaruserneqartussaaneri uppersarsimannngilaa. Akiitsorti qaammatit pingasukkaarlugit akiligassaqaarfimmut 30.000 kr.-nik akilersuutinik ernianullu 100.000 kr.-nik akiliisarpoq. 100.000 kr.-nik tamakkiisumik ernianit akiitsorti 25 procentinik ilanngaassissaaq aamma ernianut akileraarutini 25.000 kr.-nik akileraaruseriffimmut akiliissalluni.

Taarsigassarsiat katersugaallutik aqqissuunneqartut pineqassappata, tassalu nalinginnartut aningaaserivinnit arlalinnit taarsigassarsiarititaasut pineqaraangata taarsigassarsiarititamit tamarmiusumit aningaaseriviit ataasiakkaat akiliutaannik tunngaveqartumik ernianit aningaasartuutigisat agguataarneqarsinnaapput.

Imm. 2-mi aalajangersakkami malittarisassiat nunami allami, tassani Danmarki Savalimmiullu angerlarsimaffeqartunut inatsisitigut inuttut imaluunniit inuinnartut naatsorsuussanut akiliuteqarnerni atugaasernerat aalajangersarneqarpoq. Taamaattorli marloqiusamik akileraartarneq pillugu Danmarkip Savalimmiullu isumaqatigiisuteqarfigineqarnikuupput.

Aammattaaq imm. 1-imi aalajangersagaq malillugu akileraaruteqarnissamut pisinnaatitaaffigisat annertussusia killilerneqarpoq.

Nr. 1-ip malitsigaa akiligassaqaarfigisap nunami akileraarutip annikillisinneqarfiani, imaluunniit marloqiusamik akileraaruteqarnermut isumaqatigiisup imarisaa malillugu atorunnaartitaaffiani najugaqartuulluni pisoqarfinni aalajangersakkap atorneqassannginnera.

Nr. 2-p malitsigaa akileraaruteqarnissamut pisussaaffigisaq nunami allami, Kalaallit Nunaanni piginneqatigiiffik pingaarnerusumut nakkutigisaasumik taarsigassaartoqassappat.

Nr. 3-p malitsigaa akileraaruteqarnissamut pisussaaffigisap atorunnaarsinnissaa, pissarsisoq piginneqatigiiffik pingaarnermi nakkutigineqarpat, Kalaallit Nunaata marloqiusamik akileraaruteqartitsinermik isumaqatigiissuteqarfigisaani angerlarsimaffeqartumi. Taamaattorli nunani pineqartuni taakkunani malittarisassiat tamakku atuuttut malillugit ernianik ingerlatseqatigiiffik taanna CFC-tut akileraartitaanissaanut piunasaqaataasut piviusunngorsimaffiini tamanna taamaallaat atuutissaq.

Nr. 4-p malitsigaa akiligassaqarfiup angerlarsimaffigisani ernianut akileraarut minnerpaamik 15 pct.-iusoq akiligassaqarfiup uppersarpagu aalajangersagaq aamma atorneqassanngitsoq.

Nr. 5-ip malitsigaa nunamit allamit naalagaaffimmi oqartussanit, (tassunga qallunaat savalimmiormiullu ilaatillugit) imaluunniit naalagaaffiup ataani immikkoortumit imaluunniit naalagaaffiit akornanni suliniaqatigiiffimmi taarsigassarsiat pineqarpata aalajangersakkap atorneqassannginnera. Taamaattorli piunasaqaataavoq nalinginnaasumik niuernikkut piunasaqaatit atorlugit taarsigassarsisoqarsimanngitsoq. Aningaasarsiornissaq siunertaralugu aningaasaliisuniit nunani allani naalagaaffiup aningaasalersuinerimi aningaasaateqarfianiit taarsigassarsiat taamaalillutik sulii erniatigut akileraarusersorneqassapput, allatigut ilaatitsinnginnerit atorneqanngippata. Paarlattuanik naalagaaffinniit imaluunniit naalagaaffiit akornanni suliniaqatigiiffinniit il.il. aningaasalersuinerit, inuiaqatigiinni annertunerusumik ineriartortitsinermik tunngaveqartut erniatigut akileraarusersorneqassanngillat. Taamaattoqarpoq naalagaaffik imaluunniit suliniaqatigiiffik imatut ernianit isertitanut akileraarusersorneqassanngikkaluarpalluunniit. Assersuutit tassaasinnaapput Nordiske Investeringsbankimit (NIB) imaluunniit Europæiske Investeringsbankimit (EIB) taarsigassarsiaasinnaapput.

Aalajangersakkami imm. 3-mi akiliinerup akileraarummik ilanngaassinissamut pisussaaffimmik aalajangersaasoqarpoq, aamma iluanaarutinut aalajangersimasunut atorneqartussaq. Aalajangersakkami siunertaavoq akileraaruserneqartussanik ernianik akiliinerit akiitsut sinneqartumik naleqartillugit akilernerisigut iluanaarutinut allanngortinnissaasa pinngitsoortinnissaa. Akiitsorti taamaattumik aalajangersakkami imm. 1-2 naapertorlugit malittarisassat taakku malillugit iluanaarutit pillugit ilanngaassisussanngortinneqarpoq.

Nr. 9-mut

Siunnersuutigineqarpoq kapitali 3 b nutaaq aamma kapitalimi qulequtaq nutaaq ikkunneqassasut.

Siunnersuutigineqarpoq qulequttap kingunitsiannguaq § 38 h-miit § 38 j-imut, nutaajusut ikkunneqassasut.

Siunnersuummi § 38 h, imm. 1-4-mi kapitalimi kikkut ilaasinnaasut ingerlatseqatigiiffiit killilerneqarput. Ingerlatseqatigiiffik malittarisassanut ilaatinnaasaa piumasaqaataavoq aalajangersakkami imm. 5-imi eqqaaneqartutut akileraaruseriffimmut nalunaartoqarsimanissaa.

Aalajangersakkamut ilaapput ingerlatseqatigiiffiit, aktiaateqarluni ingerlatseqatigiiffiit imaluunniit piginneqataassuteqarluni ingerlatseqatigiiffiit tamakkiisumik akileraartussaasut, tak. § 1, imm. 1, nr. 3.

Aalajangersakkami imm. 2-mi aalajangersarneqarpoq kapitali 3 b-mi ingerlatseqatigiiffiit, minnerpaamik ingerlatseqatigiiffimmi kaaviiartitat 90 procentii inatsisit allanneqarsimasut arlaat malillugu iluaquteqarnissamut akuersissuteqarlutik ingerlatanut tunngatinneqarsinnaasut.

Taamaalillutik inatsisit taakku malillugit akuersissutitut kaaviiartitat inissinneqarsinnaanissaat pillugu piumasaqaat ilaatigut inatsit manna malillugu nalilerneqassaaq, ilaatigullu inatsisini pineqartuni, aammalu taakku nassatarisaattut akuersissutini nalunaarutigineqartuni taakkunani imarisaasut aallaavigalugit nalilerneqassapput. Inatsisini pineqartuni, imaluunniit taakku nassatarisaattut akuersissutini nalunaarutigineqartuni ingerlatseqatigiiffiup pineqartup suliaasat sorliit suliarisinnaasai, imaluunniit ajornanngippat suliarisassai pillugit aalajangersakkat aalajangersagaasimassapput. Taamatuttaaq pisinnaatitsissummik piginnittutut ingerlatseqatigiiffik inatsisit taakku avataanniittunik suliarisaqarnissamut itigartitaasimasinnaavoq.

Assersuutigalugu erngup nukinganik nukissiornermik iluaquteqarnissamut akuersissummik ingerlatseqatigiiffik pigisaqassappat suliarisat innaallagissiornermut il.il. erngup iluaqutiginissaanut suliarisat tunngassapput, kaaviiartitallu innaallagissap tigusaqartussamut ataatsimut imaluunniit arlalinnut tunineqarneratigut pilersinneqassapput, assersuutigalugit ingerlatseqatigiiffik, nukissamik annertuumik atuisutut suliffissuaqarfimmik ingerlatsisoq, aatsitassarsiortutut ingerlatseqatigiiffik, imaluunniit inuinaat inuiaqatigiiffiannut tunisassiortoq. Aalajangersakkami naggammi kingullermi nukissamik annertuumik atuisutut tunisassiorneq aamma ingerlatseqatigiiffiup isumagisinnaasaattut suliarisaasuni ilaasinnaasooq, sulilu imm. 2-mut ilaatitaasinnaasooq erseqqissaavigineqarpoq. Taamaalilluni erngup nukinganik nukissiorneq, atasutullu suliffissuaqarfimmi tunisassiornerup ingerlatseqatigiiffiup ataasiinnaasinnaanera, imaluunniit ingerlatseqatigiiffinni immikkoortitani marlunniissinnaasanera isumaavoq.

Aalajangersakkami imm. 3 aalajangersarneqarpoq ingerlatseqatigiiffiit ingerlatseqatigiiffimmi kaaviiartitat 90 pct.-ii erngup nukinganik nukissiorfimmiiit nukimmik atuinermut atatinneqarsinnaasut kapitali 3 b-mi ilaatinneqarsinnaasut. Siunnersuummi erngup nukinganik

nukissiorfimmiit nukimmik inuussutissarsiornikkut atuisut assigiinngitsut ilaatinneqarsinnaasut allattorneqarput.

Nukimmik annertuumik pisariaqartitsisut suliffissuarni eqqarsaatigineqarput suliffissuit nukimmik annertuumik atuillutik tunisassiornermik ingerlataqartat, tunisassiarineqartumut ataatsimut nukik annertooq atorneqartarluni. Tamanna assersuutigalugu tassaasinnaavoq saviminissamik imaluunniit aluminiumik tunisassiorneq. Nukissiornermi tunisassianik tunisassiornermi eqqarsaatigineqarput assersuutigalugu elektrolyse imaluunniit power-to-x-imik tunisassiornermik taaneqartut (e-ikumatissaq) aqutigalugit brintimik tunisassiorneq.

Pisuni taakkunani 90 procentinut tunngatillugu akileraaruteqarnissamut pisussaaffillip kaaviiartitai suliarisanit taakkunanit tunisassianik nioqquteqarnermut inissinneqarsinnaassapput. Nioqquteqarneq taama ittoq tassaasinnaavoq nunani allani pisisunut tunngasoq, aammali tassaasinnaalluni Kalaallit Nunaanni ingerlatseqatigiiffinnut tunngasoq, soorlu Kalaallit Nunaanni aatsitassarsiornermik ingerlatseqatigiiffiit imaluunniit umiarsuaatileqatigiit, nukissiornermik tunisassianik pineqartunik atugaqarsinnaasut.

Siuliani taaneqartunik tunisassiornermik ingerlataqartumut ingerlatseqatigiiffimmut piunasaqaataavoq ingerlatseqatigiiffiutigisaaq, imaluunniit erngup nukinganik nukissiornermi isumalluummik iluaquteqarnissamut akuersissummik pigisaqartumik ingerlatseqatigiiffimmut suliffissuurtut atassuteqartoq. Taaguut suliffissuarmut atassuteqarneq § 36 a, imm. 4-mi isumaasoq naapertorlugu paasineqassaaq.

Imm. 4 siunnersuutaavoq aalajangersakkanik katersuiffiusoq, aalajangersakkani kapitalimi matumani imm. 1-3-mut ilaatinneqartut, taamaasilluni ingerlatanut atalluinnartunik ingerlataqartut, ingerlatseqatigiiffiit periarfissinnissaat siunertaalluni. Ingerlatat qanilluinnartut, assersuutigalugu umiarsualivimmik ingerlatsineq, umiartorneq, pisiortornermik ingerlataqarneq taamaalillutik ingerlatseqatigiiffinnut immikkoortunut inissinneqarsinnaapput, ingerlatseqatigiiffillu taamatut ittoq suli kapitali 3 b-mut ilaasinnaalluni. Tassani aamma piunasaqaataavoq ingerlataq qanilluinnartuq ingerlatseqatigiiffiutigisamit imaluunniit ingerlatseqatigiiffik ingerlatseqatigiiffimmik suliffissuurtut atanissaa ingerlanneqartoq, aalajangersakkami imm. 1-3-mut ilaatinneqartoq. Allaaserineqartut kapitali 3 b-mut ingerlatseqatigiiffiup ilaasinnaanera sioqqullugu tamanna akuerineqassaaq. Toqqaannartumik unammillernerup pineqarnera pillugu apeqqut missiliunermik naliliinermik tunngaveqarpoq. Akuersissummut piunasaqaat ilanngunneqarsinnaavoq.

Akuersinerup suliarinerani siunertaq marloqiusaavoq. Illuani siunertaavoq erngup nukinganik ingerlatanut, suliffissuarmut atasunut ingerlatanut allatigullu qanittumik ingerlatanut naleqqiullugu kissaatigineqartunut suliffissuup aqqissugaaneranut naleqqiullugu periarfissiilluarnissaaq. Akileraartarnikkut suliarinninneq aallaaviatigut suliffissuup aqqissugaanerata toqqarnera

aalajangiisuussanngilaq. Aappaatigut kapitali 3 b-mi aalajangersakkat ungalulernerqassapput, aamma kapitali 3 b malillugu akileraarusersorneqartut ingerlatseqatigiiffiit aamma inatsimmi malittarisassat nalinginnaasut malillugit akileraarusersorneqartut ingerlatseqatigiiffiit akornanni siunertaanngitsumik unammilleqatigiinnik pinngitsoortinneqassalluni.

Taamaattumik piumasagaatigineqarpoq qanittumik atasut ingerlatat kalaallit nunaanni niuerfimmum tunineqarnissaa siunertaralu pinnginnissaat, imaluunniit Kalaallit Nunaanni ingerlatseqatigiiffimmut toqqaannartumik unammillernatik. Tassunga pinngitsuuisitsinermut atuuppoq taamatut atasutut ingerlatseqatigiiffiup Kalaallit Nunaanni innaallagissamik nioqquteqarsinnaanera, imaluunniit nukissiornikkut tunisassiarisanik nioqquteqarsinnaanera. E-mik ikummatissiamik tunisassiorneq assersuutigalugu pineqassappat nioqqutinik taakkuninnga Kalaallit Nunaanni nioqquteqarnissamut malittarisassat akornutaannginnissaat tamatumani pingaartinneqarpoq, aamma nioqquteqarluni suliarisat tamakku ingerlatseqatigiiffimmi immikkoortitami inissinneqarsimassagaluarpata, taamaattumillu aalajangersakkami imm. 2-mi aamma imm. 3-mi ilaanatik.

Toqqaannartumik unammillernermi eqqarsaatigineqarpoq assersuutigalugu ingerlatseqatigiiffimmi ingerlatap kingunerisaanik ingerlatseqatigiiffimmut ingerlasumut allamut isertitatigut appariartoqarneranik paasisaqarneq, assersuutigalugu ingerlatseqatigiiffik siullertut taaneqartoq aamma kalaallit nunaanni niuerfimmum nioqqutissanik imaluunniit sullissinernik neqerooruteqarmat. Assersuutigalugu power-2-x-imik tunisassiornermut atassuteqartumut atatillugu nioqqutissanik eqqussuinerum annissuinerumullu taamaallaat atornerqartumik umiarsualivimmik pilersitsineq akerlianik namminerum kingunerissanngilaa tamatuma umiarsualivimmik allamik toqqaannartumik unammillertuunera, tassa pisumi tassani umiarsualivimmik pisariaqartitsineq erngup nukinganik nukissiorfiup imaluunniit suliffissuup ingerlatsineranik pilersitsinermut ingerlatsinermullu atassuteqarmat, taamaalillunilu suliffeqarfimmut pilersinneqareersimasumut akulerunnerunani. Umiarsualivilli assersuutigalugu e-ikummatissanik usingiarnerup saniatigut aamma aalisakkanik usingiarnerum atornerqarpat akuersissut akerlianik pissarsiassaannngilaq, tassa taamatut ingerlataqarneq ilaatigut nukimmik annertuumik atuisumut suliffissuarmut naammattumik atassuteqanngimmat, aamma umiarsualivinni ingerlatanut allanut toqqaannartumik unammillernerummat. Taamatuttaaq assersuutigalugu illoqarfiit aamma nunaqarfiit avataanni inissimasumut, taamaattumillu pisortat nukissiornermik pilersuiffianut attaveqanngitsumut aatsitassarsiornermik ingerlatseqatigiiffimmut innaallagissamik nioqquteqarneq Nukissiorfiit nukissamik pilersuineranut toqqaannartumik unammillertussaassanngilaq.

Imm. 5-imi siunnersuutigineqartup kingunerisaanik kapitali 3 b-mi aalajangersakkanut ingerlatseqatigiiffiup ilaanissaq pillugu kissaatigisaqarnera akileraaruseriffimmut nalunaaruteqartoqassaaq. Imm. 1-3-mi piumasagaatit naammassineqarsimappata inatsit malillugu ingerlatseqatigiiffik malittarisassat malillugit akileraarusersorneqarnerum ilannguttussaassaaq. Toqqaaneq aallaaviatigut ingerlatseqatigiiffimmut ukiuni tallimani pituttorneruvoq. Siunnersuummi

imm. 4-mut ilaasunut ingerlatseqatigiiffinnut taamaattoq piumasaqaataavoq Naalakkersuisut sioqqutsisumik tamatumunnga akuersisimanissaat.

Ingerlatseqatigiiffiup malittarisassanut ilaanera pillugu pituttuisumik neriorsuuteqarnissamut akileraaruseriffik piginnaatitaavoq. Ingerlatseqatigiiffik aalajangersakkamut imm. 4-mut ilaasoq pineqarpat, piumasarineqarpoq Naalakkersuisunit siumoortumik akuერიissagaat.

Immikkut ittutut akileraaruteqartitsinermut aaqqiissummi qanoq isernissap aninissallu suliaqarfiginissaata aalajangernissanut akileraaruseriffiup piginnaatinneqarnissaa imm. 6-ikkut siunnersuutigineqarpoq. Imm. 6 malillugu piumasaqaatinik akileraaruseriffiup aalajangersaanissaanut siunertaavoq isernermi aninermilu akileraartarnikkut kinguniusinnaasunik isumaginninnissaq. Piumasaqaatinik aalajangersaaneq taamaalilluni kapitali 3 b-mi akileraarusersuinermit isernermi imaluunniit aninermi siunertaanngitsumik akileraartarnikkut iluaqutaasinnaasut akornutaasinnaasullu pinngitsoortinnissaat siunertaavoq. Assersuutigalugu qulakkeerneqassaaq iluanaarutininik tunniussinermi ukiumi ataatsimi ilanngaateqartitsisoqassanngitsaq, ingerlatseqatigiiffimmut piginnittumut iluanaarutininik tunniussineq aatsaat siunnersuummi § 38 j, imm. 2-mi ingerlatseqatigiiffiutigisap iluanaarutai akileraaruserneqanngitsut pillugit malittarisassanut ingerlatseqatigiiffiup ilaalerneraniit ukiup ataatsip qaangiunnerani pissasoq, tassa tamanna siunertaanngitsumik ilanngaateqartitsisinnaammat aamma iluanaarutit akileraaruserneqannginnerinik kinguneqarsinnaalluni.

Ingerlatseqatigiiffik imm. 1-4-mi aalajangersakkanut ilaanissamut piumasaqaatinik naammassinnikkunnaarpat, tassunga ilanngullugu imm. 4 malillugu akuersinissamut piumasaqaatit aalajangersarneqartut, anineq pillugu aalajangiinermik akileraaruseriffik aalajangiissaaq. Piumasaqaatinik saneqqussineq pissutsinik immikkuullarissunik peqquteqarpat imaluunniit saneqqussinerit pingaaruteqanngippata qaangiuttussaallutillu taamatut kinguneqartitsinissamut immikkut akuersinissamut akileraaruseriffik piginnaatinneqarpoq.

Imm. 7-imi siunnersuutigineqarpoq ingerlatseqatigiiffik piginnittoq pillugu nassuiaat aalajangersarneqassasoq. Nassuiaat § 34, nr. 11-mi ullumikkut nassaassaasumut nassuiaammut atuuttumut naapertuuppoq.

Imm. 8-mi siunnersuutigineqarpoq ingerlatseqatigiiffiutigisanut piginneqataassutininut nassuiaat aalajangersarneqassasoq.

§ 38 i-mi siunnersuutigineqartumi kapitali 3 b-mut ilaanissamut toqqaasimasunut ingerlatseqatigiiffinnut aningaasarsiat akileraarutaasussat naatsorsornerinik iluarsiivoq. Isertitat aktiaateqarluni piginneqataassuteqarlunili ingerlatseqatigiiffiit allat assigalugit naatsorsorneqarput, aalajangersagaa qimallugu iluarsiiffigineqartoq.

Imm. 2-mi aalajangersakkami ingerlatseqatigiiffimmit pigineqartumit tiguneqartut iluanaarutit aningaasarsianut akileraarutigineqartunut ilanngunneqassanngitsut aalajangersarneqarpoq.

Kapitali 3 b-mi ilaasuunani Kalaallit Nunaannit ingerlatseqatigiiffimmit iluanaarutit pineqassappata iluanaarutit inaarutaasumik akileraaruserneqarsimapput, takuuk § 86. Tassannga § 14, imm. 1, nr. 3-p malitsigaa iluanaarutit taakku pissarsisumut akileraaruteqarfigisassatut pisussaaffigisatut isertitanut ilanngunneqassanngitsut. Taamaattumissaaq iluanaarutit taakku ingerlatseqatigiiffinnut, kapitali 3 b-mi ilaasunut akileraaruteqarfigisassatut pisussaaffigisatut isertitanut ilanngunneqassannginnerat erseqqissarneqarsimavoq.

Taamaattorli ingerlatseqatigiiffiutigisat iluanaarutaat akileraaruteqarfigisassatut pisussaaffigisatut isertitanut ilanngunneqassapput, tassalu ingerlatseqatigiiffiutigisaaq akiliuteqartoq iluanaarutaasunut ilanngaateqartitaasimangippat. Aalajangersakkap siunertaraa ilanngaateqarfigisassatut pisinnaatitsissutaasutut agguataarinerit nassatarisaannik siunertarineqanngitsumik marloqiusamik akileraaruteqartitsinnginnermik aalajangersakkap nassataqassannginneranik isumannaarinissaaq. Pinngitsuuisitsineq iluanaarutinut § 86 malillugu tunngavigisatut akileraaruteqartitanut iluanaarutinut atuutinngilaq.

Aalajangersakkami siunertaavoq iluanaarutit ilanngaatigineqarsinnaasut malitsigisaannik siunertaanngitsumik aalajangersakkap marloqiusamik akileraannginnissamik siunertaqannginnissaata qulakkeerneqarnissaa. Akileraannginnissamut aallaaviatigut ilaanngillat ingerlatseqatigiiffiutigisaaq piginnittuni appasinnerusuni iluanaarutinik tunniussinermi ilanngaateqarsimappat, ilanngaat akunnattumik qaffasissuseqartumik iluanaarutinik tunniussinermi akileraarummik illuatungilerneqarnani. Tassunga ilaapput akuleriimmik aningaasaatit.

Assersuut:

Kalaallit Nunaanni ingerlatseqatigiiffik nunami allami ingerlatseqatigiiffiutigisamut aningaasaliivoq. Ingerlatseqatigiiffik taanna tulliani nunami isumaqatigiisummut ilaanngitsumi ingerlatseqatigiiffiutigisami aningaasaliivoq, aningaasaliineq allap aningaasaliineratut isigineqarluni (akiitsut). Nunami isumaqatigiisummut ilaanngitsumi ingerlatseqatigiiffimmut akornaniittumut akiliineq tassaassaaq ernianik akiliineq ilanngaatigineqarsinnaasoq (kiisalu ilanngaataasinnaasut). Nunalli akornanni akiliineq iluanaarutinik akiliinertut akileraarutaasussaannngitsutut isigineqarpoq, Kalaallit Nunaanni piginneqatigiiffimmut pingaarnerusumut ingerlateqqinneqarsinnaasut. Pisumi tassani iluanaarutit Kalaallit Nunaanni piginneqatigiiffimmut pingaarnerusumut isertitanut akileraaruserneqartunut ilanngunneqassapput.

Nunani allani aallaaveqartuniit iluanaarutit allat pineqarpata taakku aallaaviatigut aningaasarsianut akileraarutaasussanut ilanngunneqassapput, tak. § 14, imm. 1, nr. 3, aalajangersagarlu manna. Nunani allani iluanaarutit ilanngaatigineqarsimasunut akileraarutinut § 69 malillugu ingerlatseqatigiiffik ilanngaateqarnissamut periarfissaqarpoq. Aningaasalli ilanngaatigineqartut

naalagaaffimmi allami, Danmarkimi imaluunniit Savalimmiuni aningaasarsiat ilaasa akileraarutaasimasut aamma Kalaallit Nunaanni aningaasarsiat akileraarutaasimasut tamarmik akornanni pissutsit malillugit kalaallit nunaanni akileraarutit tamarmiusut ilaannit annertunerussanngillat.

§ 38 i, imm. 3-mi siunnersuutigineqartumi aalajangersarneqarpoq ingerlatseqatigiiffik, kapitali 3 b-mut ilaanissamut toqqaasimasoq, iluanaarutit tunniunneqarnerinik ilanngaateqassanngitsoq.

§ 38 j-mi siunnersuutigineqartumi ingerlatseqatigiiffiup iluanaarutit akileraarutininik ilanngaateqartinnissaanut pisussaatinneqarpoq.

Aallaaviatigut iluanaarutininik tunniussinerni tamani 24 pct.-imik iluanaarutit akileraaruserneqassapput. Iluanaarutininik akileraarutit ilanngaatigineqarneri § 88 naapertorlugu malittarisassat malillugit pivoq. Malittarisassat § 86 naapertorlugu aalajangersakkanut allanut naapertuupput. Taamaalilluni ingerlatseqatigiiffiup iluanaaruteqartitsisup tunniussineq, iluanaarutininik akileraarummik ilanngaassineq akiliinerlu pillugit paasissutissanik piffissaliussap aalajangersimasup iluani akileraaruseriffimmut tunniussisussaanerani allannguisoqanngilaq. Suut iluanaarutaanerannik nassuiaat aamma taannaavoq. Tamanna aamma agguaassilluni tunniussinernut § 87, imm. 1-3-mut ilaasunut atuuppoq. Tassani pineqarput ingerlatseqatigiiffiup sulisut piginneqataassutaannik utertitsilluni pisinera, børsimi nalunaarsugaasut ingerlatseqatigiiffiit piginneqataassutininik utertitsillutik pisinera aamma ingerlatseqatigiiffiit ingerlatseqatigiiffimmut allamut piginneqataassutininik tunisisimasup pingaarnertut piginneqataasunut sulianik unitsitsinermi iluanaarutininik tunniussinerit. Aamma pisuni taakkunani 24 pct.-imik iluanaarutininik akileraarutit ilanngaatigineqassapput.

Imm. 2 siunnersuutigisaq tassaavoq imm. 1-imut tunngatillugu ilaatitsinnginneq, iluanaarutininik akileraarutininik appasinnerusunik aalajangiisoq, atuuttusaaq ingerlatseqatigiiffik akileraaruseriffik kommunitut akileraartarfittut pigissappagu, takuuk § 68, imm. 2.

Kisiannili § 38 j, imm. 3-mi siunnersuutigineqartumi aalajangersarneqarpoq, nammineq kapitali 3 b-mut ilaasutut isigineqartunit, Kalaallit Nunaannut ingerlatseqatigiiffimmut tamakkiisumik akileraartussaasumut piginneqatigiiffik pingaarnerusumut tunniussinermi iluanaarutininik akileraarutit, ilanngaatigineqassanngillat. Taaguut piginneqatigiiffik pingaarnerusoq § 38 h, imm. 7-imi piginneqatigiiffik pingaarnerusumut nassuiaammut naapertuuttumik, paasineqassaaq.

Tamannali atuutinngilaq iluanaarutininik tiguneqarsimasunik inatsisit malillugit piginnittuunngitsumiit nunami allami ingerlatseqatigiiffimmit tiguneqartuninik ingerlatseqatigiiffik iluanaarutininik ingerlateqqillugit tunniussisimappat. Aalajangersakkami siunertaavoq nunani allaniit iluanaarutininik marloqiusamik akileraarutaannginnissaannik anguniagaqarluni ingerlatseqatigiiffittut

aqqusaagassatut Kalaallit Nunaanni piginneqatigiiffik pingaarnerusup atorneqarnissaata pinngitsoortinnissaa.

Nr. 10-mut

Pineqartoq tassaavoq § 75, imm. 1, nr. 4-mut kinguneqartitsisutut naqqiut, § 19 b-mut innersuussissut peerneqarluni, tassaalluni siunnersuutip § 19 b-mik atorunnaarsitsinerata malitsigisaa.

Nr. 11-mut

Siunnersuutigineqarpoq § 101, imm. 6-imi akissarsiatigut uninngatitsisarnermut qummut killiliussaq " 30 pct."-imit "1/3"-imut qaffanneqassasoq.

§ 2-mut

Imm. 1-imut

Siunnersuutigineqarpoq inatsit ulloq 1. januar 2024-mit atuutilissasoq ukiorlu aningaasarsiorfik 2024 aallarnerfigalugu sunniuteqalerluni.

Imm. 2-mut

Erseqqissarneqarpoq ulloq 1. januar 2018-ip kingorna aallartiffeqarluni ukiumi aningaasarsiorfiusumi amigartoorutit amigartoorutinik nuussisinnaaneq pillugu malittarisassanik allanguinissamik siunnersuut malillugu ukiut qulit tikillugit nuussisoqarsinnaasoq. Ukiut siuliini aningaasarsiorfiusuni amigartoorut malittarisassat atuuttut malillugit ukiut aningaasarsiorfiusut tallimat sinnerlugit ingerlateqqinneqarsinnaanngillat.

Imm. 3-mut

Ulloq 1. januar 2024 sioqqullugu taarsigassarsianit erniat aamma aningaasat nalinginit iluanaarutit siunnersuutigisatut ernianut akileraarusiissutaasumit pinngitsuuiffiussanerata siunnersuutigineqarpoq. Taamaattorli tamanna nakkutigisaasutut taarsigassarsianut tunngasunut ernianut ilaassanngitsoq siunnersuutaavoq. Tassalu Kalaallit Nunaanni inatsisitigut inuttut naatsorsuussap imaluunniit aalajangersimasumik ingerlatsivimmik aamma nunani allani illua'tungerisap akornanni taarsigassarsiat pineqarlutik, pineqartut taakku § 36 a, imm. 1-2 malillugit ingerlataqarnermi aalajangeeqataanngittarnermik atugassaqarlutik nioqquteqarnissamut pisussaaffeqartuullutik.

Ilanngussaq 1

Siunnersuut inatsimmut atuuttumut sanilliullugu	
<i>Oqaasertaliunneqartut atuuttut</i>	<i>Siunnersuut</i>
	§ 1 Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi, ilaatigut Inatsisartut inatsisaatigut nr. 11, 15. november 2007-imeersukkut, Inatsisartut inatsisaatigut nr. 11, 1. december 2021-meersukkut, kingullermillu Inatsisartut inatsisaatigut nr. 30, 25. november 2022-meersukkut allanngortinneqartumi, makku allannguutigitinneqarput:
§ 14, imm. 1, nr. 3 3) aktianit anpartinillu, taamaattoq tak. § 86, piginneqataanermut uppersarsaatinit (andelsbevis) pappiaranillu aningaasanik nalilinnit iluanaarutisiatigut aningaasarsiat, taamaattoq tak. § 34, imm. 1, nr. 7. Andelsbevisinit iluanaarutisiatut isigineqarput suulluunniit peqatigiinnit sullivimmilluunniit piginneqataasunut ukiumi aningaasarsiorfimmi kingullermi imaluunniit siusinnerusumi iluanaarutinit pisassaqaatitut tunniunneqartut tamarmik, tunniussat iluanaarutinit agguagarsiatut (dividende) imaluunniit peqatigiiffiup ingerlatsiunnaarneratigut agguagarsiatut pineqarsimappata assigiimmik, aammalu	1. § 14, imm. 1, nr. 3-mi oqaaseqatigiit siulliit ima oqaasertaqarput: “Aktianit piginneqataassutinillu, taamaattoq tak. § 86 aamma § 38 j, imm. 1, piginneqataanermut uppersarsaatinit pappiaqqanillu aningaasanik nalilinnit assingusunit iluanaarutitigut aningaasarsiat, taamaattorli tak. § 34, imm. 1, nr. 7.”
§ 19 b. Akiliunneqarluni angalanerit § 34, imm. 1, nr. 15-imi taaneqartut eqqaassanngikkaanni, akiliunneqarluni angalanerit nalingi aningaasartuutitut sulisitsisup angalanermut akiligaannut, aalajangersarneqassapput, taamaattoq takuuk imm. 2 aamma 4.	2. § 19 b atorunnaarsinneqarpoq, §19 c-milu oqaaseqatigiit siulliit ima oqaasertaqarput: “ Ukioq isertitaqarfimmit 2023 aallarnerfigalugu §19, imm. 2-4-mi, §19 a, imm. 2, nr. 1-2-mi aamma § 19 a, imm. 4-6-imit nalit procentimik aaqqiissummik nalimmassarneqarput.”

<p>Imm. 2. Taamaattoq Kalaallit Nunaanni aallarfiup Kalaallit Nunaannut ornigassamut uterlugulu imaluunniit Kalaallit Nunaanni aallarfiup K�benhavnimut uterlugulu akornanni ataasiarluni akiliunneqarluni angalanerup nalinga, nr. 1-3-mi annertussusiliussanit annertunerusinnaangilaq. Angalanermi akigititaq K�benhavnimut angalanerup akianit annertunerunngippat, K�benhavnimukarnissamut taarsiullugu ornigassaq alla Kalaallit Nunaannut toqqaannartumik timmisartumik attaveqartoq atorneqarsinnaavoq. Angalanermut aningaasartuutitut uppersaateqanngippat, takuuk imm. 1, akiliunneqarluni angalanerup nalinga aalajangersakkami matumani ilaatinneqartoq aalajangersarneqassaaq: Angalanermut aningaasartuutitut uppersaateqanngippat, tak. imm. 1, aalajangersakkamut tassunga ilaasut akiliunneqarluni angalanerup naliga imatut aalajangersarneqassaaq:</p> <ol style="list-style-type: none"> 1) 17.680 kr. angalanermut ataatsimut (2022-imi qaffasissuseq). 2) 8.840 kr. angalanermut ataatsimut (2022-mi qaffasissuseq) marlunniit aqqanilinnut ukiulinnut meeqqamut ataatsimut. 3) 1.760 kr. angalanermut ataatsimut (2022-mi qaffasissuseq) marluk inorlugit ukiulinnut meeqqamut ataatsimut. <p>Imm. 3. Ullut ilai inuussutissarsiornermut siunertanut aammalu ullut allat nammineq inuttut siunertanut atorneqartillugit angalanerit nalingi imm. 1-imituulli akileraaruserneqassapput, nalinga ullunik inuussutissarsiornermut siunertanut atorneqartunut naleqqiussilluni annikillisinneqassalluni. Taamaattoq angalaneq feeriarnerup, qaangiuttoornerit</p>	
--	--

<p>sulinngiffeqarfiginerisa, sulinngiffeqarnerup imaluunniit nammineq inuttut siunertap taamaaqataata sivisussusaa uninngaarnerup 50 procentianit sivisunerusimappat imaluunniit ullunit ataqatigiissuni 5-init sivisunerusimappat, aatsaat angalaneq akileraaruserneqassaaq</p> <p>Aammattaaq piumasqaataavoq inummut tunngasup naliga minnerpaamik 1.000 kr.-mik annertussuseqassasoq. Oqaaseqatigiit siulliit aappaallu malillugu naatsorsuinermi ulluni angalaffiusuni arfininngornerit, sapaatit ulluinnarnilu nalliuttut ilaatinneqassanngillat. ”Ullut nalliuttut” paasineqassaaq tassaasut ukiutoqqap ullua, ukiortaap ullua, kunngit pingasut ulluat, sisamanngorneq illernartoq, tallimanngorneq tannaartoq, påskip ullua, påskip ulluata aappaa, tussiarfissuaq, qilaliarfik, pinsip ullua, pinsip ulluisa aappaat, Kalaallit Nunaanni inuiattut ullorsiorneq, juullip unnukkuutaava, juullerujussuaq aamma juullip naggataa.</p> <p>Imm. 4. Feeriarnissaq siunertaralugu sulisup nalinginnaasumik najugaqarfiata aammalu suliffiugallartussap, imaluunniit aalajangersimasumik suliffiusussap, pineqartup sulinermini uninngaarfigeqqusaanngisaata akornanni angalanerit, angalanermut ataatsimut 2.000 koruuninik akileraaruserneqassaaq.</p> <p>§ 19 c</p> <p>§ 19 c. Ukioq isertitaqarfiusoq 2023 aallarnerfigalugu ilanngullugulu § 19, imm. 2-4mi, § 19 a, imm. 2, nr. 1-2-mi, § 19 a, imm. 4-6-imi aamma § 19 b, imm. 2, nr. 1-3-mi naligitat akigititanik naleqqussaanermut procentiliussamik iluarsineqassapput. Nalingi koruunit aningaasartaannut iluitsumut qaninnermut annikillisinneqassapput. Akileraartarnermut ingerlatsiviup ukiup</p>	
--	--

<p>isertitaqarfiusup annertussusiliussat atuuffissaata siuliani kingusinnerpaamik qaammatisiutit malillugit ulloq 10. oktobari ukiumut isertitaqarfiusumut annertussusiliussat atuuttut ukiumoortumik nalunaarutigisassavai.</p>	
<p>§ 22, imm. 5 Imm. 2-mi maleruagassaq naapertunngikkaluarlugu selskabit il.il. taamaattoq akileraarutitigut nalikilliliisinnaapput, pigisap nalikillilerneqarsinnaasup imm. a-mi aamma b- mi pineqartup tuninerani akileraarutitigut iluanaarutigineqarnerata naleqqataannik. Selskabip il.il. tamatuma kingorna aningaasarsiai akileraaruteqaataasussat amigartooruteqartumik angusaqarfiuppat taava akileraarutitigut nalikilliliinerit amigartoorutaasup nalinganut naapertuuttumik annikillilerneqassapput.</p> <p>"</p>	<p>3. § 22-mi imm. 5 atorunnaarsinneqarpoq matuminngalu taarserneqarluni: "Imm. 5. Pigisap imm. 2, nr. 1-2-mi pineqartoq tunineqarpat akileraartussaasup iluanaarut ukiumi tunisiffiusumi aningaasarsiaminut akileraaruteqaataasussanut ilanngutinngissinnaavaa, ukiup tunisiffiusup kingorna ukiup aningaasarsiorfiusup naanissaa kingusinnerpaamik sioqqullugu pigisap as- sigisaanik, atorneqarnerminilu siunertaatut atugassamik pisisoqarpat, tunisinernullu atatillugu iluanaarut akileraaruteqaataasussaq pigisap pissarsiarinerata nalinganit nalikillilerneqarsinnaasumit tamakkiisumik ilanngaatigineqarsinnaappat. Oqaaseqatigiinni siullerni taaneqartutut pisoqartillugu iluanaarut akileraaruteqaataasussaq pigisap pissarsiarineqartup nalinganit nalikillilerneqarsinnaasumit ilanngaatigineqassaaq. Oqaaseqatigiit 1-2 aatsaat atorneqassapput piseqqinnissaq akileraartussaasup ukiumut tunisiffiusumut tunngatillugu nammineerluni nalunaarsuiffimmi nalunaarutigisimappagu. Tamatuma saniatigut imm. 1-2 atorneqarnissaannut piunasaqataavoq akileraartussaasup ukiup tunisiffiusup kingorna ukiumi nammineerluni nalunaarsuiffiusumi akileraarutitut imaluunniit akitsuutinut kinguaattoorutinik 100.000 kr.-t sinnerlugit akiitsoqannginnissaa." " Imm. 6. Pigisap assinga pissarsiarineqartutut isigineqassaaq, pigisamik tunniussinissaq pillugu allaganngorlugu isumaqatigiissut</p>

	<p>pituttuisoq piffissaliussap imm. 5-imi oqaaseqatigiinni siullerni allassimasup iluani atsiorneqarsimappat, pigisamillu tunniussinissaq ukiup tunisiffiusup kingorna ukiut aningaasarsiorfiusut pingajuannit kingusinnerusumik pissanngippat. Pigisap ukiumi aningaasarsiorfiusumi ingerlatseqatigiiffiup nalikilliliilluni aallartiffigisinnaasaani tunniunneqartutut isigineqassaaq.</p> <p><i>Imm. 7.</i> Imm. 5-imi imaluunniit imm. 6-imi piffissaliussatut aalajangersakkat iluanni pigisap assigisaanik pissarsisoqanngippat, imaluunniit iluanaarut ukiumi pigisamik pissarsiffiusumi pigisap nalinganit nalikillilerneqarsinnaasumit ilanngaatigineqanngippat, iluanaarut ukiup aningaasarsiorfiusup iluanaaruteqarfiusup naaneraniit ukioq paasineqarfia tikillugu qaammatit aallartinneri tamaasa 1,0 procentimik tapeqartillugu, ukiumi aningaasarsiorfiusumi kingullertut taaneqartumi aningaasarsianut akileraaruteqaataasussanut ilanngunneqassaaq."</p>
<p>§ 30, imm. 1 Aningaasarsiat akileraaruteqaataasussat ukiumi aningaasarsiorfimmi naatsorsorneqartut amigartoorpata, amigartoorutit taakkua ukiuni aningaasarsiorfinni tullerni qaninnerpaani tallimani aningaasarsiat akileraaruteqaataasussat naatsorsorneqarneranni ilanngaatigineqarsinnaapput. Piffissami tassani ilanngaatissaq taamaattoq ukiumut aningaasarsiorfimmu kingusinnerusumut aatsaat nuunneqarsinnaavoq ukiumi aningaasarsiorfimmi siusinnerusumi aningaasarsiat akileraaruteqaataasussat naatsorsorneranni tamakkerluni atorineqarsinnaanngippat.</p>	<p>4. § 30, imm. 1-imi oqaaseqatigiit aappaata kingornanut ilanngunneqarpoq: "Akileraartussaasunullu ukiup aningaasarsiorfiusup amigartooruteqarfiusup kingorna ukiut aningaasarsiorfiit 5-iat tikillugu ukiuni aningaasarsiorfiusuni tamani nammineerluni nalunaarsuiffimmik tunniussinissamut piffissaliussaq nallertinnagu tamanna pillugu akileraaruseriffimmu nalu-naaruteqartartunut aammalu amigartoorutit ilanngaatigineqarsinnaasut sinneruttut pillugit paasissutissanik nalunaaruteqartartunut, kiisalu akileraartussaasup naatsorsuutininut tunngasunik, amigartoorutinik naatsorsuinissamut atugassanik tamanik, amigartoorutit ilanngaatigineqarnerisa kingorna ukiut 2-t</p>

<p>Aningaasarsiat akileraaruteqaataasussat ukiumi aningaasarsiorfimmi naatsorsorneqartut amigartoorpata, amigartoorutit taakkua ukiuni aningaasarsiorfinni tullerni qaninnerpaani tallimani aningaasarsiat akileraaruteqaataasussat naatsorsorneqarneranni ilanngaatigineqarsinnaapput. Piffissami tassani ilanngaatissaq taamaattoq ukiumut aningaasarsiorfimmut kingusinnerusumut aatsaat nuunneqarsinnaavoq ukiumi aningaasarsiorfimmi siusinnerusumi aningaasarsiat akileraaruteqaataasussat naatsorsorneranni tamakkerluni atorineqarsinnaanngippat.</p>	<p>tikillugit toqqortarinninnissaanik nalunaaruteqartunut piffissaliussaq oqaaseqatigiinni siullerni taaneqartoq ukiunik 10-nik sivisussuseqarpoq. Oqaaseqatigiit 3-vi malillugit nalunaaruteqarnerit il.il. akileraaruseriffiup innersuussutigisaatut qarasaasiatigut pissapput. Naatsorsuutitut tunngasut qinnuigineqarnermiit kingusinnerpaamik ullut 60-it qaangiunneranni akileraaruseriffimmut tunniunneqassapput. Paasissutissat suut nalunaarutigineqarnissaat, atortut suut akileraartussaasumit toqqortarineqarnissaat pillugit maleruagassanik erseqqinnerusunik, aamma immikkut ittunik pisoqartillugu piffissaliussamik qaangiinerup akuerineqarnissaa pillugu maleruagassanik Naalakkersuisut aalajangersaasinnaapput."</p>
<p>§ 34, imm. 1, nr. 11 11) Selskabinit nunani allani, matumani aamma Danmarkimi Savalimmiunilu, angerlarsimaffeqartuni aktiaatinit anpartiutinilluunniit iluanaarutisiat, selskabinit il.il. § 1, imm. 1, nr. 3, 4, 6, 7 aamma 9-mi taaneqartunit pissarsiarineqartut. Tamannali taamaallaat atuuppoq selskabip iluanaarutisianik pissarsisup, selskabip piginnittuusup, selskabimi iluanaarutisianik tunniussaqaqartumi, selskabimi pigineqartumi, aktiatigut anpartitigulluunniit aningaasaatit minnerpaamik 25 procentii piffissami ataannartumi sivikinnerpaamik ukiumi ataatsimi, piffissallu taassuma iluani iluanaarutisianik agguaassiffiusimasussami pigisimappagit,</p>	<p>5. § 34, imm. 1, nr. 11, ima oqaasertaqarpoq: "11) Iluanaarutit ingerlatseqatigiiffiit il.il. § 1, imm. 1, nr. 3, 4, 6, 7 aamma 9-mi taaneqartut, ingerlatseqatigiiffinni nunani allani angerlarsimaffeqartuni aktiaatiminnit piginneqataassuteqarnermiluunniit pissarsiaat. Tamannali aatsaat atuuppoq ingerlatseqatigiiffik iluanaarutininik pissarsisoq tassaappat piginneqatigiiffik pingaarnersisoq kapitali 3 b-mi pineqartunut ilaanngitsoq, tak. § 38 h, imm. 7, kapitali 3 b-mi ilaanngitsoq."</p>
<p>§ 34, imm. 1, nr. 15 15) akeqanngitsumik angerlarsimaffittut najukkamut angalanerup nalinga namminersortuni pisortaniluunniit atorfilinnut Kalaallit Nunaanni tjenestemandinut maleruagassat atuuttut malillugit</p>	<p>6. § 34, imm. 1, nr. 15, ima oqaasertaqarpoq: "15) Angalanerit nalingi a) sulinermut atatillugu, kiisalu inunnut siulersuisuni, ataatsimiititaliani, isumalioqatigiissitani, siunnersuisoqatigiinni, immikkut qinikkani allatulluunniit</p>

<p>tunniunneqartartoq. Akeqanngitsumik angalasarneq akileraaruserneqarneq ajortoq, aalajangersagaq una malillugu ukiumut angalanermut ataatsimut taamaallaat atuuppoq, aammalu</p>	<p>ataatsimoorfiusuni, tamatumani ilanngullugit Naalakkersuisunut, Inatsisartunut kommunalbestyrelsinullu ilaasortanut ikiortinulluunniit tunniunneqartartut, imaluunniit</p> <p>b) namminersortuni pisortaniluunniit atorfilinnut Kalaallit Nunaanni tjenestemandinut maleruagassat malillugit atorfeqartunut angerlarsimaffimmut tunniunneqartartut. Akiliunneqarlunili angalaneq akileraaruteqaataasussaannngitsoq litra taanna malillugu ukiumut ataasiinnaavoq."</p>
<p>§ 36 imm. 1, nr. 3 3) selskabip peqatigiiffiulluunniit allanit aningaasaliiffigineqarnerata (akiitsui) ukiup aningaasarsiorfiusup naanerani selskabip namminerisanik aningaasaataanut sanilliullugit 2:1-mut annertunerusumik annertussuseqarpata.</p>	<p>7. § 36 c, imm. 1, nr. 3-mi allassimasoq "2:1" allanngortinneqarpoq ima "4:1".</p>
	<p>8. § 36 d-p kingornanut ilanngunneqarpoq: "§ 36 e. Kinaluunniit ingerlatseqatigiiffinnut il.il. imm. 2-mi pineqartunut akiitsut erniaannik akiliinernut pisassanngortitsinernulluunniit tamanut atatillugu akiliisoq pisassanngortitsisorluunniit erniat tamarmiusut 25 procentiannik uninngatitsissaaq. Aningaasat unerartinneqartut taaneqarput "ernianut akileraarutit". Ernianut akileraarutinik uninngatitsisussaatitaapput ingerlatseqatigiiffiit il.il. § 1, imm. 1, nr. 3, 4, 6, 7 aamma 10-mi pineqartut. Ernianut akileraarutit unerartinneqartut § 81-imi maleruagassat naapertorlugit akilerneqartussanngussapput. § 76, imm. 3-mi aalajangersagaq taamatutaaq atuutissaaq. Killilimmik akileraartussaasut § 2, imm. 1, nr. 10, 12, 14, 15, aamma § 2, imm. 2-mi 3-milu pineqartut aningaasarsiat akileraaruteqaataasussat naatsorsorneranni ernianut aningaasartuutinik ilanngaateqarsinnaassanngillat, erniat inummit</p>

	<p>oqaaseqatigiinni siullerni pineqartumit akilerneqarsimasuugunik ernianut akileraarutunik uninngatitsiffigineqarsimasussaagaluarpata.</p> <p><i>Imm. 2.</i> Aalajangersagaq atuuppoq inatsisit naapertorlugit inuttut isigineqarsinnaasunut imaluunniit inunnut nunani allani angerlarsimaffeqartunut, Danmark Savalimmiulluunniit ilanngullugit, akiliinernut imm. 1-imi pineqartunut. Ima pisoqarnerani ernianut akileraarutunik akiliisoqassanngilaq:</p> <p>1) Ernianik akileraarusiineq, marloriaammik akileraarnissaq pinngitsoorniarlugu Kalaallit Nunaata nunallu, ingerlatseqatigiiffiup il.il. tiguisup angerlarsimaffiata akornanni isumaqatigiissut naapertorlugu taamaatiinnarneqarpat appartinneqarpalluunniit.</p> <p>2) Kalaallit Nunaanni piginneqatigiiffik pingaarnerusoq il. il., ingerlatseqatigiiffimmi tiguisumi, tak. § 36 a, imm. 1-2, piffissami atasuinnarmi sivikinnerpaamik ukiumi 1-imi nammineerluni toqqaannartumik toqqaannanngikkaluartumilluunniit aalajangiisinnaassuseqarluni sunniuteqarpat.</p> <p>3) Ingerlatseqatigiiffik tiguisoq il. il., piginneqatigiiffimmi pingaarnerusumi il.il. Danmarkimi, Savalimmiuni nunamiluunniit Kalaallit Nunaata marloriaammik akileraarnissaq pinngitsoorniarlugu isumaqatigiissuteqarfigisaani angerlarsimaffeqartumi aalajangiisinnaassuseqarluni sunniuteqarpat, ingerlatseqatigiiffillu il.il. taanna Danmarkimi, Savalimmiuni nunamiluunniit tassani maleruagassat malillugit ernianut tunngatillugu, taamaaliornissamut piumasaqaatit eqquutsinneqarpata CFC-mik akileraartinneqarsinnaappat.</p> <p>4) Erniat nunami allami minnerpaamik 15 procentimik akileraaruserneqarnerat, aammalu</p>
--	--

	<p>erniat nunami allami ingerlatseqatigiiffimmut il.il. allamut, erniat 15 procentimit minnerusumik akileraaruserneqarfissaannut ingerlateqqillugit akilerneqannginnerat ingerlatseqatigiiffiup tiguisisup il.il., uppersarsarsinnaappagu.</p> <p>5) Pineqartut tassaappata nunami allami, matumani aamma qallunaat Danmarkimi Savalimmiormiulluunniit naalagaaffimmi oqartussaasumit, naalagaaffiup ataani ingerlatsivimmit, imaluunniit nunat assigiinngitsut kattuffiannit il.il. taarsigassarsiat, taarsigassarsisitsineq niuernermi nalinginnaasumik atugassarititanik tungaveqarluni pinngippat.</p> <p>Imm. 3. Ingerlatseqatigiiffimmut il.il. nunami allami angerlarsimaffeqartumut akiitsut tamakkerlugit akilerneqarneranni tamani tamakkerlugit akiliisup pappiaranit nalilinnit iluanaarutit akileraaruteqaataasussat 25 procentiat unerartissavaa. Tassanili taamaallaat pineqarput pappiaranit nalilinnit iluanaarutit nunami maani pisassarisatigut, ima piumasaqaatitallit akiitsut tamakkerlugit akilerneqalerpata nali, piffissami pilersinneqarfianni nalingannit annertunerusoq siumut annertussusileriigaq tungavigalugu akilerneqartussatigut pinngortut, akiligassalik tassaappat ingerlatseqatigiiffik imaluunniit peqatigiiffik il.il. § 1, imm. 1, nr. 3, 4, 6, 7 aamma 10-mi pineqartoq, imaluunniit aalajangersimasumik ingerlatsivik § 2, imm. 1, nr. 10, 12, 14, 15, aamma § 2, imm. 2 aamma 3-mi pineqartoq. Pappiaranit nalilinnit iluanaarutit akileraaruteqaataasussat naatsorsorneqassapput, pisassarisap piffissami pilersinneqarami nalingata aamma tamakkerlugit akilerneqalerpata akiligassat isumaqatigiissutaasut nikingassutaattut. Akiliineq akilersuinikkut pippat</p>
--	--

	<p>ilanngunneqassaaq taassuma ilaa, illua´tungaani tamakkiisumik akilerneqartussat pisiarinerata akianik ilanngakkat illua´tungaani lu tamakkiisumik akilerneqartussat assigiinnngissutaannut naapertuuttoq. Imm. 1-imi 2-milu maleruagassat taamatuttaa atuuatissapput."</p>
	<p>9. § 38 g-p kingornanut ilanngunneqarpoq:</p> <p style="text-align: center;">”Kapitali 3 b <i>Ingerlatseqatigiiffiit iluanaarutiminnik ilanngaateqarsinnaanngitsut</i></p> <p>§ 38 h. Ingerlatseqatigiiffiit § 1, nr. 3 naapertorlugu akileraartussaasut, sulianillu imm. 2-3-mi pineqartunik ingerlataqartut kapitalimi matumani maleruagassani pineqartunut ilaanissartik toqqarsinnaavaat. Tamanna aamma ingerlatseqatigiiffinnut imm. 4-mi pineqartunut atuuppoq, tamanna pitinnagu Naalakkersuisut akuersisimappata.</p> <p><i>Imm. 2.</i> Imm. 1 atuuppoq akileraartussaasunut, akileraartussaasup kaaviiartitaasa ikinnerpaamik 90 procentii Aatsitassat pillugit ingerlatallu tamatumunnga pingaarutillit pillugit Inatsisartut inatsisaat naapertorlugu piaanissamut, Erngup nukingata nukissiornermut atorneqartarnera pillugu Inatsisartut inatsisaat naapertorlugu atuinissamut imaluunniit Sermip erngullu niuernikkut iluaqutigineqarnissaat pillugu Inatsisartut inatsisaat naapertorlugu atuinissamut akuersissuteqarfigineqarsimaneri malillugit ingerlataneersuuppata. Akileraartussaasup ingerlataanut aamma ilaasinnaapput ingerlatat imm. 3-mi oqaaseqatigiinni siullerni taaneqartut, akileraartussaasoo Erngup nukingata nukissiornermut atorneqartarnera pillugu Inatsisartut inatsisaat naapertorlugu atuinissamut akuersissutigineqarsimappat.</p> <p><i>Imm. 3.</i> Imm. 1 aamma atuuppoq akileraartussaasunut, akileraartussaasup</p>

	<p>kaaviiartitaasa ikinnerpaamik 90 procentii innaallagiq Kalaallit Nunaanni erngup nukinga atorlugu nukissiuutineersoq atorlugu suliffissuarmi innaallagissamik annertuumik atuisumi tunisassiornermik, nukissiornermi atortussanik tunisassiornermik, serverit nakkutigineqarfiinik imaluunniit paasissutissat toqqaannartumik toqqorterneqarfiinik isumaginnilluni ingerlataneersuuppata. Akileraartussaasoq ingerlatseqatigiiffimmut ingerlatseqatigiiffiutigisaassaaq imm. 2-mi pineqartumit, akuersissummillu akileraartussaasup ingerlataanut tunngavissiisumik pigisaqartumit pigineqartoq, imaluunniit akileraartussaasoq ingerlatseqatigiiffik taanna peqatigalugu suliffeqarfissuarmut immikkoortortalimmut atasuussaaq, tak. § 36 a, imm. 4.</p> <p><i>Imm. 4. § 1, nr. 3</i> naapertorlugu akileraartussaasoq piginneqatigiiffimmit imm. 1-3-mut pineqartumi ingerlatseqatigiiffiutigisaaguni, imaluunniit taanna peqatigalugu suliffissuarmut ataguni kapitalimi matumani pineqartunut ilaasinnaavoq, akileraartussaasup suliai ingerlatanut imm. 1-3-mi pineqartunut qanimut attuumassuteqarpata, assersuutigalugu umiarsualivinni atortorissaarutininik, usingiaanermi, usilersuinermi aserfallatsaaliuinermilu atortorissaarutininik ingerlatsinikkut, tunisassiornermi atortussanik pisiortorlunilu tuniniaanermik ingerlatsinikkut. Innaallagissamik imaluunniit nukissiornermi atortussanik Kalaallit Nunaanni tunisassiarineqartunik tuniniaaneq eqqaassanngikkaanni, ingerlataq Kalaallit Nunaanni atuisunut nioqutissanik sullissinernillu tuniniaanissamik siunertaqassanngilaq. Ingerlatseqatigiiffiuttaaq ingerlatai ingerlatseqatigiiffinnut Kalaallit</p>
--	---

	<p>Nunaanni angerlarsimaffeqartunut toqqaannartumik unammillertuussanngillat.</p> <p><i>Imm. 5.</i> Ingerlatseqatigiiffiit, imm. 1-4-mi piumasaqaatinik naammassinnittut, ukioq aningaasarsiorfiusoq piumasaqaatinik naammassinniffiusoq siulleq aallarnerfigalugu kapitalimi matumani maleruagassani pineqartunut ilaanissaq toqqarsinnaavaat. Ingerlatseqatigiiffinnut imm. 4-mi pineqartunut tunngatillugu tamanna pitinnagu Naalakkersuisut akuerseqqaarsimassapput, tak. imm. 1. Toqqaaneq akileraaruseriffiup innersuussinera malillugu ukiup aningaasarsiorfiusup aallartinnissaa kingusinnerpaamik qaammammik ataatsimik sioqqullugu akileraaruseriffimmut nalunaarutigineqassaaq. Oqaaseqatigiit siulliit malillugit toqqaaneq ingerlatseqatigiiffimmut piffissami sivikinnerpaamik ukiuni aningaasarsiorfiusuni 5-ini pituttuisuuvoq, taamaattorli tak. imm. 6. Kinaluunniit ingerlatseqatigiiffiup imm. 1-4-mi aalajangersakkani pineqartunut ilaasinnaanera pillugu ilisimannittariaqartutut isigineqassanersoq, siumut akuersissummik allanngortinneqarsinnaanngitsumik akileraaruseriffimmut qinnuteqarsinnaavoq. Siumulli akuersissummik allanngortinneqarsinnaanngitsumik qinnuteqaat ingerlatseqatigiiffimmut imm. 4-mi pineqartumut tunngasuuppat siumut akuersissut Naalakkersuisunit akuerineqassaaq.</p> <p><i>Imm. 6.</i> Akileraaruseriffiup kapitali manna naapertorlugu akileraartinneqarnissamut ilaalernerup ilaajunnaarnerullu qanoq pinissaat aalajangersassavaa, tassungalu ilanngullugu atugassarititaasunik aalajangersaasinnaalluni. Akileraartussaasoq imm. 1-4-mi piumasaqaatinik ukiumi aningaasarsiorfiusumi naammassinnikkunnaarpat,</p>
--	--

	<p>ingerlatseqatigiiffiup kingusinnerpaamik ukiup akileraarusiiffiup kingorna ukiup aningaasarsiorfiusup tulliuttup aallartinneraniit kapitali manna naapertorlugu akileraartinneqarnermut ilaajunnaarnissaa akileraaruseriffiup aalajangiiffigissavaa atugassarititaasullu aalajangersassallugit. Saneqqutsinerilli immikkut ittunik pissuteqarpata, imaluunniit saneqqutsinerit soqutaanngippata qaangiuttussaappataluunniit akileraaruseriffik immikkut akuersissuteqarsinnaavoq.</p> <p><i>Imm. 7.</i> Ingerlatseqatigiiffik pingaarnertut isigineqarpoq ingerlatseqatigiiffiit, ingerlatseqatigiiffimmi iluanaarutisiaqartitsisumi, ingerlatseqatigiiffiutigisami aktiatigut piginneqataassuteqarluniluunniit aningaasaatit minnerpaamik 25 procentiinik, piffissami atasuinnarmi sivikinnerpaamik ukiumik 1-imik sivilussuseqartumi, taassumalu iluani iluanaarutitik agguaassiffiusussami, pigisaqartut.</p> <p><i>Imm. 8.</i> Piginneqatigiiffiutigisap iluanaarutisariatitai tassaapput ingerlatseqatigiiffiup ingerlatseqatigiiffimmi pigisami aktiaateqarluni piginneqataassuteqarluniluunniit aningaasaatit minnerpaamik 25 procentiinik, piffissami atasuinnarmi sivikinnerpaamik ukiumik ataatsimik sivilussuseqartumi, taassumalu iluani iluanaarutitik agguaassiffiusussami pigisaqartup, iluanaarutai.</p> <p>§ 38 i. Ingerlatseqatigiiffiit § 38 h, imm. 1-5-imi taaneqartut, kapitalimi matumani maleruagassani pineqartunut ilaasut aningaasarsiaat akileraaruteqaataasussat inatsimmi maleruagassat nalinginnaasut, aalajangersagaq una malillugu</p>
--	---

	<p>allannguuteqartut malillugit naatsorsorneqassapput.</p> <p><i>Imm. 2.</i> Aningaasarsianut akileraaruteqaataasussanut ilanngunneqassanngillat piginneqatigiiffiutigisami iluanaarutit, tak. § 38 h, imm. 8, imaluunniit iluanaarutit, iluanaarut akileraarutaannik § 86 malillugu inaarutaasumik uninngatitsiffigineqartoq. Oqaaseqatigiilli siulliit taamaallaat atuupput iluanaarutisianut, taamaattorli tak. § 86, ingerlatseqatigiiffiup iluanaarutisiaqartitsisup aningaasarsiaasa akileraaruteqaataasussat naatsorsorneranni iluanaarutininik agguanneqartunik ilanngaatisimannngisaanut atuupput. Oqaaseqatigiinni siullermi aalajangersagaq aamma atuutinngilaq iluanaarutisianut, iluanaarutit agguanneqartut ingerlatseqatigiiffiutigisap annikinnerusumik pigineqartutut ilanngaatigippagit, ilanngaallu iluanaarutit agguanneqartut akunnattumik annertussusilimmik akileraaruserneqarnerannik illua'tungilerneqanngippat.</p> <p><i>Imm. 3.</i> Ingerlatseqatigiiffiit kapitalimi matumani maleruagassani pineqartut iluanaarutit agguassaas, § 27 apeqquataatinnagu, sukkulluunniit ilanngaatigineqarsinnaanngillat.</p> <p>§ 38 j. Ingerlatseqatigiiffiit § 38 h, imm. 1-4-mi pineqartut, kapitalimi matumani maleruagassani pineqartut § 86, imm. 1 aamma 2 apeqquataatinnagit, iluanaarutininik tunniussinermi iluanaarutinit akileraarutit 24 procentiusut uninngatissavaat, taamaattorli tak. imm. 2. Aningaasat uninngatinneqartut iluanaarutinit akileraarutininik taaguuteqartinneqarput, inaarutaasumillu akileraarutaallutik. Uninngatitsineq iluanaarutinit piumasarineqartunit allanit,</p>
--	---

	<p>matumani aamma aktiaateqarluni ingerlatseqatigiiffiup piginneqataassuteqarluni ingerlatseqatigiiffiulluunniit piumasarisaanit, salliutinneqassaaq. Uninngatitsineq akileraaruseriffimmullu il.il. nalunaaruteqarneq § 88-imi maleruagassat naapertorlugit pissaaq.</p> <p><i>Imm. 2.</i> Pisunili imm. 1-imi taaneqartuni iluanaarutinit akileraarutit annertussusii 14,67 procentiussapput, akileraaruseriffik ingerlatseqatigiiffiup iluanaarutininik tunniussisup kommunitut akileraarfigippagu, tak. § 68, imm. 2.</p> <p><i>Imm. 3.</i> Iluanaarutinilli akileraarutit annertussusii 0 procentiussapput, pissarsisooq ingerlatseqatigiiffiuppat alla kapitali 3 b-mi pineqartoq. Oqaaseqatigiit siulliit atuutissanngillat iluanaarutit ingerlatseqatigiiffimmit Kalaallit Nunaanneersumeersut, ingerlatseqatigiiffiup taassuma ingerlatseqatigiiffiutigisat nunami allami angerlarsimaffeqartumi aktiaatiminit toqqaannartumik toqqaannangitsumilluunniit pissarsiaanik agguaasseqqinnermit pisuuppata, ingerlatseqatigiiffillu Kalaallit Nunaanneersoq iluanaarutininik pissarsiarineqartunik piginnittuiusimanngippat.</p>
<p>§ 76, imm. 1, nr. 4, 1. pkt. “Ajunngitsorsiat § 19, imm. 2-4-mi, § 19 a-mi aamma § 19 b-mi pineqartut, atorfeqarnermi atugassiissutigineqartut nalingi.”</p>	<p>10. § 75-imi, imm. 1, nr. 4-mi oqaaseqatigiit siulliit ima oqaasertaqarput: “ Ajunngitsorsiat § 19, imm. 2-4-mi aamma § 19 a-mi pineqartut, atorfeqarnermi atugassiissutigineqartut nalingi.</p>
<p>§ 101, imm. 6 Imm. 6. Imm. 1-imiit 5-imut malillugit ilanngaassuineq pissaaq akiliuteqarneq inatsit manna malillugu akileraarutininik A-nik ilanngaassinertaqaraluarpalluunniit. Ilanngaatigisat annertunerpaamik tunniunneqartunit akileraarutit A-nik ilanngareerlugit 30 procentiinik annertussuseqarsinnaapput.</p>	<p>11. § 101, imm. 6-imi oqaaseqatigiit aappaanni ”30 procent” allangortinneqarpoq ima: "1/3".</p>

	<p style="text-align: center;">§ 2</p> <p>Inatsisartut inatsisaat 1. januar 2024-mi atuutilissaaq, ukiorlu aningaasarsiorfiusoq 2024 aallarnerfigalugu atuutissalluni.</p> <p><i>Imm. 2.</i> Amigartoorutit akileraaruteqaataasussat ilanngaatineqanngitsut taamaallaat § 1, nr. 4 malillugu ukiut aningaasarsiorfiusut tallimaat qaangerlugu ilanngaatineqarsinnaapput, ukiumi aningaasarsiorfiusumi ulloq 1. januar 2018-imi kingusinnerusumiluunniit pinngortuugunik.</p> <p><i>Imm. 3.</i> § 1, nr. 8 akiitsunit ernianut iluanaarutinulluunniit ulloq 1. januar 2024 sioqqullugu pilersimasunut, atuutinngilaq. Tamannali erniat iluanaarutillu, § 1 imaluunniit § 2 Aningaasarsianit akileraarutit pillugit Inatsisartut inatsisaat naapertorlugu, akileraartussaasup inatsisit naapertorlugit inuttut isigineqarsinnaasunut § 36 a, imm. 1-2-mi taaneqartunut, akiitsuinut (nakkutigisaasumik akiitsut) tunngasuuppata, atuutissanngilaq.</p>
--	---

Ilanngussaq 2**Tusarniaaneq pillugu allagaqaat**

Siunnersuut pillugu uku tusarniaanermi akissutaat tiguneqarput, Sulisitsisut, Grønlands Revision, BDO, IMAK, Meeqqanut, Inuusuttunut Ilaqutariinnullu Naalakkersuisoqarfik, Ineqarnermut Attavilersuutinullu Naalakkersuisoqarfik aamma Aalisarnermut Piniarnermullu Naalakkersuisoqarfik.

Tusarniaaffigineqartut uku siunnersuummut oqaaseqaateqarlutik tusarniaanermi akissutinik nassiusaqarput: Grønlands Revision, Sulisitsisut, GrønlandsBanken, BDO aamma Qeqqata Kommunia.

Tusarniaaffigineqartut akissutaasa immikkoortui pingaarnertit nalinginnaasumik naqinnilerlugit issuarneqarput, Naalakkersuisullu akissutigisinnaasaat *uingasumik* naqinnilerlugit allaqqallutik.

Grønlands Revision (GR)

Inatsisissatut siunnersuut inuusutissarsiortunut aamma akileraartarnermut aqutsisoqarfimmut, oqilisitsinernik, sukaterinernik, pisariillisaarnernik ajornakusoortitsilernernillu imaqarpoq. Siunnersuutip saqqummiunneqartup akileraartarnermi aamma akileraartarnermik allaffissornikkut aqutsinermi oqilisaassutinik pisariillisaanernillu siunnersuummi saqqummiisoqarnera ataatsimut isigalugu pitsaasuvoq, pingaartumik malittarisassat akileraarutinik akiliinngitsooriaannaasoqarneranik imaluunniit akileraarutinik isertitat tunngavigalugit isiginninneq aallaavigalugu silatusaartumik nassuiarneqarsinnaanngippata.

GR-ip uparuarppaa, malittarisassat ajornaatsut paasiuminartullu pingaaruteqartut, tassa pisortani namminersorlutillu inuusutissarsiuteqartuni sulisunik piginnaasalinnik sulisussarsiortarneq, sulisut sulisoriinnarneqartarnerat ilinniartitaanerallu unamminarmata, naammagittaalliuuteqarnissamullu periarfissaviit killeqarmata nalorninarlutillu. Malittarisassat tamassumunnga tunngavilersuilluarnani allanngortinnginnissaat pingaaruteqarpoq. Taamaammat malittarisassat paasiuminaannerat, allaffissornikkut aqunneqarnerisa ajornakusoornert pisortanut namminersorlutillu inuusutissarsiuteqartunut iluaqutaanngillat, isumaqatigiinnginnissanullu tunngaviliillutik.

Tusarniaanermi akissut immikkoortumi tassani inatsisut il.il. pillugit ataatsimut isummersuutinik imaqarpoq, taakkulu allannguinernik kinguneqanngillat.

GR pingaarnertut isumaqarpoq:

- Pissarsianit ilanngaait aamma ingerlatseqatigiiffiutigisap pissarsiaasa akileraarusinnginnissaannik atorunnaarsitsineq pillugu siunnersuut pitsaasumik isumaqarnermik tunngaveqarunarpaq, kisianni inatsisissatut siunnersuutip naggataatigut kingunissaa akileraarusiinerit tamarmiusut naggataatigut 43 %-iunissaanik aningaasaliisullu

oqilisaaneq pillugu malittarisassanik atuisinnaasut ikittuinnaanerannik siumut isummerneq pissutigalugu iluatsinngitsuussaaq

- Akileraarutitigut amigartoorutinik atuisinnaanermut piffissarititap sivitsornera pitsaasuvoq, kisianni inatsisilernermi teknikki allaffissornermilu aaqqiissut ajornannginnerulersinneqartariaqarput
- Nalikippallaanut killigititap oqilisinnera nunanut allanut naleqqussaaneruvoq pitsaasoq
- Ernianik akileraarusiineq isumarput malillugu inuussutissarsiutini nuussissarnerni maannakkut atuutinnilaq, siunersuullu taamaammat ajornartorsiutit inuussutissarsiutini takusinnaanngisatsinnik inatsisiliornerut isikkoqarpoq
- Iluanaarutinik nalikilliliisarnermik ilaatigut atorunnaarsitsineq oqimaaqatigiinngitsunik sunnuteqassaaq. Pissarseqqinnermi akitsuutinik kinguartitsisarneq pillugu malittarisassanik allannguinnermi inuussutissarsiutitut periarfeerutsitsinermik kinguneqariaannaavoq.
- Angalanerit sulisitsisunit akilerarneqartut pillugit malittarisassanik piumarnerulersitsineq iluarineqararpoq, tassa malittarisassat atuuttut malittarisassiorniaannartut isikkoqarmata.

Tusarniaanermi akissut inatsisissatut siunnersuummi immikkoortunut pingaarnernut isummanik pitsaasunik ajortunillu imaqarpoq. tusarniaanermi akissummi immikkoortut ataasiakkaat eqqarsaatigalugit ataani oqaaseqaatit innersuussutigineqarput.

Inatsisissatut siunnersuummut nassuiaatini qupperneq 15-imi allaqqavoq IT-mi nalunaarsuiffiit atuuttut ilaatigut inatsisissatut siunnersuut una siunissami taparserneqarsinnaassappat taarserneqassasut. Aamma allaqqavoq, inatsisissatut siunnersuut akileraartarnermut aqutsisoqarfimmi ukiumut suliffiit marluk pisariaqartinnerannik kinguneqassasoq, aammalu 2 mio. kr.-nik aningaasartuuteqarnerulernermik kinguneqassasoq. Aamma allaqqavoq akileraartarneq pillugu inatsisissatut siunnersuummi akileraarutinit isertitaqartoqassanngitsoq missingerneqartoq.

Kalaallit Nunaanni ingerlatseqatigiiffinnut namminersorlutillu inuussutissarsiuteqartunut ukiorpassuarni kukkunersiuisutut akileraartitsisarnermi ajornakusoortitsiartortoqarnera misiginikuarput, kingunera tassaavoq akileraartarnermut aqutsisoqarfimmi piffissaq suliassanik sularinneqartarfik maannakkut sivisoorujussuusoq. Avataanit isigalugu pisariaqartunik piginnaasalinnik sulisussarsiortarnerup iluatsitsiviunnginnera suliassarpassuillu taamaammat akileraaruseriffimmi suliassanik sularinnittartunut piginnaasalinnut ikittuinnarnut suliassanngortinneqartarnerat pissutaapput.

Siunnersuummi akileraartarnermut aqutsisoqarfimmi ukiumut suliffinnik 2-nik sulisoqarnissamik pisariaqartitsinerup annertusinera IT-milu nalunaarsuiffiit atuuttut inatsisissatut siunnersuutip kingunerisa iliuuseqarfigineqarnissaannut naammangitsutut ilimagineqartoq naggataatigullu minnerunngitsumillu ilimagineqartoq inatsisissatut siunnersuut 0 kr.-nik isertitaqarfiusussatut ilimagineqartoq tunngavigalugit inassuteqaateqarpugut, inatsisissatut siunnersuutip ilai

pisariaqarluinnartuunersut suullu ilaatigut taamaatinneqartariaqarnersut imaluunniit ilaatigut akileraartarnermut aqutsisoqarfik eqqarsaatigalugu kinguartinneqartariaqarnersut naalakkersuisoqarfiup sukumiisumik isumaliutigissagaa.

Inatsisissatut siunnersuummi immikkoortut ataasiakkaat ”inatsisissatut siunnersuummut nassuiaatini” allassimanerattut tulleriinnilerlugit ataani oqaaseqaateqarfigaavut.

Oqaaseqaat tamanut tunngasumik oqaaseqaataasutut isikkoqarput, taannalu siunnersuummik allannguuteqarnermik kinguneqanngilaq.

Siunnersuutip allaffissornermut kinguneqarnissaanut tunngatillugu, oqaatigineqassaaq allaffissornermi kingunissai kapitali 3 b-mi malittarisassat qanoq annertutigisumik atorneqarnissaannut atatorujussuusut. Taamaalilluni inuussutissarsiutit immikkoortuini pineqartuni Kalaallit Nunaanni aningaasaliisoqassanersoq ingerlatseqatigiiffiillu kapitali 3 b-mi malittariassanik toqqaassanersut apeqqutaavoq. taamaattoqarpat aningasaliinernik, ingerlatseqatigiiffiit akileraaruteqarnerannik aningaasaqarnermilu ingerlatsinernik kinguneqassasoq ilimagineqarpoq. Akerlianik ilimagineqarpoq immikkoortumi suliniutip piviusungortinneqanngippata allaffissornermi kingunissai killeqassasut. Tamanna siunnersuutip aningaasatigut kingunissaani allaaseriniarneqarpoq. Tulliullugu allaffissornermut kingunissaasa ilai akileraarutininik nakkutilliinerup annertunerulernissaannik pisariaqartitsinermut atapput. Assersuutigalugu pissarsiaqaqqittarneq pillugu malittariassami kinaassusersiortoqannginnera pissarsiaqaqqinnissamut piumasaqaatit eqqortinneqarnersut ingerlatseqatigiiffiit namminneq nalilersuissapput, ullumikkut piussutsit akerliannik tamassuminnga akuerineqarnissamik qinnuteqartoqassalluni. Tamassuma qinnuteqarnermi suliaqarnissaq annikillisippaa akileraartarnermilli nakkutilliinissamik pisariaqartitsineq annikillisinnagu.

Akissulli siunnersuummut atatillugu isumalluutininik atuinerup isumaliutigeqqinnissaanik kinguneqarpoq. Tamassuma kingorna siunnersuutip sunniutissaanik tamarmiusunik nalilersuineq tunngavigalugu siunnersuut ingerlassinnaajumallugu sulisut 1-imik ilaneqassapput.

Ingerlatseqatigiiffiit akileraartarnerannut IT-mi nalunaarsuiiffimmik nutaamik siunissami ineriartortitsinissaq, inatsisissatut siunnersuummut uunga tunngassuteqaannangilaq, ilaatigullu teknikikkut nalinginnaasumik ineriartornerup ilaatigullu akileraaruseriffimmik ingerlatsinernik pitsaangorsaannissamik kissaateqarnerup akileraartarfimmilu sulisut suliaannik nammineerlutik suliaqarunnaartarnissaannik kissaateqarnerup kinguneralugu. Eqqorporli inatsimmi allannguutissatut siunnersuutit IT-mit taperserneqassappata pingaartumik akileraartitsisarnernik nutaamik pisariaqartitsinernik kinguartitsinermut tapersiissasut.

GR ingerlatseqatigiiffiutigisanit pissarsiat akileraaruteqanngitsut aamma pissarsiat ilaanni ilanngaateqarsinnaatitaanerup atorunnaarsinnera pillugit oqaaseqaateqarpoq, ingerlatseqatigiiffiup

isertitaanik naatsorsuinerup naatsorsuuserinermi, aningaasaqarnermi ingerlatseqatigiiffiillu pillugit inatsisini ingerlatseqatigiiffimmi aningaasaatinik pissarsiaqartitsinermut attuumassuteqartitsiunnaarnermi eqqarsaateqassuit pitsaasuusinnaasut.

Siunnersuut nunat tamat akornanni aningaasaliisartunit oqaaseqaatinit aallaaveqarnersoq GR uku pillugit isumaqarpoq

1) Pissarsiat ingerlatseqatigiiffimmut pissarsisitsisumut ilanngaataasinnaanerannik Kalaallit Nunaanni periutsip naleqqutinnginnera. Ingerlatseqatigiiffiup (ingerlatseqatigiiffiup suliniutilluunniit ingerlannera tunngavigalugu isigalugu) ingerlatseqatigiiffik akileraaruserneqartussaataitasunik qaqugukkut sinneqartooruteqarnersoq amigartooruteqarnerlorluunniit aamma ingerlatseqatigiiffimmi piginnittut pinneqataajunnaarnissamik kissaateqarneranni ingerlatseqatigiiffimmit aningaasanik akiliinerup piffissatigut assigiinngissutaat ilungersornartoqartitsisoq.

2) Kalaallit Nunaanni ingerlatseqatigiiffinnit aningaasanik tigusernermi akileraarutit tamarmiusut naggataatigut 42%-usut (ingerlatseqatigiiffinnut aatsitassarsiorturnut 36%), naalakkersuisullu pissarsiaat tamarmiusut nunat tamat akornanni pissutsit isigigaanni qaffasittut.

Aningaasaliisinnaasut aamma Namminersorlutik Oqartussanut siunnersortit qanoq isumaqarnerat nassuiaatini nalinginnaasumi ataatsimut isigalugu allaaserineqarput. Eqqorpoq siunnersuummi siunertaq tassaasoq Kalaallit Nunaanni aningaasaliinissap pilerinarnerulersinneqarnissaa. Siunnersuummi peqatigitillugu oqimaaqatigiissumik ineriartortitsinissaq aamma Kalaallit Nunaanni sinneqartoorutit pilersinneqartut Kalaallit Nunaanni akileraaruserneqarnissaasa mianerinissaat taparserneqarpoq.

GR isumaqarpoq, attuumassuteqannginnissamik kissaateqarneq aatsitassarsiornermi aamma sermimik imermillu tunisassiornermi aningaasaliisuinnarnut killilerneqanngitsoq aammali piginnittorpassuarni nunani allaneersunit ataatsimut isigalugu kissaataasoq.

GR oqaaseqaateqarpoq, ingerlatseqatigiiffiit akileraarutaat tamarmiusut naggataatigut 43 procentiusut, tassanilu ilaasut aatsitassarsiornermi ingerlatseqatigiiffiit ingerlatseqatigiiffiilu sermimik imermillu tunisassiorturnut. Taamaalluni aatsitassarsiornermi ingerlatseqatigiiffiit pissarsiarititaannut 7 procentimik qaffaaneq pineqarpoq.

GR isumaqarpoq, ingerlatseqatigiiffiit aatsitassarsiorturnut akileraarutaat qaffasippallaartoq pissarsiaqartitsinernullu akileraarnermut malittarisassat naleqqutinngitsut aatsitassarsiornermi ingerlatseqatigiiffiit isumaat oqariartuuteqarnerallu allannguummi malinneqanngitsoq. Allannguneq aatsitassarsiornermi nunat tamat akornanni aningaasaliisut isumaat aallaavigalugu piumasqaatinik sinaakkutaasumillu atugassaritneqartunik allannguneruvoq, tamannalu Kalaallit Nunaanni nunanit tamanit aningaasaliinerni nalornilersitsivoq kajumissuseqartitsiunnaarlunilu, tassa

nunat tamat akornanni aningaasaliisartut sinaakkutaasumik atugassarinneqartut allanngoranngitsut tulluartullu pingaartittorujussuummatigit.

Siunnersuummili naalakkersuisut pissarsiaat tamarmiusut 43%-iusut pillugit isornartorsiuneq naaperiarneqarpoq. Ingerlatseqatigiiffiit akileraarutaat tamarmiusut naapertuilluartut 43 %-iunissaaannik aningaasaqarnermut naalakkersuisoqarfimmit siumut isummiunneqareersutut isikkoqarnera pissutigalugu, siunnersuutip naggataatigit kingunissaa iluatsinngilaq.

Oqaaseqaatit allannguinerneq kinguneqarput, tassa siunnersuutigineqarmat ingerlatseqatigiiffiit aatsitassarsiortunit pissarsianit akileraarutit procentiat nutaaq atuutilersinneqassasoq. Ingerlatseqatigiiffiit aatsitassarsiortut eqqarsaatigalugit ataaniittut innersuussutigineqarput.

Soorlu siunnersuummi takuneqarsinnaasoq pissariaqartut, tassaasut piginneqatigiiffiit pingaarnerusut aktiaatillillu allat immikkoortinneqarput. Immikkoortitsineq taanna nunat tamat akornanni akileraarutit pillugit inatsisinut atatillugu atugaasorujussuuvoq. Pissarsiat aktiaatilinnut allanut akileneqartut procentimik qaffasinnerusumik procentilertarnerat qaqutigoortuunngilaq. Uani pissarsiat piginnittup namminerisamik inuunermi atugaanut ingerlatseqatigiiffimmulluunniit annikinnerusunik aktiaateqartunut sunniuteqarani aningaasaliinertut aningaasanilluunniit inissiinertut nuunneqartut pineqarsinnaapput.

Kalaallit Nunaata, marloqiusamik akileraartitsisarnermik isumaqatigiissuteqartoqanngippat, pissarsiat isertitanit akileraarutit 24 procentimik imaluunniit 14,67 procentimik akileraarusissavai, taamaaliornikkut akileraarutit tamarmiusut assigissavaat 43 procenti imaluunniit 36 procenti. Siunnersuummi katillugit 43 procentimik akileraarusiisoqarniarnerat ingerlatseqatigiiffiup kommuni akileraarfissaa immaluunniit ingerlatseqatigiiffiit aatsitassarsiortut 36 procentimik akileraartarnerat apequtaatinnagu pissarsiat ullumikkut aallaaviusumik 42-44 procentimik akileraaruserneqartussaanerannut atavoq. Tamanna aamma inunnut Kalaallit Nunaanni najugaqartunut nunanit allanit pissarsiaqartunut atuuppoq.

Kalaallit Nunaanni aktiaatilimmut pissarsianit akileraarutit procentiat inuit tunisinerneq akitsuutinik aallaaviusumik akileraartinneqartannginnerannut atatillugu aamma isigineqassaaq. Aamma aktiaatillit nalinginnaasut assersuutigalugu akissarsialinnut isertitaminnit akileraartussaanerannit sakkukinnerusumik akileraartinneqarnissaat tulluartinneqanngilaq. Aamma inuit nunanit allaneersut aktiaatillit aktiaatilinnit Kalaallit Nunaanneersunit sakkukinnerusumik atugassaqartinnissaat tulluartinneqanngilaq.

GR oqaaseqaateqarpoq, aatsitassarsiortunermi ingerlatseqatigiiffiit aamma ingerlatseqatigiiffiit sermimik imermillu tunisassiorlut ilanngaasiisinnaatitaanerisa atorunnaarsinnerata kingunera tassaassasoq, Danmarkimut, Savalimmiunut Norgemullu marloqiusamik akileraartitsisarneq pillugu isumaqatigissutit atuuttuni piginnittuunik (piginneqatigiiffik pingaarnerusooq) Danmarkimi,

Savalimmiuni, Norgemi Islandimilluunniit angerlarsimaffeqarpat pissarsianit akileraarutit 0%-imut imaluunniit 5%-imut appartinneqassasut.

GR oqaaseqaateqarpoq marloqiusamik akileraartitsisarneq pillugu isumaqatigiissusiornissaq sivirusartoq aningaasaliisullu inatsisit atuuttut piffissami aningaasaliiffimmi atuuttut isiginiassagai. Taamaammat GR isumaqarpoq aningaasaliisinnaasut nunat taakku 4-t ilaanni angerlarsimaffeqartut ikittuararsuit inatsimmik allannguutissatut siunnersuutigineqartumik iluaquteqassasut.

GR oqaaseqaateqarpoq, taamaallaat Norge aatsitassarsiornermut suliniutinik misilittagaqartoq aamma Norge Islandilu erngup nukinganik nukissiuuteqarnermik misilittagaqartut.

GR-ip isumaa tassaavoq, aningaasaliisut siunnersuutikkut ingerlatseqatigiiffiutigisanit pissarsianik annikinnerusumik akileraaruserneqarnissamik periarfissaqavissunik aningaasaliisoqassanngitsoq, pissutsillu ajunnginnerpaaffianni aningaasaliisinnaasooq ataasiussasooq marluunngikkunilluunniit.

Taamaalilluni inatsisissatut siunnersuummi (katillugit 25%-imik + 5%-imik akileraarusiineq) ajunngitsoq tassaasooq aningaasaliisinnaasut immaqa ikittuararsuussasut. Naalackersuisullu pissarsiarisinnaasaannik tamarmiusunik sakkukillisisineq taamaalilluni nunat tamat akornanni aningaasaliisinnaasunut, Kalaallit Nunaanni suliniutinut ilanngunnissamut naammattunik immikkut piginnaasaqartunut aningaasaateqartunullu neqeroorutiviunngitsoq.

Taamaammat siunnersuut annertungaatsiartutut isikkoqarpoq aammalu aatsitassarsiornermut maannakkut aningaasaliisartunut aamma sermimik imermillu tunisassiornermut aningaasaliisinnaasunut killimmik sunniuteqassasooq sunniuteqaraniluunniit.

Tusarniaanermi akissut GE-mit aamma BDO-mit tunisaanermi akissutit ilanngullugit aatsitassarsiornermik ingerlatseqatigiiffinnut kapitali 3 b-mik toqqaasunut pissarsiat akileraarutaasa appartinnerannik kinguneqarpoq, taamaalilluni akileraarutit tamarmiusut 36 procentiussallutik, taamaalilluni aatsitassarsiornermi ingerlatseqatigiiffiit pissarsianit akileraarutaasa maannakkut procentiata (36 pct.) kalluutinnginnera pigiinnarneqarpoq.

Naalackersuisut naliliipput, Kalaallit Nunaat siunnersuutikkut aningaasaliiffigissallugu pilerinarnerulissasooq unammillersinnaassuseqassasorlu. Nunat Kalaallit Nunaata marloqiusamik akileraartitsisarneq pillugu isumaqatigiissiorfigisai siunissami amerlisinnaapput.

Ilumoorpoq marloqiusamik akileraartitsisarneq pillugu isumaqatigissutit isumatiginiutigineqarnerat piffissartornartartoq, ajornakusoortuusut aammalumi akileraarutinit isertitassanik annaasaqaataasartut. Taamaammat oqimaaqatigiissitsisoqassaaq. Taamaammat isumaqatigiinniarnit aallarnisarnerini inuussutissarsiornermi suliffeqarnermiluunniit pisariaqartinneqartut ersersinniarneqartussaapput. Aamma oqaatigineqassaaq aningaasaliisut

arlaliusinnaasut assigiinngitsunik angerlarsimaffeqarsinnaasut. Taamaammat aningaasaliisartut nunanit allaneersut piginnittuunermik aaqqissuunnissaanut aamma periarfissaqarput, taamaalilluni piginnittuuneq akileraartarnermi oqartussaaffimmini Kalaallit Nunaata marloqiusamik akileraartitsisarneq pillugu isumaqatigiissusiorfigisaani inissillugu. Ilusilersuinerit taamaattut aamma akileraartitsisarneq allaavigalugu aamma akuerisaapput.

Akileraarnermi amigartoorutininik atuisinnaanermut piffissarititap ukiunut 10-nut sivitsorneqarneqarnera pillugu GR oqaaseqaateqarpoq aaqqissuusseqqinnermi piginnittullu nikinneranni killiliineq pillugu malittariassat saniatigut siunnersuutikkut siumut nuussisarnermut malittarisassat assigiinngitsut maannakkut pingasuulersut. Kisianni ukiunut 10-nut siumut nuussineq immikkut nalunaaruteqarnissamik aamma amigartoorutininik nalunaarsuiffimmut nalunaaruteqarnissamik naatsorsuutinilu atortunik uninngatitsinissamik immikkut piunasaqateqarnermik kinguneqassaaq.

Aaqqissuusinerit takku 3-t allaffissornermi kingunissai assinngitsut assigiinngiaartutut tunngavilerluagaanngitsutullu isikkoqarput.

Amigartoorutit naatsorsuuserineri naatsorsuinerit tunngaviit aamma akileraarutininik naatsorsuineri tunngaviit akornanni piffissanut assigiinngissutit allat tunngaviusumik assigaat. Ilaatigut aningaasanik pisassa qarfinnit annaasat ilanngaatigineqarnerat, akileraartarnermi nalikilliliinerit kinguartinneqartut, umiarsuarnik, timmisartunik ingerlatsinermilu atortunik tunisineri, akitsuutininik kinguartitsinerit, ingerlatseqatigiiffinni aktianik piginneqataassutinillu tunisineri akileraarusiineq pineqarput.

Inatsisissatut siunnersuummut nassuiaatini tunngaviusumik isiginninneq aallaavigalugu akileraartussaataasut amigartoorutininik ilanngaateqartariaqarnerat, allassimasoq GR-ip innersuussutigaa. Tamanna isumaqatigaarput, tassa aatsaat aningaasat (ilanngaasiilluni) iluanaarutaappata inuiaqatigiinnut akileraarutininik akiliisitsisoqartariaqarmat.

GR isumaqarpoq, siunnersuut pisuni immikkut ittuni tunngavilersorneqanngitsutut isikkoqartoq, tassa amigartooruterpiaat aatsitassarsiornermi ingerlatseqatigiiffiit aamma sermimik imermillu tunisassiortut pinnagit inuussutissarsiutit immikkoortuini allani ukiut 5-it qaangerlugit siumut nuunneqarnissaannik kissaateqarneq akileraartarnermut aqutsisoqarfimmut akileraartartunullu pisariaqanngitsunik allaffissornermi suliakkersuutaassammat. GR uparuaavoq, akileraaruseriffik akileraartartullu ukiunut 10-nut siumut nuussisoqarsinnaalersillugu sivitsuineri allaffissornermi suliakkerneqarnerat tunngavilersugaarpasinngitsaq, aamma naatsorsuuserineri naatsorsuinerit akileraarutinillu naatsorsuinerit piffissami assigiinngissutaat allat pillugit qulaani assersuutit assigalugit allaffissornermi suliakkersuutaasut.

GR siunnersuuteqarpoq ukiunut 5-init siumut nuussisinnaatitaaneq nalinginnaasoq ukiumut 10-nut allanngortinneqaannassasoq.

Tusarniaanermi akissut akileraartartut sivisunerusumik piffissaliinermik atuiniartut pisussaaffiunik erseqqissaaniarluni killiliiniarlunilu inatsimmi oqaasertanik nassuiaatinilu erseqqissaanermik kinguneqarpoq. Naalakkersuisut naliliipput sivisunerusumik piffissaliinermut atasunik allaffissornermi suliassat tusarniaanermi akissummi allassimasutut pingaaruteqartiginngitsut. Siunnersuummi siunertaq tassaavoq siumut nuussisinnaanerup akileraartarfiullu suliareqqiisinnaanerata akornanni pitsaanerusumik naligiissitsinissap qulakkeerneqarnissaa. Aalajangersakkami taamaalilluni akileraartartut naatsorsuutiminni naatsorsuutinillu nalunaarsuinermi eqqortumik ingerlatsisut malittarisassamik atuisinnaanerisa siuarsarnissaanik aamma siunertaqartoqarpoq.

GR naliliivoq, aningaasaatikinnek pillugu malittarisassami akileraartartunut ikittuinnarnut atuuttoq, aamma akiitsunik aqutanik ilanngaasiinerup killilenera akileraartarnermi isertitanut tamarmiusunut kinguneqarpiangitsoq.

GR-illi aningaasaatikinnek pillugu malittarisassat sakkukillinerat nunanullu sanilerisatsinnut allanut naleqqussarnerat pitsaasusut isigaa, inuussutissarsiortut malittarisassaata allanut nuunneqarnerat qaqugukku eqqumaffigisariaqaraat killissaq piinnarluguluunniit.

Tusarniaanermi akisut siunnersuummik pitsaasumik isiginninnertut isigineqarpoq allannguinernillu kinguneqarani.

Ernianik akileraarusiineq pillugu GR oqaaseqaateqarpoq siunnersuut annertuujusoq, atuutinngitsunillu imaqaannartoq, taamaalilluni malittarisassaq Kalaallit Nunaanni ingerlatseqatigiiffiit arlaannut ataasiakkaanulluunniit sunniuteqarpiangitsoq.

Kisiannili § 36 e, imm. 2, naggatit 6-ianni oqaasertaliineq ”ernianik nunani allani akileraarut minnerpaamik 15 procentiuvoq erniallu nunani allani ingerlatseqatigiiffimmut allamut akileqqinneqarneq ajorput...” ersernerluppoq nassuiaruminaalluni uppernarsaruminaallunilu.

Taamaammat GR kaammattuivoq oqaasertaliineq erseqqissarneqassasoq peerneqarluniluunniit.

Tusarniaanermi akisut allannguinernik kinguneqanngilaq. Aalajangersakkami siunertaavoq nunani allani ernianik akileraarusiisarneq saneqqunniallugu nunani minnerpaamik akileraarusiinissamik piumasqaammik akileraarusiinissamik eqqortitsisuni, akiligassallit akunnermiliuttunik atuisoqarnissaa pinngitsoortinnissaa. Taamatut ilusilersuinerit assinngitsorpassuanngorlugit ilusilersorneqarsinnaanerisa inatsimmi oqaasertap aamma siamasinnissaa pisariaqartippaa.

Taarsigassarsinermik aaqqissuineramik nalilersuinerimi imarisaa aaqqissuinerullu niuernerimi piviusuunera aamma isiginiarneqassapput.

GR-ip ilimagaa, malittarisassap atuutilersinneqarnissaanut tunngavilersuutaqaarnikuusoq tassani ikuussasoq, aningaasat ingerlatseqatigiiffimmiitillugit inuiaqatigiinnullu iluaqutaasumik aningaasaliissutigineqaqqippata, inuiaqatigiit iluanaarutinit akileraarutitik akileeqqusissanngitsut, akiliinissalli kingusinnerusumut kinguartinnissaa akueralugu. GR isumaqarpoq iluanaarutitik nalikilliliineq akileraarusiinnginnermut takussutissaanngitsoq, piffissarli akiliiffissaq kinguartinneqartoq.

Siunnersuummut tunngavilersuut tassaavoq akileraarutitigut tapiissuteqartoqartoq ingerlatseqatigiiffinnut angisuunut iluaqutaasoq. Tamanna GR-ip isumaa malillugu eqqunngilaq, tassa iluanaarutitik nalikilliliinissanut periarfissat ingerlatseqatigiiffinnut tamanut atuummata, allannguummilu taamaammat ingerlatseqatigiiffiit umiarsuaatillit, timmisartuutillit illuutillilluunniit eqqorneqartut. Kalaallit Nunaanni ingerlatseqatigiiffiit amerlanerpaat nalilinnik taamaattunik 1-imik 3-usunik pigisaqarput, taamaalillutillu siunnersuummit kalluarneqarlutik.

GR isumaqarpoq allannguutissatut siunnersuutigineqartup kingunerigaa pigisaq ataaseq sorleq suliffeqarfimmi pigisanut allanut sanilliullugu tunineqarnersoq soqutaajunnaartoq. Iliuuseqarnissamut kiffaanngissuseqarneq iliuuseqarsinnaanerullu sunniutaa taamaalilluni niuernerimi pissutsinik pissuteqarani akileraartarnermi isumaliutinik aqunneqarnerulerpoq.

Assersuutitut taaneqarsinnaavoq suliffeqarfik 2-nik assigiinnik ingerlatanik pigisaqartoq (assersuutigalugu inuussutissarsiornermi illut 2-t umiarsuillu 2-t), taassumalu illu/umiarsuaq ataaseq tumerusuppa. Siulleq ukiut siuliini akileraartarnermi nalikilliliineq iluanaarutinillu nalikilliliinerit pissutigalugit akileraartarnermi nalikinneruvoq, aappaalu ukiut siuliini akileraartarnermi nalikilliliinerit ukiunilu iluanaarutinillu nalikilliliinerit pigisanut allanut inissinneqarnikuuneri pissutigalugu akileraartarnermi naleqarnerulluni. Akileraartarnermi nalit immaqa pigisat nalilivii takutinngilaat, aamma pigisaq suna ingerlatsinermi taarsissallugu piginnassanerluguluunniit pitsaanerunersoq takutinnagu. Tassani pigisaq akileraartarnermi nalikinnerusoq akileraarutitigut akilersinnaanerussaaq akileraartarnermilu naleqarnerusoq akileraarutitigut akilersinnaanerussalluni akilersinnaananiluunniit. Tunisinissamik isumaliutit taamaammat piffissap ingerlanerani nalaatsornerinnarnik sunnerneqassapput.

GR isumaqarpoq iluanaarutitik nalikilliliineq ingerlatsinermi iluanaarutitik nalikilliliinerimi nalinganik sinneruttumik nalikilliliineq assigigaa. GR isumaqarpoq nalikilliliisarneq pillugu malittarisassani assigiiaartitsinermik tunngavik kinguneqartoq, pigisanik tunisinermi iluanaarutit umiarsuaq, timmisartuq, illu, lastbiili, entreprenørit atortuat pigisarluunniit tigussaangitsoq pineqarnerusoq apeqqutaatinnagu pigisanik akileraarutitigut pigisat allat nalingini apparneqartuni ilanngaatigeqqinneqarsinnaasut. GR-ip isumaa tassaavoq, inatsisissatut siunnersuut

ingerlatseqatigiiffinnik akileraartitsinermut sunniuteqannginnissaanut inatsisissatut siunnersuummi tunngavilersuutigineqartumut tapersiissanngitsoq. Akerlianik akileraartarnermi pissutsit inatsisissatut siunnersuutikkut sunnerneqanngitsoornaviangillat! Aamma pigisat assigiinngiaartut akornanni assigiisitsinissamik sunnerneqannginnissaannilluunnit isumaq atorunnaassaaq.

Tusarniaanermi akissut allannguinerik kinguneqanngilaq. Siulliullugu oqaatigineqassaaq ingerlatseqatigiiffiit sinneqartoorutit ingerlatseqatigiiffinnut akileraartitsisarnermut atuuttumut katersorsinnaagaat. Ingerlatseqatigiiffiit akerlianik iluanaarutininik nalikilliliinerit atorlugit akileraarutininik kinguartitsinissamut periarfissaqarnerat Nunatta Karsianit taarsigassarsineruvoq. Eqqorpoq taamaalilluni taamaallaat kinguartitsineq aallaaviusumik pineqartoq, tassa akileraarutit pigisat allat taakku tunineqarpata, akileraartarnermiluunniit tamakkiisumik nalikillineqarpata akileraarutit kingusinnerusukkut akilerneqassasut. Kisianni akileraarutit pigisat nalikillineqarsinnaatitaasut nutaat pissarsiarineqarpata kinguarateqqinneqarsinnaapput, ilaatigullu aamma ingerlatseqatigiiffik kingusinnerusukkut akiliisinnaajunnaariaannaavoq Nunatta Karsianut annaasaqarneranik kinguneqartumik. Aappassaanik, akileraartarnermi nalikilliliisarneq aallaaviusumik peqqussutaanngilaq. Ingerlatseqatigiiffiit pigisanik ataasiakkaanik qanoq annertutigisunik nalikilliliiniarnerlutik namminneq aalajangersinnaavaat, tamannalu piffissami tunisiffiusumi akileraartarnermi iluanaarutininut annertuumik pingaaruteqarpoq. Taamaalilluni piffissap ingerlanerani nalaatsornerinnaanngillat, kisiannili ingerlatseqatigiiffiup nalikilliliinissanik atuinissamik toqqaanerata kinguneralugu, taamaalilluni piffissat taakku akornanni ingerlatseqatigiiffiup akileraarutaanik annikillitsinerulluni.

Akileraartarnermi nalikilliliinerit naatsorsuuserinermi nalikilliliinernit qaffasinneruppata, tamanna akileraarutininik kinguartitsineruvoq. Naggasiullugu oqaatigineqassaaq, ingerlatseqatigiiffik iluanaarutininik kinguartitsinermut atorneqarsinnaasunik allanik pigisaqarnerasoq, akileraarutininik tapiissutit nalinginut apeqputaasoq. Ingerlatseqatigiiffik mikisoq annikinnerusunik pigisaqarajuttartoq pineqarneranut sanilliullugu ingerlatseqatigiiffiit anginerusut pineqarpata tamassuma pisinnaanera ilimanarneruvoq.

Ingerlatsinermi atortunik sanilliussineq aamma malinneqarsinnaanngilaq, tassa pigisat nalingi iluanaarutininik nalikilliliinerit pillugit malittarisassaniitinneqartut (illuat, umiarsuit timmisartullu) annertusinnaapput, taamaammallu nalikilliliinermi procentit aamma immikkut malittariassaqartinneqarput. Taamaammatt pigisat tassunga atatillugu ingerlatsinermi aningaasartuutit assigalugit nalikillineqarsinnaapput.

GR pissarsiareqqisarnermut malittarisassani kinaassusersiunnginnissaq pillugu isumaqarpoq, malittarisassani aallaaviusumik kinaassusertoqanngitsoq, taamaammallu qinnuteqarnissaq pisariaqanngitsoq. Kisianni nalikilliliisarneq pillugu kaajallaasitami immikkoortoq 2.12-imi maannakkut malittarisassat inatsisip oqaasertaanut namminermut allaqqinneqarnerat

aningaasaqarnermut naalakkersuisoqarfimmit siunertaasimagunartumik ajoraluartumik marlussunnik ajoqutissiisoqarneranik kinguneqarpoq.

Inatsisissatut siunnersuummi allaqqavooq malittarisassap atornissaanut "pigisat assinginik piginnikkunnaarnissaq" piumasagaataasoq. Inatsimmulli nassuiaatini allaqqavooq, pigisap assingata ingerlatseqatigiiffimmut assinganik atuuttumik pisineq pineqartoq. GR siunnersuuteqarpoq "assinganik siunertaqarfiusoq assinganilluunniit atuuttoq" pillugu oqaasertaliineq inatsisip oqaasertaanut namminermut ilanngunneqassasoq.

GR oqaaseqaateqarpoq piginnileqqinnermut piumasagaatit ullumikkut imaattut, akileraartunik akitsuutinillu akiligassanngornikuusunik akiitsorisanillu kinguaattooruteqartoqannginnissaa, piumasagaat piffissami qinnuteqarfimmi eqqortinneqassasoq.

Inatsisissatut siunnersuummi allaqqavooq malittarisassap atornissaanut piumasagaataasoq "akileraartussaataitaasoq ukiumi tunisivimmi akileraarutinik akitsuutinillu akiitsunik kinguaattooruteqassanngitsoq". Siullermik, akileraarutinik akitsuutinillu akiitsunik akiligassanngornikunik qaqugukkut kinguaattoortoqannginnissaa erseqqarluttumik oqaasertalerneqartoq (ukiup aallartinnerani, ukiup naanerani, ukiup ingerlanerani piffissami sumiluunniit allatulluunniit). Aappasaanik, aningaasat annikitsuunissaannut killeqanngilaq. Pingajusnaanik imaassinnaavoq siunertaqartoqanngitsoq imaluunniit akileraartartoq akileraarutinik akitsuutinilluunniit akiligassanngornikunik kinguaattooruteqarnermut pisuunngitsoq.

Assersuutigalugu timmisartumik, umiarsuarmik, umiarsuarmik assartuummik, kilisaammik pigisamillu taarsiinermi pigisamik pisoqqamik tunisinermi iluanaarummik akileraarusiinerup kingusinnerusumut kinguartinneqarsinnaanera kinguartinneqarsinnaannginneraluunniit, ingerlatseqatigiiffiup aningaasaqarneranut annertuumik sunniuteqarsinnaavoq. Aamma ingerlatseqatigiiffik akuersaartoqarsinnaanani kukkusogaqarniluunniit, aamma akileraartarnermut aqutsisoqarfiup, DCR-ip akileraartartulluunniit pisuunera qiviaqqaarnagu, malittarisassamik atuisinnaatitaanersoq.

Pisortat akiligassiineranni akileeqqusiinerilu tamassumalu kingorna akiliinermik ilanngaasiinermilluunniit naatsorsuutinut nalunaarsuinermi "akileraartussaataitaasoq ukiumi tunisiffiusumi akileraarutinik akitsuutinilluunniit akiitsunik akiligassanngornikunik kinguaattooruteqanngitsoq" 100%-imik qulakkeerlugu uppersarnissaa ajornakusoorsinnaavoq.

Aamma ukiumi isertitaqarfiusumi tamassuma kingorna qaammatit pingasut iluanni pigisap assinganik pisisoqanngippat kinguneqartitsineq (iluanaarummik qaammatit aallartinneranni 1%-imik qaffaaneeq), "akileraartussaataitaasup ukiumi tunisiffiusumi akileraarutinik akitsuutinilluunniit akiitsunik akiligassanngornikunik kinguaattooruteqannginnissaanik" piumasagarnissamut

tunnjavilersuut pisariaqanngitsumik malittarisassaasutut isikkoqarpoq ajortorujussuarnik kinguneqarsinnaasoq.

Pisortanut pingaaruteqanngitsunik annikitsunilluunniit akiligassanik kinguaattooruteqarneq aalajangersakkamik siunertarineqanngitsumik atuilersitsisinnaannginneq imaluunniit tapiliussanik inatsimmi aalajangerneqartunik kingusinnerusukkut akileraarusiisinnaannginneq pillugit isumaq Naalakkersuisut paasisinnaavaat. Aamma inatsisip oqaasertaani kinaassusersiorani piunasaqarnissamik aalajangiineq aalajangersakkami kinaassusersiunnginnissamik siunertaqarnermut naapertuuppoq. Tusarniaanermi akissut inatsimmi oqaasertap erseqqissarneqarneranik kinguneqarpoq, taamaalilluni maannakkut erseqqarissumik allaqqalluni, akileraarutininik akiligassanngortoqarsimannginnissaanik akiitsoqartoqannginnissaanilluunniit piunasaqaat ukiumi tunisiffiusumi piffissami nammineq nalunaarsuiffimmik tunniussinermi eqqortinneqarsimassasoq. Aamma siunnersuutigineqarpoq akileraarutit akitsuutillu akilernerneqanngitsut akiligassanngornikut 100.000 kr.-t qaangissanngikkaat. Killigititap taassuma aalajangernerani aningaasat killingisa taakku pisortat suliariumannittussarsiuussinerannut atatillugu atorneqarnerat pingaartinneqarpoq

Sulisitsisut akiligaannik angalanerit akileraaruserneqannginnissaat pillugu GR oqaaseqaatissaqanngilaq. Malittarisassani tukattuni paaarnissaq, malittarisassallu akileraarutininik isertitanut annertuallaanngitsumik kinguneqannginnerat pitsaasuvoq.

GrønlandsBanken

Isertanit akileraarutit pillugit inatsisip aaqqinneqarnissaanik pisariaqartitsineq aningaaseriviup paasisinnaava. Aningaaserivik inatsisissatut siunnersuutip atuarnerrata kingorna inatsisissatut siunnerummi immikkoortut pillugit akerliliissutissaqanngilaq. Siunnersuummi Nunatta Karsiata ilanngaaseereerluni isertitassai pillugit missingersuusiorluartoqarsinnaavoq. Inatsisissatut siunnersuut ilanngaasereerluni malunnartumik isertitsissutaassanngilaq, sulisulli marluk nutaat pisariaqartinneqassapput IT-mik nalunaarsuiffinnik ataatsimut isigalugu nutarsaasoqartussaalluni. Aningaaseriviup akileraaruserfimmi naammattunik isumalluuteqalernissaa IT-milu pitsaasunik nalunaarsuiffeqalernissaa pitsaasutut isigaa, kisianni inuit isumalluutit IT-milu nalunaarsuiffiit pisariaqartut pigineqalersinnagit aqutsiveqarfiup suliakkerneqaaqqinnissaa naleqquttutut isikkoqanngilaq.

Aningaaseriviup paasisaa pingaarneq tassaavoq, inatsisissatut siunnersuut inatsisissatut siunnersuummi iliuuseqarfigineqartussatut kissaatigineqartuni pisariaqartitanut annertunerusumik sunniuteqassanngitsoq, allaffissornermilu suliassanik suli allanik artukkiinnassasoq.

Aningaaserivik isumaqarpoq, isertitanit akileraarutit pillugit inatsit akileraartarnermillu aqutsinermi taakku kinguneri eqqarsaatigeqqinneqarluartariaqartut.

Grønlandsbanken siunnersuuteqarpoq aaqqissuusseqqinnermut ataatsimiititaliamik akileraartarnermi aaqqissuusseqqivinnissamut periarfissanik misissuisussamik pilersitsisoqassasoq. Tamanna siusinnerusukkut misilinneqarnikuuvoq nangitsivittoqarnikuunanili. Siunnersuut tassaasinnaavoq imminut atasumik tamanullu atuuttumik akileraartarneq pillugu inatsiseqarnissamik siunertaqarluni inatsisiliortut ukiuni kingullerni isumaat ilanngunneqassasut. Pingaaruteqartoq tassaavoq Kalaallit Nunaata sunniuteqartumik ajornanngitsumillu akileraaruteqartitsinissap mianerinissaa, Kalaallit Nunaanni innuttaasunit tulluurtut isigineqartumik aamma Kalaallit Nunaannik aningaasaliisartunit nunanit allaneersunit pilerinartitsilersumik, aningaasaqarnermilu ajortunik sunniuteqarfiunngitsumik.

Tusarniaanermi akissut aningaasaqarneq pillugu oqaaseqaatini siunnersuutip aningaasaqarnermi sunniutissaanik tamarmiusunik takussutissiortoqarneranik kinguneqarpoq. Grønlandsbankenip tusarniaanermi akissutaa tamatuma saniatigut tusaatissatut tiguneqarpoq. Naalakkersuisut oqaatigissavaat akileraartarnermi atugassaritinneqartut aningaasaliisartunut nunanit allaneersunut pilerinarnerulersinnissaannik pisariaqartitsineq iliuuseqarfiginiarlugu inatsisissatut siunnersuutip imarisai pingaarnert suliarineqartut, pingaartumik erngup nukinganut akuersissutit unammilleqatigiissutigineqartilernissaat isigalugu. Taamaalilluni siunnersuutip siamasinnerusumik sunniuteqarnissaa siunertaanngilaq, tamannalu siunnersuutip suliarineqarnerani piffissamut sinaakkutit tunngavigalugit isigineqassaaq. Inuussutissarsiutit akileraarutaannik aaqqissuusseqqinnissap aallartinneqarnissaa pilersaarutigineqarpoq, suliarli taanna aatsaat inuit akileraarutaannik aaqqissuusseqqittoqareernerata kingorna ingerlanneqassaaq.

Sulisitsisut (GE)

GE-p maluginiarppaa siunnersuut isertitanit akileraarutit pillugit inatsisip pineqartup allangortinneqarnissaanik pisariaqartitsivinnerup kinguneranik saqqummiunneqartutut isikkoqanngitsoq. GE-lli oqaatigaa Kalaallit Nunaanni erngup nukinganik aatsitassanullu suliniutinut aammalu sermimik imermillu aningaasarsiutigalugu, aningaasaliiffissatut pilerinarnerulersinneqarnissaa siunnersuummi siunertaasoq. Taamatullu GE-p maluginiarppaa nassuiaatini erseqqissarneqartoq, siunnersuutip nunanit allanit, Kalaallit Nunaannik marloqiusamik akileraartitsisarneq pillugu isumaqatigiissuteqartuni, aningaasaliinissaq pilerinarnerulersissagaa.

GE isumaqarpoq – pisortat isaannik isigalugu- siunnersuut IT-nik pisinissamut aningaasartuuteqarnerulernissamik aamma akileraaruseriffimmi sulisoqarnerulernissamik pisariaqartitsinermik tamanna kinguneqassasoq, taanna ilutigalugu siunnersuutip akileraarutininik 0 kr.-nik isertitsissutaasussatut ilimagineqarneranut.

GE isumaqarpoq tamanna kisimi inatsisissatut siunnersuutip akuerineqarnissaanut tunngaviliinngitsoq.

GE allappoq Kalaallit Nunaanni aatsitassaqaarfimmi aningaasaleerusussinnaasut akornanni nalinginnaasumik kissaatigineqartoq, suliassaqaarfimmi tassani aningaasaliisinnaaneq pilerinarnerulersinneqassasoq. GE-lli maluginiarpaq pissarsiat aamma suliffeqarfiit akileraarutaat aatsitassarsiornermi suliffeqarfiit 43 procentimik akileraartinneqartarnissaat attatiinnarneqartoq. GE taamaalilluni isumaqarpoq siunnersuut aatsitassarsiornermi aningaasaliisartunut nunanit allaneersunut pilerinarnerulersitsinngitsoq.

Tusarniaanermi akissut Grønlands Revisionip allallu tusarniaanermi akissutaat ilanngullugit aatsitassarsiornermi suliffeqarfiit kapitali 3b-mi ilaatinneqartut pissarsianit appasinnerusumik akileraartarnissaannik siunnersuuteqarnermik kinguneqarpoq. Kapitali 3 b pillugu Grønlands Revisionip tusarniaanermi akissutaanut akissut innersuussutigineqarpoq.

GE-p oqaatigaa ingerlatseqatigiiffiutigisanit pissarsiat akileraaruserneqartarnerannik sakkukillisitsineq siunnersuummi uani piumasaqaatini akileraarutini annertunerusumik isertitaqarnermik kinguneqarnaviarunangitsoq. Ilimagineqarpoq pissarsianik piginnittoq Danmarkimi, Savalimmiuni, Norgemi Islandimiluunniit angerlarsimaffeqartussaappat aningaasaliisoqarnaviangitsoq aningaaliisussalluunniit ikittuararsuussasut.

Marloqiusamik akileraartitsisarneq pillugu isumaqatigiissutit siunnersuummullu tunngavilersuut pillugit Grønlands Revisionip tusarniaanermi akissutaanut akissut innersuussutigineqarpoq.

Angalanerit sulisitsisunit akilerneqartut akileraaruserneqartarnerisa atorunnaarsinnera pitsaasutut GE-p isigaa.

Tusarniaanermi akissummi siunnersuut iluarineqarpoq allannguuteqarnermillu kinguneqarani.

GE-p oqaatigaa, nammineq “isumaq” malillugu akileraarutinit isertitat 0,00 kr.-unissaannik kinguneqartumik siunnersuusioraanni, peqatigitillugulu akileraaruseriffiup suliakkernerunissaa ilimagineqarluni, pisortallu taamaalillutik aningaasartuuteqarnerulerlutik. Tamanna tunngavigalugu GE-p inassutigaa siunnersuut kinguartinneqassasoq taarsiullugulu Kalaallit Nunaanni akileraartarnermik aqqissuusseqqivinnek piareersarneqassasoq.

Kalaallit Nunaanni akileraartarnermi saniatigut aqqissuussinerit siunnersuummi amerlanerulersinneqarput, taamaalilluni taakkununga allaffissornermi suliagarneq annerulerluni, tamanna inuiaqatigiinnut iluaqutaavissutut isikkoqanngilaq.

Tusarniaanermi akissut tamanut tunngavoq GE-llu tusarniaanermi akissutaata Naalakkersuisunit tusaatissatut tiguneqarnerata saniatigut allannguinerik kinguneqanngilaq. Naalakkersuisut tamatuma saniatigut oqaatigissavaat aningaasaliisartunut nunanit allaneersunut sinaakkutaasumik atugassaritinneqartut pilerinarnerulersinneqarnissaannik

pisariaqartitsisoqartoq. Tamassuma kinguneraa sinaakkutaasumik atugassaritinneqartunut unammilleqatigiissutaanerat pitsaanerulernerat aningaasaliisartunullu pilerinarnerulernerat, peqatigitillugulu Kalaallit Nuaanni akileraartitsisinnaaneramik qulakkeerinniffiusumik akileraartarnermi atugassaritinneqartut sanilliunneqarsinnaalersinneqarlutik naleqqunnerulersinneqarlutillu. Kapitali 3 b-mi akileraartitsinermik suliffeqarfiit atuilinngippata siunnersuutip kingunissai killeqassapput. Akerlianik suliffeqarfinnik kapitali 3 b-mi aaqqissuussinermik atuinissamik toqqaasoqarpat assersuutigalugulu erngup nukinganut annertuunik aningaasaliisoqarpat tamanna ilaatigut inuit suliffeqarfiillu akileraarutaannik annertunerujussuarnik isertitaqartoqarneramik inuiaqatigiinnilu aningaasaqarnermi ingerlatsinerit annertunerulernerannik kinguneqassaaq.

Tamassuma saniatigut Kalaallit Nuaanni sinneqartoorutaalersut Kalaallit Nuaanni aamma akileraaruserneqarnissaannik tunngavimmik akileraartarneq pillugu inatsisit tapersiinnaat tunngaviusumik piumasaqaataavoq. Inatsisissatut siunnersuut tamanna tunngavigalugu suliarineqarpoq, anguniagarli taanna taamaallaat inatsisikkut anguneqarsinnaanngilaq, kisiannili suliffeqarfiit akileraarnermi naatsorsuutaannik il.il. nakkutilliinissaq paasisaqarnissarlu pisariaqarluni. Allaffissornermi kingunissai pillugit Grønlands Revisionip tusarniaanermi akissutaanut akissut aamma innersuussutigineqarpoq.

BDO

Ingerlatseqatigiiffiutigisap pissarsiai akileraarutaannginnissaannik aamma pissarsiat ilaasa ilanngaatigineqarsinnaatitaanerisa atorunnaarsinnera pillugu siunnersuut BDO-p iluaraa, tassa ingerlatseqatigiiffiutigisap pissarsianik akileraarusiinani piginneqatigiiffik pingaarnerusumut akilerneqartarlutik suliffeqarfimmik aaqqissuussisinnaanermik qularutissaanngitsumik pisariaqartitsisoqarmat.

Tusarniaanermi akissut kapitali 3 b nutaaq pillugu siunnersuummik iluarinninnertut isigineqarpoq.

BDO-p oqaatigaa, malittarisassat siunnersuutigineqartut ingerlatseqatigiiffinnit, aatsitassarsiornermik ingerlatseqatigiiffinnit Akileraaruseriffimmik akilerartarnermi kommuneqartunit akileraarutit tamarmiusut qaffannerannik kinguneqassasut, tamannalu akileraarutit 7%-pointimik 36%-imit 43%-imut qaffanneqarnerannik kinguneqavissoq.

Ataaseq eqqaassanngikkaani maannakkut atuinissamik akuersissuteqartunik aatsitassarsiornermi ingerlatseqatigiiffeqarnera ruujorersuilluunniit atorlugit ingerlatseqatigiiffeqarnera piginneqatigiiffik pingaarnerusumut Danmarkimi, Norgemi, Islandimi Savalimmiuniittoqarneranilluunniit iluaqutaasinnaasunik BDO ilisimasaqanngilaq. Taamaammat ingerlatseqatigiiffiit amerlanerit malittarisassanik atuinermi akileraarutit annertusisut qaangerlugit iluaquteqalersinnaanngitsut, taamaammallu malittarisassat atorneqarnaviannngitsut BDO-p ilimagaa.

BDO-p siunnersuutigaa siunnersuut Naalakkersuisoqarfiup allanngortissagaa, taamaalilluni akileraarutit tamarmiusut 43%-iunatik 36%-inik annertussuseqassasut.

BDO-p aamma Grønlands Revisionip allallu tusarniaanermi akissutaat siunnersuutip allanngortinneranik kinguneqarput, taamaalilluni aatsitassarsiornermi ingerlatseqatigiiffiit kapitali 3 b-mi ilaatinneqartut pissarsianit akileraarutaat nutaamik maannakkut procenteqalerlutik. Aamma aatsitassarsiornermi ingerlatseqatigiiffiit akileraarutaat tamarmiusut pillugit Grønlands Revisionip tusarniaanermi akissutaanut Naalakkersuisut oqaaseqaataat, innersuussutigineqarpoq.

BDO siunnersuuteqarpoq ingerlatseqatigiiffiit isertitanit akileraarutit pillugit inatsimmi § 3 a-mi ilaatinneqartut nunani allani illersornissamut oqartussat sinnerlugit suliaqarnermi Kalaallit Nunaanni pinngitsooratik ingerlatseqatigiiffimmik pilersitsinissamik piumasaqaateqarfigineqartut ilanngunneqassasut.

Kalaallit Nunaanni ingerlatseqatigiiffiit entreprenøritut pilersuisutut suliasat suliarineqarnissaanut suleqatigisanik nunanit allaneersunik suliaqarnissaat malittarisassani atuuttuni ajornakusoortinneqalersinnaavoq. Taamatut suleqatigiinneq § 3a-mi malittarisassat atuuttut atorlugit I/S-imi pisinnaassanngilaq, ingerlatseqatigiiffimmili pisariaqassalluni.

Kalaallit Nunaanni ingerlatseqatigiiffiup piginnittui iluanaarutinit annertunerusunik akileraarnissaannik tamanna kinguneqassaaq, tamassumalu taamatut suleqatigiilernissaq aningaasaqarneq isigalugu pilerinarunnaarsissavaa, taamaalilluni pissarsianit akileraaruteqarnani Kalaallit Nunaanni suliffeqarfimmut pissarsiaqartitsisoqarsinnaalluni.

Tusarniaanermi akissummi pineqarpoq § 3 a, ingerlatseqatigiiffiit kommunit agguarnerisa avatani nunani allani illersornermi oqartussat sinnerlugit suliaqartut kapitali 3 b-mi aaqqissuussinermi ilanngunneqarsinnaassasut. Aaqqiinerli pitsaanerpaajunngilaq, tassa ingerlatseqatigiiffik § 3 a-mi ilaatinneqartoq nunani allani illersornissamut oqartussanut atorneqartunit allanik arlalinnik aamma ingerlatsisinnaammata, tassunga ilanngullugu assersuutigalugu suliasat entreprenørinut allanit suliakkiissutigineqartut. Taamaamat ingerlatseqatigiiffiit inuussutissarsiummi tassani suliffeqarfinit allanit pitsaanerusunik pineqariaannaapput. Tassunga ilanngunneqassaaq, nunanit allanit aningaasaliisitsiniarnissamik taamatut pisariaqartitsisoqarnersoq nalorninartoq. Ajornartorsiut tusarniaanermi akissummi uparuarneqartoq inuussutissarsiutit akileraarutaannik aaqqissuusseqinnissami ilanngunneqarluarsinnaavoq.

BDO amigartoorutinik atuinissamut piffissarititap sivitsornissaa pillugu siunnersuummut oqaaseqatissaqanngilaq, kisiannili piffissami sivitsorneqartumi naatsorsuuserinermi atortunik uninngatitsinissaq pillugu aalajangersakkap atuutilersinnissaat tunngavissaqanngitsutut isigalugu. BDO-p ilimagaa, Akileraaruseriffik maannakkut piffissaritinneqartup ukiut 5-it iluanni, nammineq nalunaarsukkani inaarutaasunik akileraarusiinissamik maannakkut ajornartorsiutaanngitsaq,

taamaammallu periutsip atuutiinnarnissaani ukiunilu 10-ni toqqortaqaarnissamik suliffeqarfiit suliassaqartinneqarnerisa allanngortinnissaa pissutissaqaanngitsutut isigalugu. Siunnersuut ilimagisaq akimorlugu Akileraaruseriffiup ukiut 5-it ingerlaneranni nammineq nalunaarsukkani inaarutaataasumik akileraarusiinissaq angumerisinnaanngippagit, BDO isumaqarpoq, tamanna aningaasanut inatsisikkut aaqqinneqartariaqartoq, taamaalilluni ingerlatsiveqarfik naammattunik sulisoqartinneqassalluni.

Siunnersuummi siunertaavoq amigartoorutininik atuisinnaanerup akileraaruseriffiullu ukiumi amigartoorfimmik atueqqissinnaanerata akornanni tunngaviusumik oqimaaqatigiissitsiinnarnissaq. Akileraartussaataasup naatsorsuuserinermi atortunik uninngatitsinissaq imaluunniit suliareqqissinnaaneranut sivitsuinerup atornissaanik kissaateqaanngippat, akileraartussaataasup piffissarititamik sivitsorneqartumik atuinngissinnaavoq, taamaalillunilu taassuma kinguneranik pisussaaffeqarunnaassalluni.

BDO aningaasaatikippallaarnermi killigititanut oqilisaanermut oqaaseqaatissaqaanngilaq.

Tusarniaanermi akissut allannguinerinik kinguneqanngilaq.

Ernianik akileraarusiineq pillugu siunnersuummi siunertat BDO-p paasivai, BDO-llu ilungersunartut arlallit takusinnaavai.

Taarsigassarsineq pillugu isumaqatigiissutit atuuttut (annertuut) arlalli malittarisassani ilaatinneqassapput. Taarsigassarsiat taamaattut arlallit suleqatigiinnerisigut taarsigassarsiaritinnegarajuttarput, nunani allani ingerlatseqatigiiffiit, aningaasaateqarfiit aamma soraarnerussutisiassanik ileqqaartarfiit il.il. akiitsoqarfiit arlaliusarlutik. Taarsigassarsiat pillugit isumaqatigiissutit assigiissut tassaavoq, tamatigoruinnangajak siusinaartumik taarsiisoqartillugu piumasqaateqartoqartarnera, tamassumalu kinguneraa taarsigassarsisut Kalaallit Nunaanneersut ernianit akileraarutaasinnaasunik akiliisariaqarnerat, taamaalillunilu akiitsoqarfiit nunanit allaneersut aallaqqaammut ernialiissutinik pissarsisarlutik.

Ingerlatseqatigiiffiit Kalallit Nunaanneersut taamatut pisoqarnerani qanoq iliussanersut siunnersuummi allaqqaanngilaq, tassani assersuutigalugu akiitsoqarfiit quliugaangata qulingiluat akileraartarnerminni pissutsinut uppernarsaatinik nassiussisinnaallutik, akiitsoqarfillu ataaseq paasissutissanik tunniussisinnaanani/tunniusserusunnani. Aamma uppernarsaatit qanoq ittut saqqummiunneqassanersut siunnersuummi takujuminaappoq.

Tusarniaanermi akissut nassuiaatini erseqqissaanermik kinguneqarpoq, taamaalilluni allaqqalerluni suleqatigiilluni taarsigassarsisitsinerit qanoq iliuuseqarfigineqartassanersut. Akileraarutininik ilanngaasussaataasooq akiitsoqartut ataasiakkaat taarsigassarsiaat tamarmiusut tunngavigalugit ernianut aningaasartuutit agguassavaat. Taarsigassarsisitsisunit amerlaqatigiinnik

taarsigassarsisitsisunit qulingiluanit ataaseq erniat akileraarusinninnissaannik uppernarsaateqanngippat, taamaalilluni ernianut aningaasartuutit qulerarterutaat ilanngaatigineqassapput. Tusarniaanermi akissut uppernarsaasiornermut piumasagaatinik nassuiaatini erseqqissaanermik aamma kinguneqarpoq.

Akileraartarnermut Aqutsisoqarfimmit siumut akuerisaasunik uppernarsaatinik pissarsinissamut periarfissaqartoqannginneratut isikkoqarpoq, taamaalilluni Kalallit Nunaanni ingerlatseqatigiiffik ernianik akiliinermi ilanngaasussaatitaaneq pillugu taamaattoqannginneraluunniit pineqarnerseq ilisimasinnaanagu.

BDO isumaqarpoq siunnersuut taarsigassarsineq pillugu isumaqatigiissutinut atuuttunut annertuunik kinguneqassasoq, 2024-mi ernianik siullermeerluni akiliinissaq pillugu tamanik takunnissinnaaneq ajornakusoornernannik kinguneqassalluni. BDO aamma siunnersuuteqarpoq uppernarsaatinik siumut akuerisaasunik akiitsoqarfimmit pissarsinissamut periarfissaqassasoq.

Tusarniaanermi akissut ikaarsaariarnermi aalajangersakkamik ilanngussinissamik siunnersuuteqarnermik kinguneqarpoq. Siunnersuutigineqarpoq taarsigassarsiat erniaat 1. januar 2024 sioqqullugu pilersinneqartut ernianut akileraaruserneqassanngitsut. Siunnersuutigineqarpoq ikaarsaariarnermut aalajangersagaq taanna akiitsunut aqutanut atorneqassanngitsoq, tassa akiitsut aqutat Kalaallit Nunaanni akileraartarnermik saneqqutsinissap pinngitsoortinnissaa siunnersuummi siunertat ilagimmasuk.

Akiitsunik siumut akuersisinnaaneq pillugu siunnersuut malinneqanngilaq, tassa taamaattut aaqqissuussineq akileraaruseriffimmut allaffissornermi suliasaqarnerulernermik kinguneqassamat, siunnersuullu taarsigassarsiat malittarisassami ilaatinneqarnerisut ingerlatseqatigiiffiit naalilersuisinnaanerannut naammattumik ersarimmat. Tamanna pillugu oqaatigineqassaaq, malittarisassat inatsisit tunngavigalugit inuttut isigineqartunut, assersuutigalugu ingerlatseqatigiiffinnut suliamik ingerlatsisunut atuuttut siunnersortinillu aamma atuisinnaasut.

Pissarsiaqaqqittarnermut malittarisassat inatsisiliunneqarnerisa naleqqunnera BDO-p isumaqatigaa.

Tusarniaanermi akissut pissarseqqittarnermut malittarisassat inatsisiliunneqarnerannik isumaqataaffiusutut isigineqarpoq, allannguinerinillu kinguneqarani.

BDO oqaaseqaateqarpoq iluanaarutininik nalikilliliisarnernik atorunnaarsitsineranni akileraarutinit tapiisutit pingaartumik ingerlatseqatigiiffinnut angisuunut iluaqutaasut pineqarnerannik tunngaveqartoq allaqqasoq. BDO oqaaseqaateqarpoq, suliffeqarfiit angisuut suunerinik nassuiaateqanngitsoq, Naalakkersuisoqarfiulli ingerlatseqatigiiffiit ukiumoortumik naatsorsuutit pillugit inatsimmi naatsorsuusiornermi C-mi anginerusunulluunniit ilaasut eqqarsaatigippagit BDO

isumaqataangilluinnartoq. BDO-p isumaa malillugu malittarisassat maannakkut atuuttut pingaartumik ingerlatseqatigiiffinnut amerlasuunut iluaqutaapput, tassa immikkoortutut SMV-tut naatsorsuusiordermi klassimi B-mi ilaasutut oqaatigineqarajuttarmata.

BDO isumaqarpoq malittarisassat maannakkut atuuttut Kalaallit Nunaanni suliffeqarfinnut amerlasuunut ingerlalluurtunik inuussutissarsiuutaanerannut tapersiisut, tassa malittarisassat qanga atuutilersinneqarmata aamma siunertaammat. Malittarisassat maannakkut atuuttut naleqquttuunnginnerat BDO-p takusinnaangilaa, annikitsumik aningaasaqarnermi pissutsit allat ”tapiissuteqarnermut” tunngavissaqartitsinngippata peerneqartariaqarnerannut tunngavissaqarnera BDO-p takusinnaangilaa.

Tusarniaanermi akissummi pinneqarpoq iluanaarutit nalikillilerneqartarat pillugu malittarisassat maannakkut atuuttut peerneqartariaqanngitsut. Tusarniaanermi akissut allannguinernik kinguneqanngilaa. Taaguut ingerlatseqatigiiffiit angisuut siunnersuummut nassuiaatini nalinginnaasuni atorneqartumi naatsorsuusiordermi klassit innersuussutigineqanngillat, kisiannili taaguutip ulluinnarni nalinginnaasumik paasinnittarnermi aamma Kalaallit Nunaanni paasinnittarnermi atorneqarpoq. Uani iluanaarutit nalikillilerneqartarnerat pillugu Grønlands Revisionip tusarniaanermi akissutaanut akissut aamma innersuussutigineqarpoq.

Angalanerit sulisitsisunit akilerneqartut akileraaruserneqartussaannnginnerat aamma akissarsianit uninngatitsinerit qummut killingisa naleqqussarnerat pillugit siunnersuutitut BDO oqaaseqaatissaqanngilaa.

Tusarniaanermi akissut allannguinernik kinguneqanngilaa.

Qeqqata Kommunia

Qeqqata Kommunia tusarniaanermi piffissarititap naareernerata kingorna tusarniaanermi akissut nassiuppaa, tassani allaqqavoq, isertitani tunngaveqarunnaarnera kommunip ernumassutigigaa. Siunnersuutip kommunip aningaasaqarneranut qanoq kinguneqarnissaa pillugu paasissutissat kissaatigineqarput, kingunissaanillu sukumiisumik nalilersuisoqarnissaa kaammattuutigalugu.

Tusarniaanermi akissut allannguinernik kinguneqanngilaa. Ataatsimut isigalugu ilimagineqarpoq akileraarutinit isertitat tamarmiusut siunnersuutip kinguneranik allanngungaarnaviannngitsut. Kommunit akileraarutinit isertitaannut tamanna aamma atuutissasoq ilimagineqarpoq.